



BIBLIOTECA NAZ.
Vittorio Emanuele III

LV

D

4

NAPOLI









DE
BELLO
SVECICO.

17

D

A

D E

R E F L O

2 A B C I G O



PETRI BAPTISTÆ BVRGII
GENVENSIS
DE BELLO SVETICO

Commentarij
Quibus Gostaui Adulphi
Suecor Regis in Germaniâ expeditio
usq; ad ipsius mortem
comprehenditur

Ad
Cm̃. et Reus. Principem
ac Dominum.

D. FRANCISCVM
CARD. BARBERINVM

LEODII

Apud Henricum Edelmannum.

Superior

1633.

Normalis



THE BELLO-VALLO

OF THE
CITY OF
BELL-VALLO
IN THE
COUNTY OF
BELL-VALLO
STATE OF
NEW YORK

OF THE

OF THE

EMINENTISSIMO,
ET REVERENDISSIMO
PRINCIPI,
AC DOMINO
D. FRANCISCO
CARD.
BARBERINO
S. R. E. VICECANCELLARIO.



PHEMERIDEM
eorum, Eminen-
tissime Princeps,
quæ Bello Sueci-
co in Germania
gesta sunt, per-
quisita quantum
potui veritate, memoriæ causâ con-
scriptam, cum superiori mense Pra-
gam

gam in stativa secessimus in ordinem
mihi digesseram, decreueramq. op-
portunè finito bello, ipsius historiam
describere; sed amici tumultuarium,
atque utcūque descriptum opuscu-
lum exigunt, nec possum, quin ami-
corum petitionibus morem geram.,
& publici iuris faciam; Audeoque
tuum ambire patrocinium, qui Pa-
tronum habere percupio, cuius me
excuset benignitas, & defendat au-
thoritas; Qualem te mihi futurum,
spero, vbi veritati (quam a te vehe-
menter diligere intelligo) me studuisse
comperies. Neque velim me ideo te-
meritatis damnares, si ingenij mei
primitias, incomptum inornatumq.
munusculum tibi, quem maiora ne-
gotia requirunt, legendum porrigo,
sed animum humillime offerentis,
qui tibi vna cum hisce paginis se de-
dit, æqui boniq. consuleres, ac faue-
res

res tui obseruantissimo, dum Eminentiae tuae veram felicitatem obsequentiissime precatur. Vale. Pragae
ix. Calendas Februarij 1633.

Eminentiae Tuae

Deditissimus

Petrus Baptista Burgus.



AD LECTOREM ADMONITIO.



I hæreticorum superstitionem alicubi religionem, Lutheranos, Euangelicos, captiosa Lutheri dogmata, verbum Dei ab hæreticis hominibus in hisce Commentarijs falso appellari inuenies, non ideo dictum putes, quod ego talia esse asseram, sed me ita scripsisse credas, quia voces eorum expresserim ex ipsorum ore loquutus. Ceterum me Romana, hoc est Catholica, Orthodoxaq; Ecclesia obsequentissimum scias, & nihil, quod ab ipsius veritate declinet, profiteri.

I

PETRI BAPTISTÆ BVRGII
Commentariorum
DE BELLO SVECICO
LIBER PRIMVS.



Breuiarium Libri.

1 Imperialis dignitatis in Austriacis continuata possessio Germaniae, aliosque Principes mouet; horum consilia.

2 Suecia situs, religio, & vires: Gostauri bella, ad eum Germanorum Principum Legationes, & preparationes ad bellum.

3 Gostauri ad Imperij electores litterae; tractatur frustra. Gedani pax: Suecici belli primordia.

4 Comitij Ratisbonensibus pax inter Germania Principes concluditur, dimittitur exercitus Caesaris exauclorato Vollebraino: Caroli Auria Legati Hispanici pium facinus.

5 In Pomerania Contius se contra Suecos munit. Gostaurus habitis Stocholmia comitij ordinum Regni, ex Suecia cum exercitu soluit.

6 Gostauri in Germaniam appulsus, progressus primi.

7 Contij aduersus Suecum consilia, huius bellicae artes, Contius Stetinum immittere praesidium conatur.

8 Gostaurus Stetinum occupat: Cum Bogislao Pomerania Duce paciscitur, & Stargardia potitur.

9 Bogislaus apud Caesarem suam defectionem excusat; Casarian regionem circa Stetinum depopulantur.

10 Tyllius Magdeburgii affigit, ciuitati Christianus Guilielmus praesto adest; varia velitationes, donec Tyllius eam ciuitatem obsidione cingeret.

11 Gostaurus ab Electoribus, & Caesare litteras accipit: Brandenburgico Electori priuatim scribit, Gherthium ad Casaria-

2 DE BELLO SVECICO

norum munimenta visitanda tendit, ubi magnum vite discrimen subit: novos milites habet, sunt transactiones de redimendis captiuis: Pomerani in verba regis iurant, ipse in Megapolim soluit.

12 Casariani Pasbaldiam spoliant, Stetinâ frustra tentant.

13 Gostauri in Megapolim expeditio, ad Megapolitanos & Rostochiensis mandatum; Casariani Rostochium astu nouum praesidium introducunt.

14 Lauenburgici exercitus collectio, progressus, & extinctio: Colbergæ obsidio a Suecis.

15 Contiis Megapoli subsidium mittit, Casariani nequicquam Colbergam obsidione liberare nituntur.

16 Prætoriam Vismariensis classis vadis harentem, & a Suecis obsessam Lubecenses seruant; queritur de hoc facinore Gostaurus. Brandenburgicus Suecicis partibus palam accedit.

17 Caesar militibus leges præscribit, novos delectus instituit, reliquias sui exercitus ex Italia reuocat: Catholici sædævis Principes milites colligunt, ut Casari assisstant.

Gesta hæc maiori ex parte anno MDCXXX.



VS Romani Imperij Stephanus Secundus Romanus Pontifex à Græcis ad Gallos transtulit, cū orientalium Imperatorum absentia, aut ignauia occidentalium rerum statum defensoris indigere & præsentia, & cura expertum est: Ius idem Gregorius Quintus extincta Magni Caroli sobole Germanis dedit, electiuam nempe dignitatem, non hæreditariam, ut spe ipsius consequendæ, post obitum pro tempore

tempore Imperantis cæteri principes ad virtutes inuitarentur, paterenturq. libentius Imperij potitum: Electio penes certos Electores decreta, qui in Germaniæ liberis ciuitatibus congregati Romanorum Regem eligerent, non ante Imperatoris nomine appellandum, quam confirmationem dignitatis, & Imperatorium diadema à Romano Pontifice reciperet. Hanc sibi authoritatem Electores pluribus sæculis conseruauere, debilem semper, & viribus non præstantem cæteris Principem ad eam dignitatem promouentes, periculosum rati, si potentem admitterent, quem postea nisi captis armis, turbataq. Republica, non pro libito possent deponere: Hoc idem liberarum ciuitatum status videbatur expetere, quæ libertati studentes Imperatoris potetiam auersabantur: A successionē præterea annuente etiam Pontifice abhorrebant, verentes, ne Imperialis potestatis continuatus successionē vsus in tyrannidem declinaret, conciliatis subditorum, sociorumq. animis, qui ob longæuum imperantis familiæ dominium, non Rempublicam, sed Imperatores agnoscerent: Hic diu valuit stylus, donec in Catholicam fidem furentibus Luthero, & Caluino Germania omnis distracta dehisceret; defuncto enim

tunc temporis Maximiliano Carolus est substitutus, ex filio nepos; continuata tertio Catholicorum Electorum opera in Austriaca familia successione, ut ipsius potentia nascentes hereses suppresserentur, & periclitanti in Germania fidei succurreretur; utili quadantenus ad hunc finem consilio, sed ad Electorum, Imperijq. libertatem pernicioso, cum potentia Caroli Austriacorum res adeo firmatę sint, ut Imperialis dignitas, haud interrupta successione, in ea familia ad pręsentem usque Ferdinandum duret; quamquam maiori Germanorum Principum parte contranitente, ijs vero pręfertim, qui Luthęro, aut Caluino adherent, nam hi non semel arreptis armis rerum statum non leuiter perturbauere; ut enim libertatis studiosa, ita belli auida gens est, adiecto insuper religionis (nř religionem hęreticorum perfidiam appellare est nefas) prętextu facile in arma proruebat: quę haud tam facile deponebat deinceps superstitionis tenax: verum hęc Austriacos molestauerunt quidem, sed viribus bene firmatos parum afflixere, & hisce narrandis non defuere decora ingenia; neque mihi consilium antiqua repetere, sed propositum de ijs, quibus aut interfui, quęue ex fide dignis percepi sine ira & studio, quibus

careo,

careo, aliquid breuiter tradere, initio facto ab Suecorum Regis in Germaniam irruptione, periculosa & graui Catholicæ Reipublicæ, quaque fere Austriacorum res cecidissent, ni Deus opportunissimo, atque insperato remedio contra hostem fidei Catholicis subuenisset: prius tamen de huius belli causis aliquid dicam. Postquam Ferdinando filio Hungariæ Boemiæq. Rege coronato, conclusaq. cum Christiano Daniæ Rege pace, Cæsar Ferdinandus ad maiora animû applicare est visus missus in Italiam contra Mantuæ ducem exercitû; vulgatumq. passim tentaturum illum, vt filius ad Romanorum quoque regnum promoueretur, dubitare Principes Imperij Electores præsertim, & suspicari, ne sua priuilegia in obliuionem caderent, & Imperij violarentur leges, quod propemodum Austriaci, continuata tot annorum hæreditaria successionē præscripsissent; Suspicionem augebat vulgata fama, qua ferebatur, non ante Hispaniarum Regis soror Hungariæ, & Boemiæ Regi desponsata, ipsi nuptura, quam ille Romanorum Rex eligeretur. Scilicet his moti Germaniæ Principes disserebant, sub tot Austriacis Cæsaribus Imperatoriam dignitatem vnus familiæ quasi hæreditatem fuisse, unde
fere

fere seruitus nata;redituram libertatem,quando Cæsares libere eligi inciperent; At qui hoc in dies difficilius reddi, nam immisceri rebus Germaniæ Hispanos callidam gentem, Imperij auidam, saltu, fortuna, potentia elatam: iamque hos non spernendam Germaniæ partem spoliato domino naturali possidentes, vltiora præsentī matrimonio moliri; & quid conari Cæsarem exercitibus omni occupata, Germaniā, neque ijs exceptis locis, quæ Catholici fœderis militibus debebantur, quam vt Electores ad libitum cogeret? Detineri ideo in Italia Gallum, qui Mantuano Duci subsidio venerat, ne comitia, quæ specie pacis, animo seruitutis Germanicæ procurandæ, Ratisbonæ Cæsar indixerat, turbaret, interromperetque, quæ ipse molitus esset; Imperatoriam enim dignitatē ambire Ludouicus Galliarum Rex perhibebatur: Addebatur hæreticis superstitionis zelus; pulsos ex Boëmiā, Aultria, & reliquis Germaniæ regionibus, quibus Cæsar dominaretur, nouæ religionis professores; quid facturum filium, qui si rerum potiretur maiores habiturus esset vires, quam pater? Natum ex Catholico Principem, inter Catholicos semper educatum, ideo cum Hispaniarum Rege, qui Catholici nomine gloriaretur,

riaretur, priscam consanguinitatem recenti
affinitate renouare, vt coniunctis cum ipso vi-
ribus, religionis specie adacto iugo, Imperij
Principes proprijs sedibus deturbaret. Quid
religionis prætextu ambiturum Fridericum co-
mitem Palatinum Rheni, Adolphum Frideri-
cum, & Io. Albertum fratres Duces Megapo-
litanos testari; iam & hoc in reliquos Cæsarem
moliri, repletis milite Prouincijs, & iam non
se domi suæ, sed Vollestaunum, sed milites do-
minari: experientia non opus vltius, arma
capeffenda, tuendum non ius Imperij, non
religionem solum, sed ditionem liberos, vi-
ram. Fouebat hos motus Anglorum Rex Ca-
rolus, non tantum inueterata in Austriacos, &
Catholicos similtate, sed nuperrimo odio ob
depulsum ex Palatinatu Rheni sororis virum:
Augebant Confœderatorum in Belgio ordi-
nes, vt subsidia Cæsaris Hispanis adimerent,
ipsi interea debilitatum hostem ex toto Bel-
gio pellerent. Sed & Galliarum Rex hos co-
natus impellere dicebatur, nouis insuper iniu-
rijs in Austriacos irritatus, ob bellum Itali-
cum, adiecta quoque Imperij ambitione; ne-
que suspicio defuit, quin nonnulli Italiæ Prin-
cipes Hispanorum, Austriacorumque, aut do-
minium exosi, aut potentiam veriti ad hæc ip-
sa con-

la concurrerint: sed in abdito hæc sunt, inanisq. hætenus hæc suspicio fuit, neque aude-rem ego quicquam affirmare, cum nullum adhuc hostilitatis effectum non ab Italis modo, sed neque ab externis Catholicis Principibus Austriaci in Germania sint perpeffi; At hæretici liberaq. Germaniæ ciuitates agitare consilia clam cœperunt de belli gerendi modo; præcipua nempe erat difficultas (milites, namque, & pecunia non catēbant) quem ducem exercitui præficerent: Germanum Principem eligere decorum dacebatur, neque deerant qui tanto oneri pares essent, vt qui plura stipendia in vtraque Germania emeriti, vulnorum cicatrices militarem laudem ostentarent: In his tamen desiderabatur authoritas; nam cum inter pares æmulatio obsequij impedimentum vigeat, nemoque ex Germanis Principibus alteri cedat, difficile videbatur futurum, vt cæteri alicuius ex sibi paribus Imperium paterentur: Addebatur, quod si tyrannis exercitus ducem inuaderet, non facile futurum esset remedium contra eiusdem gentis virum, cui non essent defuturi cognati, & fautores quocumque animum verteret: Atque, quod magis huic sententiæ officiebat, si aliquis in Germania militarem delectum institueret,

rueret, metuebatur præsens Cæsaris potentia, qui milite Principum omnes ditiones repleuerat; occursum hunc nascenti seditioni, illamque oppressurum, antequam succresceret; satius, & securius esse, si externum quempiam gradu, & dignitate Germanicę Principibus præstantem præficerent, æmulationem & odium cessatura, & fore ut nemo ipsi obedire dedignaretur; nec ab eo tyrannidem timendam, cum advena non tot adhærentias, ut indigena habiturus esset: Collecturum hunc citra Cæsaris suspicionem in proprio regno milites, bellumq. illaturum, quo inexpectatius, eo infensus: neque indecorum hoc censendum, quod tamen si Germanici nominis famę officeret in exteris regionibus ducem quærere, gloriosum tamen erat, Germanicę libertati externum Regem stipendia merere; in hanc omnes sententiam eo facilius cessere, quod alter alteri ægre admodum concedebat, liberæque ciuitates, veteri quodam instituto, Germanorum Principum, cum potentiam, tum Dominium suspecta habebant: externum igitur Regem sibi ducem eligere conclusum, ferebanturque in medium Daniæ, & Sueciæ Reges, eiusdem religionis ambo, & hostes Cæsaris; at ille nuper reconciliatus sancte pactas indu-

cias, & pacem colere profitebatur, neque magni pendebant hominem, qui semper in bello aduersam fortunam esset expertus: Erant in Suecum animi propensiores, iuuenem Regem, enutritum bello, inuictum, qui puer adhuc patre orbatus contra Moscum, Polonum, & Danum, potentissimos hostes, regnum non defendisset solum, sed ampliasset, cuiq. cum Cæsare recētes similitates essent obmissas Polono hosti suppetias: De hoc itaque exercitui præficiendo decretum, & internun-
 cij missi sunt, persuadente præsertim Georgio Guilielmo Electore Brandenburgico vxoris
 2 fratre. Regnum Suecię ultra quinquagesimum quintum Septentrionalis latitudinis gradum ad mille Italica milliaria, qua latissimum est, vsque ad septuagesimum secundum gradum extenditur; longitudine mille quingenta non excedit. Ab Oriente Russia, a Meridie mare Balthicum, & Germania, ab Occasu Noruegia, a Septentrione Oceanus iacent. Quod citra sexagesimum gradum est, aëre satis miti, & temperato fruitur, quod inde vsque ad sexagesimum sextum, scilicet ad Arcticum circulum excurrit, cælum quidem inclementius habet, solum vero felicius, vt beneficium huius, ubi patitur situs, illius iniuriam compenset: Quod
 reli-

reliquum vltra circulum Arcticum restat, & sterile est, & frigore horridum, feris tamen piscibusq. innumeris abundat, quos lacus, flumina, mare suppeditant ita, vt incolæ ex his vitam trahant. Regnum fuit olim incolarum multitudine adeo plenum, vt siluas etiam colerent, quod & ruinæ, quæ passim itinerantibus in Suecia occurrunt, & in reliquum pene totum terrarum orbem huius gentis inundationes testantur, nunc ob dissensiones, & bella fere continua non adeo populosum est: Incolæ natura feroces & truces dura, exercitiq. educatione contra omnes labores firmanantur; Germanis mores similes habent, nisi quod ab ijs ciuilitate superantur, at industria certe præstant, vtpote quouis Sueco rustico omnes artes opificiaq. callente: Reges memorant antiquissimos, a Magogo Noachi, ex Iapheto filio, nepote, vsque ad præsentem Gostauum secundum, cētum quadraginta octo: Regiam dignitatem electiuam antea, hæreditariam fecerūt sub Gostauo primo, ipsius hæredibus regnū, ab eo penitus ereptum Danis, subiicientes, quod decretū sub Carolo anno MDCIV. renouarunt: Christianam religionem S. Ansgarius monachus, sub Biorno centesimo Suecorū Rege anno DCCCXVI. indigenas Ido-

lolas edocuit, quam postea vsque ad tempus Gostai primi, ad annū circiter MDXXV. Catholicam conseruarunt, quo tēpore in Augustanæ cōfessionis deprauatione m, instigante Rege, descuerunt: vires Rex habet satis firmas, cum mari, tum terra: mari præter triremes, vltra quinquaginta bellicas naues, tormentis copiose instructas, ad regni custodiam facili negotio semper alit; quem numerum, occasione bellorum modernus Rex auxit, terra militem, habet exercitatissimū, bellis cum Dano, Mosco, & Polono assuetum, & numerosum ita, vt Sueci iactent, suum Regem intra quindecim dierum spatium, quadraginta peditū millia colligere, & quo velit, ducere posse: neque equite regio caret, gignit enim & Suecia, & Finlandia equos, qui etiam si humiles sunt, & parui, ad obeunda tamen militaria munia minime sunt inepti: supplet, qua deficit magnitudo corporis, virium robur, & laboris patientia, qua de re possem ego testimonium ferre, qui quadraginta continuis horis, dum apud Suecos detinerer, simili equulo centum viginti Italicorū miliarium iter confecerim; Cæterum ob corporis humilitatem ad sustinendum grauioris equitatus impetum fere sunt inutiles, ideoq. ex Germania, quan-

do

do opus est, equites conducunt Sueci. Regnabat hoc in regno Gostauus Adulphus, Caroli illius filius, qui a nepote Sigismundo, Poloniae & Sueciae Rege, in curam Regni Sueciae adscitus, dum ipse in Polonia abesset, a Senatu Suecico se regem eligi curauerat; vir miles, strenuus, inuictus, prudens, cui nihil obijci fere aliud posset (si alieni regni occupationem, more nostrorum temporum excuset) quam, quod alioquin praclarum ingenium, in hoc incautum, deceptoris Lutheri nugis subdiderat. Militares artes, quas sub patre didicerat, contra Poloniae Regem haereditarium hostem, & repetentem Regnum, potissimum exercuerat, eo rerum successu, ut fere nunquam aduersam fortunam esset expertus: Hinc non exigua fama Gostauo accreuerat, & vulgus militum, non ut Regem, sed quasi numen venerabatur hominem forma insignem, statura procerum, & mole corporis ita ceteris antestantem, ut nemo in ijs regionibus esset vel maior, vel aequalis, neque equus reperiretur, qui grauiori lorica indutum vehere posset: Pluribus hoc Polonicum bellum annis exarsit, & cruentum, & graue, in aperto semper praeliantibus, addito insuper odio quodam naturali inter Polonos, & Suecos; anno tandem a Christo

sto nato MDCXXIX. ad sexennium induciæ pactæ sunt. Exceperunt itaque inducias paci-
fcentem, sed alias belli auidum Regem Ger-
manorum Principum memoratæ legationes;
proponerentur ipsi cognatorum iniuriæ, reli-
gionis impugnatio, Regni proprij periculum;
quid enim expectandum amplius, aiebant, oc-
cupatis a Cæsarianis Germaniæ portubus, qui
ad mare Balthicum spectant? armari iam na-
ues, instrui classes, neque quietem in Mega-
poleos, aut Pomeraniæ oris nacturum Volle-
stainum, bellicosum hominem, ocij, pacis oso-
rem; nihil vicinitate potentis hostis periculo-
sius; cessisse iam Danum, vnum restare Cæsa-
rî, si non apertum, saltem suspectum hostem
hunc inuictissimum Regem, quem alloque-
bantur, expectaretq. breui Stocholmiæ in sua
regia bellum, nisi ultro ipse parantibus hosti-
bus inferret: & de inimicitia Cæsaris Regi mi-
nime dubitandum; debere iam esse expertum
in Borussia ipsius hostilia arma, non fuisse,
hactenus reconciliatos animos, durare igitur
hostilitatē adhuc: esse Cæsarem Italico bello
irretitum, distractisq. per Germaniam viribus
debilitatum: Quid igitur cunctandum? Su-
menda tam pijs de causis arma, ad futuros to-
tis viribus quatenus spiritum traherent suos

Princi-

Principes, & felix futurum bellum, quia iustum: Irrumpendum itaque, plus audaciæ, & constantiæ inferentes periculum habituros, quam propulsantes, & fore, vt hostis ne aspectum quidem militum toleraret. Arridebat Regi bellum aggressu facile, specie gloriosum, successu non desperandum; neque detrectabat militares labores, qui militiæ solum se quietem habere profitebatur: nec deerant odia peculiaria, quibus ad bellum incitaretur; At colligere militem, exigere vectigalia, extorquere ex proprio regno pecunias displicebat: addebant præterea Suecici Senatus primates nonnulli, qui aut bellum oderant, aut pacem cupiebant, aut ordinis proprii, patriæque libertatem amantes, Regis succrescentem potentiam verebantur: Satis iam bello operam datam fuisse, domos viris, ærarium auro vacua; non adesse indigenam militem ad externa bella; Regnum alias pecuniæ penuriosum, tunc omnino carens; ad externos milites colligendos tributa ferre non posse: egere Rempubicam pace, bello stabiles labare Respublicas, pace labantes stabiliri: vana vanorum hominum Legatos memorare, etiam si deteriora essent, quam fingerentur. Sueciæ regnum a Germania periculosissimo mari dissitum,

fitum, terra ob nemora, & montes perpetuis
niuib. obfessos, inaccessibile: neque Volle-
stainum vltius tentatum, quam Cæsar vel-
let; nec Cæsarem quamuis Catholicum (hoc
hæretici dant crimini) alioquin pium Princi-
pem, plus ausurum, quam conscientia dictarit:
Quos sedibus pepulerat, merito vt perduelles,
& inquietos homines, pepulisse; nec crede-
ret bellum patratu tam facile; stare adhuc res
Cæsaris, imo tunc potissimum temporis vige-
re, adesse in Italia, & Germanijs inuictos, nu-
merososq. exercitus; censeretq. hos ipsos, qui
se ad bellum inuitabant, cum inciperet, sibi
hostes futuros; leuissimum hominum genus
Cæsarem odisse præsentem dominum, nesci-
re quid cupiat; velle interim alieno periculo
propriæ curiositati, an perfidiæ consulere: re-
seruaret iniurias ad opportunius tẽpus, si a
Cæsare accepisset, reciperet interea vires, &
cognati, aut affines quas sibi procurauissent
iniurias, proprio, non alieno discrimine vlcis-
cerentur: Quod de religione dicerent, futu-
ram illam Deo curæ, nefas esse facere hanc
præliorum, & cædium ducem; armis barba-
riem, impietatem, non religionem homines
doceri; facile insuper omne bellũ sumi, æger-
rime desinere, neque in eiusdem potestate
initium,

initium, & finem eius esse, licere cuius, etiam ignauo bellum incipere, deponi cum victores velint. Se vero non hæc ideo dicere, quod aut belli tædeat, aut tributorum pigeat; statutum sibi ad Regis libitum viuere, hæc quæ dixissent ipsum rerum statum menti suggerere, fidem ex ore exigere: eximeret se tandem discriminibus Rex, seruaretq. se patriæ, vxori, natæ: Quid de his futurum si fato in Germania bellum gerens concederet; auerteret Deus tale fatum, at si forte accidisset, patriam in eas ipsas manus relapsam, e quibus redemerat, depulsam vxorem viduam, orbatam patrē natam, spoliata regno, folio expulsam, ludibrium denique toti orbi factam euolueret. Mouere hæc rationes animum Regis; ideoque Legatis respondit: Sibi quamuis propensum ad ea, quæ petiissent haberet animum, deficere tamen vires; neque enim se habere militem proprium asseribat, ad suscipiendas extra suum regnū expeditiones, neque pecuniam, qua externum conduceret; at Legati vltro parte suorum Principum arma, militem, pecuniam, necessaria omnia offerre; sic tandem Rex alieno periculo, & incommodo, proprio autem comodo & gloria bellum facturus in eorum sententiam iuit; habita prius eleganti

ad Senatum Suecicum oratione , vt obiectionibus factis satisfaceret . Agere se de beneuolentia, qua se prosequerentur, quas posset gratias , precari Deum occasionem rependendi daret , probare ipsorum consilia & fidem ; at sibi offerri bellum , & pium & iustum , & gloriosum , & facile , ex quo si vinceret, vtilitatis multum, si succumberet nihil damni esset suo regno allaturus: Pium quod pro religione ; iustum , quod pro vlciscendis suis , cognatorumque iniurijs ; gloriosum, quod contra potentem hostem ; facile , quod contra diuersis intentum esset certaturus . Si vinceret , Germania , Romanum Imperium erant præmia , si succumberet, aut ab armis mallet desistere , se regressu in suum Regnum minime priuatum iri , quod quantum ab Cæsarianorum inuasionibus esset securum, vel ipsi, qui obiecerant, prudenter differuerant: De sibi subeundis periculis , quantum ad se spectaret , nihil curare, dedecere Reges hanc curam , vbi regni bonum quæritur: quantum ad regnum , non defuturos inter tot præclarissimos Senatores , qui illud regerent , & tam bene, & tam strenue, vt ipse rexerit, & vxorem natamque illius tuerentur , qui pro religione , & patria , si fatum daret, cecidisset: addidit de iniurijs a Cæsa-

Cæsare acceptis nonnulla, multa de utilitate huius belli disseruit, & probauit esse hoc bellum, non tale solum quale narrauerat, sed quantenterius necessarium, adesse enim adhuc ex Polonico bello numerosum militem, quem si dimitteret (nam retinere sine causa inutile, & sumptuosum erat) non erat dubium, quin ad Cæsarianos accederet, atque inde hosti vires accrescerent, sic præstare, non ipsum retinere solum, sed augere, præsertim cum hæc facere posset alienis, & periculo, & expensis, nullo regni incommodo, quod si bellum in Germania inciperet consequi videbatur; accedebat Stralsundanos defendendi necessitas, quos sub protectione receptos, si deseruisset, infame erat. Conclussit tandem se decreuisse hoc bellum suscipere, cum ob prædictas rationes, tum propter hoc præsertim, quod quoquo modo res se haberet nihil ex eo damni erat Reipublicæ emerfurum; sequerentur ipsi iuxta Regis placita, cætera curaret Deus. Itaque cum Legatis pactum est, Germaniæ Principes, & cæteri pecuniam suppeditarent, milites ipse colligeret: cum in Germaniam ingrederetur Principes assisteret: Ditiones quarum potiretur, si Catholicorum fuissent, pro se haberet, si reformatæ (vt appellant) religio-

nis protestantium, dominis restitueret. Accepit igitur magna pecuniæ vi, unde potuit, milites colligere, & necessaria parare Rex cepit, eoque facilius validas equitum, & peditem contraxit copias, quod Polonia Rex, & Gedanensis Respublica nuper pactis cum ipso Rege inducijs, milites dimiserant, quos omnes dato stipendio sub suis signis excepit, quibus militi, quem habebat additis, nouoq. insuper in Suecia delectu facto, iustum exercitum instruxit. At quoniam aliena merere stipendia indecorum regioq. nomine indignum censebat, specioso prætextu hanc ignominiam declinare est conatus, datis ad Imperij Electores litteris tertio nonas Maij an. MDCXXIX. a quo tēpore bellum moliebatur, quibus causas parandi belli narrabat, & se ostētabat propensum ad pacem: responsum habuit omisso regio titulo, & nihil ad quæsitā atinens; ipse interea dum bellum molitur pacem affectare se fingens, cum vt Cæsarem deluderet, tum, vt mouere proprijs de causis arma videretur, Hamburgi, Lubecæ, & Bremæ, Regi Dania, Duci Saxoniae, & Marchioni Brandemburgico significari curauit fore, vt iustam pacem non respiceret, si tractandi commoditas daretur; petijtq. ab ijs, vt se tractandæ paci inter-

pone-

ponerent: Quod vbi Cæsar ab his rescivit, Ged-
danum, electam partium cōsensu tractatui ci-
uitatem, Carolum Annibalem Baronem Do-
nauium misit, data authoritate concludendæ
æquis conditionibus pacis; misit & Rex cum
eadem authoritate suum Cancellarium, non-
nullosq. ex suo concilio; & Rex Daniæ Lega-
tos, qui si qua verteret inter partes differentia,
componerent: conuenere Gedani sub initium
Aprilis, anni. MDCXXX, ibique circa capi-
ta pacis faciendæ tres menses disceptatum est:
Petebat Rex; Cæsar exercitum & præsidia a su-
periori, & inferiori Saxonia remoueret; arces
ad mare Balthicum sitas demoliretur; Portus
liberi essent, nauesq. bellicæ inde recederent;
controuersia de Episcopatibus, & Ecclesiasti-
cis bonis arbitrio Electorum terminarentur;
restituerentur expulsi rebelles, postquam si
criminis læsæ Cæsareæ maiestatis cōvinci pos-
sent, pecuniariam mulctam persoluissent. Me-
gapolitanis Ducibus sine mora redderetur di-
tio, pro ijs Rex fideiuberet, si pecunia mul-
ctarentur: Cæsar sumptus, & damna in obsi-
dione passa Stralsundanis reficeret; Regi frau-
di non daret, quod obsessæ vrbi opem tulisset;
Regis hostibus suppetias non ferret: Rex præ-
sidium Stralsunda deduceret; iniuriarum par-
tes

res ambæ obliuiscerentur, & hac firma stabiliq. pace Gallia, Anglia, Dania Reges & Confœderatorum Belgij ordines comprehenderentur. Respuit Donauius pacem bello iniquiorem, & tandem irrumperentibus in Germaniam Suecis tractatus dissolutus est. Dederat interea Rex. xiv. Calendas Maij ad Electores secundas litteras, quibus omisſum regium titulum in responſo ſuis primis dato dolebat, petebatq. iterum reſponderent: At dum ſpectatis Cæſarem ſuſpenſum detinet, bellum incepit, repudiato antiquitus tanquam indecoro, ſed noſtris temporibus recepto tanquam utili, ſtratagemmate hoſtem circumueniens: Nam miſſis circa idus Martij Stralfundam, qua in ciuitate habebat præſidium, copijs aliquot, iuſſit Rugiam inſulam occupari, dilatandis militum hoſpitijs: Eſt Stralfunda ex Anſæatiæ ſœderis liberis ciuitatibus vna, quam Cæſaris Imperium detrectantem, magna vim militum in ditionē ad ſtationes miſſa, Volleſtæinus affixerat: reſtitit vrbs militi, miles obſedit, Suecus urbem inducto præſidio obſidione liberauit: Rugia inſula, & regione vrbis ad milliare Germanicum poſita Cæſariani adhuc potiebantur; hanc igitur iuſſi inuadere Succij, bombardis alijsq. bellicis machinis inſtructi

Stral-

Stralsunda Tubale ductore soluētes, adiacen-
tes prius aliquot paruas insulas, Hiddenseam,
Vittauiam, & Iesselmundam occupant; castris
deinceps ad maius Cæsarianorum in Rugia,
munimentum admotis, eo perterritis, morte
nuntiata, defensoribus potiuntur. obsessis sub-
sidio venerat Tribunus Ghetius, collectis,
quas poterat, copijs, qui fortunam iam bis ad-
uersam expertus, tertio tentans, amissa copia-
rum parte superatus, conscensa Stetinenſi na-
ue periculo se subduxit. Vnum adhuc in ea In-
sula Cæsari munimentum restabat, hoc Ale-
xander Leslæus præsidij Suecici, quod Stral-
sundæ erat præfectus xv. Calendas Iulias trans-
uectis, quos ex præsidio selegerat, militibus,
cum tormentis nonnullis, est aggressus: ag-
gredientem Cæsarei strenue exceperunt, cre-
bris bombardarum ictibus, quæ moliebatur
interturbantes, extruxit tamen vallum, & tor-
mentis munimentum quatere cœpit, nullo
euentu, contra situm egregie munitum; po-
stera die obsessis deditionem imperauit; re-
spondere, quantum duraret vita se locum de-
fensuros: sed casus defensorum constantiam
elusit, nam cum biduo post oneraria naus
Brandeshaga obsessis aquam, aliaq. victui ne-
cessaria afferret, Sueci myoparones illam terra
arcere

arcere crebris tormentorum ictibus cœpere, cumque ij, qui in munimento erant contrarijs illam ictibus tutarentur, factum est, vt fumus nubes in munimento densissima fieret, visumque defensoribus adimeret, qua re Sueci cognita, non expectato ducum signo improvisa irruptione facta munimentum in potestatem rede gere. Memorant eo momento, excitata magicis Suecorum carminibus procella, magnam grâdinis vim cœlo demissam, quam obuius ventus in obsessorum faciem impellebat: Cæsariani passim cæsi; ducenti fere seruati, & capti sunt; Sueci sex tormenta, biscocti panis, eduliorum, & pulueris sulphurei copiam non spernendam inde habuere, sic Cæsariani tota Rugia expulsi: Quapropter Stralfundani gratias Deo agentes in lætitiæ signum explosere suæ ciuitatis tormenta, militemque centum ceruiciæ cadis donauere: atque ita qui proprij Principis copias alere negauerant ad conseruandam pacem, externi exercitum maioribus impensis, donisque insuper perfida curiositate ad bellum incipiendum alliciunt: sed est humani generis communis iam hæc curiositas, omnibusq. præsentis Principis, tanquam tyranni, fastidium, alterius cuiuspiam, tanquam optimi Principis desiderium inest: inutile

inutile sane, atque exitiosum, nam quem produnt irritant, & cui se dedunt suspecti inuisque viuunt: Neque enim adscititius Princeps, de illorum fide acquiescet, qui naturalem prodiderūt, vnde necessario in Tyrannidem ruit; atque in ipsa mutatione paci sumptus, pericula, ruinæ succedunt: Non aliter Germaniæ liberae ciuitates, graues quidem, sed tolerabiles contributiones à Cæsare impositas exosæ, spe melioris fortunæ, falso libertatis vocabulum ijs obtendentibus, qui priuatim degeneres, in publicum exitiosi, nihil spei, nisi per discordias habebant, in peiora interim præcipites se dedere. Cæsar interea pacis cupidus, vt comitia haberentur procurabat, & tandem circa Iunij finem ipse cum filio, Ecclesiastici Electores, & Bauariæ Dux Ratisbonæ conuenere; Saxo, & Brandenburgicus per commissarios adfuere, excusatione adhibita, ideo se non venire, quia sibi pecunia non suppetebat ad sumptus in itinere pro dignitate faciendos, cū ditionum non prouentus tantum, sed substantiam milites à Vollesteinio in stationes missi dissipassent; & quidem ferunt in solâ Marca Brâdemburgica quattuordecim legiones statua per triennium habuisse; Saxonia pariter tota eadem ratione militi fuerat distributa,

unde nō omnino falsa ipsorum excusatio poterat videri, ni paulo post colligendo contra Cæsarem militi, thesauros fere erogasset. Crediderim ego à molitorum conscientia fuisse congressu prohibitos. At Ratisbonæ comitia haberi cæperunt, & post cōclusam cum Rege Galliæ pacem, de Romanorum Regis Electione, cuius suspicio ita Principū animos mouerat, ne tractatū quidem: Nūncius Pontificis solum Roccius (qui ad hoc speciale mandatum a Beatissimo Patre in forma brevis habuerat) & Regis Hispaniarum Legatus, priuatim de hoc negotio cū vtroquoque Electorum, parte suorum Principum, verba habuerunt, sed pro voto minime retulerūt responsum; allegātibus Electoribus, de hoc in præsentibus comitijs, se nihil posse deliberare, oportuisse, secundum Imperij leges, se à Cæsare antea de hoc specialiter fuisse admonitos, indixisse illū comitia ad tractandam Germaniæ pacē, de hac tantum deliberandum; remitteretur negotium istud ad alia comitia, quibus ipsi erga Austriacā familiam debitum studium erant patefacturi: Sic vt diximus de Regis Electione in comitijs nequidem actum est, & prudenter non petijt Cæsar, quod consequi se non posse cognouerat, tum ex ijs, quæ fortasse à prædictis Legatis rescie-

rat, tum quod iam erga se Electorum male affectos animos didicerat. Quattuor consumpti sunt menses in pace Germaniæ componenda, volebatq. Cæsar, vt ea, quæ Vratislaviæ conclusa fuerant, locum haberent, & præsertim, vrgebat, vt bona Ecclesiastica redderentur, & Catholici eo restituerentur, vnde fuerant expulsi: fero nimis remedio, contra inueteratum morbum, quando iam hæreticorum avaritia, quæ quasi quercus radices agit, & quo diutius inhæret, difficilius auellitur, Catholicorum bona longo tempore quodammodo præscripserat. Sed Electorum quibusdam, vt opportunius, & cautius deinceps fallerent, his assentiri placuit, petieruntque contra, vt postquam de pace esset conclusum, eius fructus apparere inciperent; dimitteret itaque Cæsar milites, & oppressas contributionibus Prouinciās subleuaret: Calamitatibus infantium populorum iam satis militum avaritiā esse expletam, deuastatā tandem, deformatāq. Germaniā miseretur: conquesti præter omnia sunt de Vollestaino summo armorum Cæsaris præfecto, illum oblique perstringentes, quod superbus homo, ambitione elatus, ad militum beneuolentiam captandam, tantam exercitui concessisset licentiam, vt nihil tam facinorosum ef-

set, quod milites contra miserrimos populos non auderent: sæuire in homines, virginibus vim inferre, comburere domos, ciuitates deuastare, depopulari prouincias, pium censerent; militaribus præceptis contineri piaculum ducerent: esse has, non conseruandi, sed perdendi Imperij artes, non instruendi milites, sed corrumpendi; irritari militum petulantia populos, inde rebelliones, & bella ciuilia oriri, militem contra per licentiam lasciui-
re; hunc labore, non mollitudine probari, & in eo modestiam, & continentiam non minus, quam virtutem, atque animi magnitudinem esse desiderandam; Instabant igitur maxime, vt Vollestinus a suprema præfectura remoueretur, atque exercitus dimitteretur; non odio solum in Vollestinum, qui vt feroces, rebellesque compesceret Germanorum animos, militibus habenas laxauerat, sed miro astu, vt illum qui Cæsari egregiam fidamque operam nauauerat, eidem ea iniuria inimicum redderent: & Cæsar facilius, quam fortasse par erat, ipsorum petitionibus cōsensit, bellum Suecicum non tanti pendens, quanti erat necesse, putansq. satis esse futurum exercitum, qui in Pomerania, & Megapoli erat, ad illud conficiendum, neque sibi a Germaniæ Principibus

capibus metuens, qui cum neminem vnquam data fide fefellisset, fore vt ab alijs falleretur nō credebat. Io: itaque Comiti Tyllio Catholici fœderis Generali præfecto data reliqui exercitus cura, creatisq. super milites commissarijs, exercitum, qui in superiori erat Germania dimitti iubet, & Albertum Vollestaïnum, cui Megapolitanum Ducatum antea donauerat, exauctorauit, excusauitque, propter Germaniæ quietem, ita fieri oportere, ne cui postea sibi belli causas imputare liceret; & maluit Cæsar suam erga pacem propensionem ostendere, quam potentiam seruare; Pio sed pernicioso consilio, cum iam experientia receptum sit, hominum deprauata ingenia, si quam aliquando iniuriam sint perpessa, non parcere, sed tunc potissimum vltioni studere, cum reconciliantur, cessatque illius potentia a quo passa sunt, qua commodissima occasione ad vlciscendum fruuntur; sic pie Cæsar reconciliatus arma deposuit; Germaniæ Principes astute, si secundum nostri sæculi consuetudinem loquamur, quas se accepisse dicebant iniurias vlciscendi occasionem nacti sunt. Accessit (ijs fortasse instigantibus, qui Vollestaïnum erant exosi) commissariorum in milites intēpestiua seueritas, qua in illos animaduertentes,

tentes, ita male affectos dimiserunt, vt maior pars, imo fere omnes ad hostes transmigrauerint. Vfus militaris est in Germania hyemali, & eo, quo in statiuis milites morantur, tempore, vt singuli, vel bini, aut terni vnā habeant incolarum domum, cuius dominus victum militi, & equo, si equum miles habet, dare tenetur; Pagus quoque, seu ciuitas, vbi statiuā sunt, contributiones porrigit secundum mulctam, quæ deinceps in singulos milites pro rata parte distribuuntur; præter hæc vnusquisque aliquid semper ab hero domus extorquet, donatiui nomine, quod incolæ, etiam si inuiti, dant tamen, ne in suam familiam, facultatemque milites defrauent: de hoc commissarij inquirentes, coegerunt milites reddere, quicquid donatiui nomine accepissent; iustum quidem, sed militi graue, qui eas pecunias luxuriei, propinationibusque, vt mos genti est, insumperat, eoque grauius, quod plurimi, pecunia, quam dissipauerant, carentes, equos, arma, vestes in solutum dare coacti sunt; vnde irati, vt leue ad iracundiam militare genus est, ad Suecum partim, partim ad Saxonem, Brandenburgicum, aliosq. Protestantes Principes, qui eam occasionem sunt amplexi, se contulerunt: Tales fuerunt

Ratif-

Ratisbonensis conuentus fructus, in quo pax conclusa, suspicionesq; remotæ, at bello commoditas, dimisso exercitu, data; exemplumque posteris, præstare ab eo, quem offenderis, te etiam reconciliatum merui, quam depositis armis omnino reconciliationi confidere: neque aliud in ijs comitijs notandum veniret, si prætereundum censerem Caroli Auricę Hispanici Legati erga Catholicam fidem celebrandam pietatem: Est Ratisbonæ templum antiquissimum, quod media ex parte Catholici ex Diui Dominici instituto possidebāt, reliquum Lutherani vsurpabant, sibi a Ratisbonensi Senatu, nescio quo iure traditum, inter cætera miranda, quæ in hoc templo sunt, Pulpitum est, ex quo diuus quondam Albertus ciuitatis Episcopus ad populum conciones habebat: Afferunt (quod Ratisbonæ ex pluribus audiui) Lutheranos quotquot, ad concionandum supra illud ascenderunt, cum finita concione, descenderent, medios fuisse disruptos, ideoq; prope id, quod adhuc extat, aliud fabricasse, ut & ipsi conciones haberent, Catholicisq; qui impune ascendebant, antiquum illud cessasse: Carolus vero iniquum ratus sacrosancta Catholicæ fidei mysteria, terribilibus Lutheri superstitionibus, & blasphemijs in tam deu-

to templo immisceri, apud Senatum egit, de illo redimendo, & quanquam Senatores fere omnes Lutheri impietatem colerent, maluerunt tamen aurū, quod offerebat Auria, quam suo Luthero seruare fidem; concesserunt itaque Auriaē templum; si prius tamen quadraginta florenorum millia, quæ a Catholicis tributi nomine poscebant, numeraret: quo pacto gauisus Auria, insigni liberalitate, protinus pecuniam dedit, & templum omnino liberū Catholicis donauit; solus inter tot Principes, qui Ratisbonam confluxerant, qui religionis zelo noueretur; essetque hoc facinus mirabilius, si solum esset in hac familia pietatis exemplum, & Andreas proauus liberata patria pietatem, charitatemq. suos hæredes non docuisset. Dum hæc Ratisbonæ gerūtur, Torquatus Contiūs exercitus Cæsaris, qui in Pomerania post bellum Danicum remanserat, præfectus, ex amissa Rugia Suecorū consilium detexit, quos prius, si bellum intentarent, aggressuros Pomeraniam, aut Megapolim nunquam putarat, cum nimis per eas regiones in Germaniam difficilis esset ingressus, ac ideo crediderat fore, ut potius ex Borussia, in Silesiā irrumperent, quod verosimilius erat, & facilius; sed ex hoc in cognitionem venit, in Pomerania,

merania, & Megapoli futurum bellum; Quare a Bogislao Pomeraniæ Duce petijt, vt Ghertium, & Griffenhagam loca ad flumen Viadrum sita sibi concederet, vt illis munitis, hostem eo transitu prohiberet; sibiq. ab vna ad alteram prouinciam pateret accessus. renuit primo Bogislaus, sed resistere se non posse cognoscens, postea concessit, vtili sibi reseruato dominio, cautoque, ne commercium cuiquam impediretur. Extruxit Contiſius, vt impiger, & prudens, Ghertij pontem ductaq. Griffenhagæ per flumen catena, nauigationem impedit, & in his locis, atque alibi passim, vbi opus erat, munimenta excitauit, quibus hosti posset resistere, quousque Volleſtæinus, quem non adhuc esse exauctoratum intellexerat, cum exercitu reliquo adueniret: Inde misso in Megapolim Federico Duce Sabellio, eius Prouinciæ, ac citerioris Pomeraniæ curam dedit, qui itidem Demini, Grysbaldiæ, & alibi cæpit se munire: Sueci contra Stralsundâ, quæque circa ipsam sunt loca summa celeritate muniebant. Gostauus vero quietis impatiens, nihilque se absente bene fieri ratus, habito Stocholmiæ ordinum regni solenni conuentu, iterum causas explicuit, quibus bellum, contra Cæsarem susciperet, easdemq.

libello complexus, typis excudi curauit, Latino sermone, & Germanico; Tenor erat: Quod Rex dum opprimerentur amici, & clientes, aliaque Germaniæ vastatores (exercitum Cæsaris annuebat) facerent, quæ, non parum se irritare poterant, habuerat occasionem quidem belli: neque opportunitas deerat rei bene gerendæ, inuitantibus, imo enixe postulantibus Germaniæ incolis, vt arma caperet, suadentibusque exteris amicis, vt dum paries vicinus arderet, propriæ domus incendio consuleret; voluerat tamen nunquam pacem rumpere, cuius erat amator, & cultor, & maluerat securitatem propriam Dei, & innocētis conscientiæ bonitati commendare, quam dare se in belli discrimina præcipitem, vnde periculum sibi, amicis incommoda erant oriunda. Verum cum anno MDCXXVI. in Borussiam contra Polonos exercitum ducens, propius obseruare incepisset Germaniæ grassatorum motus, amicorum monita vana non fuisse, & quo propius Cæsarei ad mari Balthico adiacentes Prouincias, accederent, eo plura tentare, quæ bellum prouocarent, dignouerat: in primis enim eodem anno suas, quas ad Transiluaniam Principem dederat, litteras, iure gentium violato, interceperant, coniecto in carcerem

cerem Tabellario, atque conficta verborum interpretatione, in sui inuidiam publicaerant; cumque postmodum inter Regem & Polonos pax tractaretur, nihil omiserant, ut tam sanctum opus turbarent, Polonis ultro subsidia offerentes, concedentesque, ut militem in Germania scriberent, & arma extraherent; Germanis ne Regiæ militiæ nomen darent, interdicto: quod tametsi Regi nihil obsuisset, cum præter optatum numerum ex Germania milites, & arma habuisset, illorum tamen male affectum animum detexerat; qui & apertior prodierat anno sequenti, quo Holsatiæ Ducem cum exercitu, sub ipsius Cæsaris signis; cōtra Regem, Polonis subsidio miserant: post hæc Sueci tota Germania prohibiti, naues ipsorum captæ, & confiscatæ; inde (quod & eorum consilium manifestius ostenderat) succedenti anno instructæ classis Generalem præfectum creauerant, munierantq. totius Pomeraniæ, & Megapoleos, tam maritima, quam mediterranea loca, quasi vltèrius quippiam tentaturi: neque vero propter hæc Rex, tantipendebat pacem, hostile aliquid erat molitus, imo anno MDCXXVIII. Stralsundanam ciuitatem a Danis, Cæsaris hostibus, eiusdem Cæsaris nomine, tanquam neutrius partis, re-

cuperans, suam erga Romanum Imperium propensionem ostenderat: Cumque Stralsundani negarent exercitum Cæsaris in ciuitatem recipere, vt qui hostiliter adiacentem regionem deuastauerat, intentaueratque vim vrbi, donec super hoc a Cæsare expressius haberetur mandatum; Rex proprijs sumptibus in ea ciuitate præsidium aluerat, ne a quopiam occuparetur, quod cum Cæsariani æqui bonique consulere, & Cæsaris decretum expectare debuissent, sinistre interpretati, cum Stralsundano arcerentur, Vismariensem occupauerat portum, accitisq. Gedano hostium Regis nauibus, Balthicum mare ita cœperant infestare, vt ipse si commercia salua voluisset, magno incommodo, & sumptu classem contra instruere, ipsorumque conatus impedire fuisset coactus, quousque annus ille elaboretur; inde ne daretur sibi fraudi, quod Stralsundam teneret, cum principio anni MDC XXIX. Lubecæ pacem inter Cæsarem, & Daniæ Regem tractari intellexisset, suos eo Legatos mittendos censuerat, qui tum vrbis Stralsundanæ causam accomodarent, tum cæteras componerent simultates his annis enatas, atque si ad id quoque aliquid conferre possent, tractatum ipsum, interuentu suo, ad optatum exitum perdu-

perducerent; Putabat enim Rex, quod cum pax cum Dano concludi exclusa Stralsunda, atque hæc sine se includi non posset, ob pactas conuentiones, opus esse, vt sui quoque Legati conuentui interessent. Legatos Rex Danię committer, vt par erat, exceperat; at Cæsariani summa iniuria, non Lubeca solum, sed tota Germania, morte comminata, facessere iusserant; quod iniquum facinus, datis ad Regē litteris, excusantes, se non habuisse potestatem dicebant, cum alio tractādi, quam cum Danię Rege, certo tamen scire, si res adhuc vel ad Cæsarem, vel ad Vollesteinum deferretur, fore, vt Rex pro votis haberet responsum. Verum indignum iam Regi videbatur tot modis lassam, tam ludibriosam amplius processibus offerri patientiam, sciebatq. difficile admodum futurum, vt Legati Cæsarem adirent, vijs omnibus interclusis, & Lubecensi conuentu ad finem vergente, addebaturq. cum Cæsare antea non habita communicatio: vicerat tamen pacis desiderium, Senatusq. impulsus, & dederat ipse Electorali Collegio (quod de iure Imperij exterorum Regum causas cognoscit) litteras, & a Senatu ad Cæsareum Generalem ablegari Stenonem Bielchen Baronem, & suum cubicularium passus erat, vt si animos partis aduersæ

uerſæ in pacem pronos reperiret, etiam pro Stralfundanis armiltitium ſtatueret, quouſque ad integrum pacis negotium plures commiſſarij mitterentur: appulit Bielches Stralfundam, inuenitq. omnia in deterius lapſa; neque enim ſolum graſſatores illi ciuitatem moleſtabant, ſed armauerant inſuper naues ad prædam, miſerantq. iterum cōtra Regem, duce Arnemio Cæſaris Campi Mareſciallo, vt vocant, in Boruſſiam exercitum: hæc Bielchis vltiorem progreſſum mutatio ſtiterat, ne tamen fruſtra veniſſe videretur, ſcripſerat ad Volleſtainum, quibus de cauſis expeditus veniſſet; & de iniquitate tranſmiſſi exercitus proteſtatus, vt is, & reliquæ hoſtilitates ſuſpenderentur, petierat, ſi ſincera alias videri deberet Lubecenſium delegatorū reſponſio. Reſponderat Volleſtainus; illuſoria plane ſuorū ſubdelegatorū fuiſſe reſponſa; exercitum reuocari ideo non poſſe, quod tot copijs abundaret Cæſar, vt ſibi hunc Arnemianum exercitum dimittere opus eſſet, atque ideo amico Polonię Regi contra Sueciam haud immerito eum miſiſſe; nec quidquam vltius, quod ad rem faceret, repetitis Bielchis poſtulatis, niſi hoc ipſum iterum reſponſum dederat, iuſſeratque Arnemium cum exercitu in Boruſſiam iter

matu-

maturare , qui non parum res Suecicas per totam eam ætatem afflixerat , magisque afflixisset, ni fors nefariæ intentionis conatus in propria capita pensasset . Narrabat præterea litteras ad Electores datas , & Legatum Gedanum missum in medium producebat , vt se pacem cupere persuaderet; atque arguebat ex responso ab Electoribus habito , quo nihil ad rem continebatur , necessitatem relictam , & quasi insinuatam , opportunis remedijs sibi consulendi ; & ex Gedanensis conuentus dilatione concludebat , se ab hostibus detineri, illos interim ad bellum necessaria parare , quod cum non posset sine maximo regni , suoque detrimento pati, coactus bellum inferebat, vt auerteret , & protestabatur quicquid damni ex eo Christianæ Reipublicæ , Germaniæq. populis emergeret, non sibi, sed ijs pacis osoribus, qui tot, tantasque dederant causas , esse imputandum : Hæc , quæ in eo, vt appellant , manifeste continebantur proluxius , nos quo breuius potuimus complexi lubenter sumus , vt huius belli causæ vel ex ipsius Regis ore audirentur, qui tametsi pleraque falsa, multa tamen vera
6 narrat , quæ ad rem non parum faciunt . Rex itaque libello hoc promulgato , cum exercitu quindecim mille militum nauem conscendit, felicique.

felicique nauigatione Rugiam quarto nonas Iulias appulit, quo die festum Diui Præcursoris veteri calculo hæretici celebrant; ibi quas adduxerat, cum ijs, quas ibidem inuenit, coniunxit copijs, totusque exercitus, vt asserunt, viginti millibus militum constabat. Vt primum solum Germanicū attigit, in genua procumbens orauit, aut sua in superstitione pius, aut pietatem simulans; precatusque est Deum, pro felicitate belli, postquam de prospere dimenso itinere gratias egit: Applausere illacrymantibus exercitus Duces, ipseque eos, occasionem persuadendi nactus, vt eloquens erat, & facundus, in hunc fere modum est allocutus. Si mihi, commilitones, cum tyronibus sermo esset, conarer verborum apparatu bellum, quod suscepimus, leue, & facile, demonstrare: atqui quando ego illorum ora cōspicio, qui ante tot annos in meum cōmilitium adscripti, in continuis bellis, ex varijs hostibus innumera trophæa retulere, iniuste me facturum putarem, si ficta facilitate pellicerem, quasi difficultate deterreremini, qui pericula in delicijs habetis; terrent ardua viles animos, strenuos, & fortes stimulant, & inuitant. Germaniam, in illa regnaturi, ni Dei fauor, vestraq. virtus deficiat, calcamus, vastissimam prouinciā, fluminibus,

bus, montibus, siluis circumseptam; neque nobis bellum cum Mosco fugaci hoste gerendum, sed cum firmissimis aciebus stabili fixoque pede dimicandum; cum Germanis, ut vno verbo dicam, nobis res est: sit victoriæ difficultas, & gloria, vestræ virtutis stimulus, cœptis fauebit Deus, cui militamus: Quid enim nos ad bellū hoc mouit, nisi religio? nisi miseratio fratrum, qui ideo a Catholicis affliguntur, quod Doctoris nostri Lutheri religionem sectentur? Solus hic religionis zelus victoriam largietur milites. Quod si mundanas annectere causas, & coniecturas futuræ victoriæ lubet; addite, vestræ virtuti, & numero, confœderatos nobis Principes, qui præsto mox aderunt; addite populos integros, qui nos opperiuntur, ut nobiscum communia sacra tueantur; addite ipsius hostis debilitatas, distractasque vires, difficillimum alioquin bellum, facillimum, ut re vera est, censebitis; & vicemus, auguror: si geratis vos ita, ut strenuos milites, & Lutheranos viros decet, atque præter gloriam ingens vos præmium manent, opulentissimarum ciuitatum ditissimæ supellectiles, Catholicarum Ecclesiarum pretiosissimi apparatus, gemmæ, torques, aurea, argentea vasa, quibus Catholici per luxum vtuntur; vltimumque cælestem

gloriam consequimini, qui ad liberandos prioris verbi Dei professores hanc expeditionem suscepistis. Hæc ille; & exercitus militari fremitu approbavit Regis dicta, longam illi vitam; ut mos est, precatus. Stralsundæ quoque propter aduentum Regis ludii habiti, & grates Deo de ipsius salute actæ, Legatiq. missi, qui ipsum in ciuitatem deducerent: At dū Rex Stralsundæ populari applausu fruitur, miles Hispanorum Hagam, & Vsedomiam, nō procul a Volgasto, insulas occupauit; haud sine Cæsarianorum cæde, Croatarum præsertim, quorum fere ducenti cecidere: mox excitata ante Volgastum munimenta a Cæsarianis amissa, neque ea, quæ ad Viadrum erant, diutius seruata sunt, ipsumq. Volgastum, postquam aliquot dies tormetorum vim sustinuerat, Regi cessit, sola arce seruata, qua non tam cito, ob defensorum virtutem Rex potiri potuit; Porro ut Cæsarianorum animos ad plura distraheret Rex, ex Rugia in continentem secundo vento mille equites, & quinque pedum legiones excursionē facere iussit, aliasq. subinde traijci copias, ut munimenta excitarent, vnde sibi postmodum ad mediterranea loca facilius aditus pateret: Descendit deportatus miles inter Grysbaldiam, & Volgastum, & ne-

& nescio maiori alacritate, an patientia, breui temporis spatio multum operis confecit, panē & aqua per plures dies vitam trahens, ingentiq. labore terram in corbibus, vehiculorum defectu, ad struendum vallum vehens; vtque militum diligentiam excitarent operis præfecti, illi, qui vltra viginti plenos corbes, in die attulisset, Ceruisiæ amplum poculum propinari iusserunt, vnde tolerabilior, proposito præmio labor. Neque horum militum parum Succis profuit modestia, ad alliciendos incolarū animos, non enim rusticos exactiōnibus grauabant, vel extorquebant edulia, sed qui habebant pecuniam, ea sibi cibum emebant, nummis carentes acquiescebant ijs, quæ vltro sibi suppeditabantur. Sic patientia, & labore militum Rex se muniuit, alacritate hostes deterruit, modestia incolas sibi amicos confirmauit. Torquatus interim Contius cum Regem plures occupasse portus vidisset, haud consultum duxit, præter Vismariam Rostochiunt, & Colbergam, loca alia ad mare retinere, namque hostis iam appulsu minime poterat prohiberi, ac nostræ vires distrahebantur, detinebanturq. in locis, quibus non adeo facile auxilia poterant adferri; satius itaque duxit in mediterraneis ciuitatibus munitisq.

atque ad inuicem propinquis exercitum continere. Quapropter Brandeshagenſe munimentum in littore iuxta Rugiam ſitum, atque a Suecicis tormentis ita vndique quaſſatum, vt amplius fere defendi non poſſet, deſtruere decreuit, ideoq. aſportatis Grysaldiam bombardis, & munitionibus, quæ in ipſo erant, illud diruto vallo hoſti vacuum reliquit; vnde maritima, quæ circa Rugiam ſunt loca omnia Sueco ceſſere; quare ipſe Rugienſes incolas publicato edicto ad ſuas ſedes reuocauit, atque cõciliandis mediterraneorũ animis, Volgaſti Stetinẽſibus mercatoribus maritimum portum aperuit, qua per Viadrum ingreſſus, & egreſſus pateret, monitis prius nautis, ita onerarent naues, vt in flumine nauigare poſſent: Poſt hæc Vollinum, cum arce Principis a Cæſarianis derelictum, occupauit, & reſtaurauit pontem ab iſdem incenſum, largitusq. panem, & lardum colonos ad ſuas partes attraxit: nempe Deus hominem vtili in milites ſeueritate, in incolas comitate, in omnes iuſtitia imbuerat, qui Catholicos aliquatenus peccantes caſtigaret, ipſe ſua felicitate opprimeretur, & pœnas hæreſeos lueret; nam qui bene iſtius belli euentus obſeruarit, videbit Regi ita arridentem fortunã, vt vix aliquid ſiniſtrum

nistrū habuerit, quod militari disciplinē etiam potest adscribi, quam ipsius miles, in aduersis constans, & patiens, in pugna impiger, & strenuus, cum colonis & hospitibus modestus, & affabilis semper coluit: noster contra (quamquam post aduentum Contij mutati sint mores) tolerando impatiens, pugnando piger, petulans, intolerabilis apud incolas, illos in Suecum ita propensos reddidit, vt tanquam liberatorem sui exciperent, & amplecterentur; Quod temporis progressu non exigui fuit momenti, atque Sueco faciliorem reddidit expeditionem; nam comitate Regis, Suecorumq. populi allekti, ita istorum partibus adhæserē, vt Cæsarianos vbicunque possent infestarent, Suecis vero pro viribus opitularentur: Vnde inter militaria axiomata non spernendum duxerim, reddere sibi amicos illius Prouinciæ incolas, in qua bellum gerendum. Atqui Contius veritus, obseruatis Suecorum progressibus, ne Stetinum occuparent, aucto exercitu ijs copijs, quæ in Megapoli erant, ad viginti millia militum, petijt a Bogislao Duce, & Stetinenfibus, vt ex suis præsidium admitterent; eosque renuentes, quod se satis firmatos viribus assererent, monuit, vt quando nullum Cæsareum præsidium admittere, sed sese ipsi tueri vel-

ri vellent, in fide, & obsequio erga Cæsarem manerent, nec militem reciperent Suecum; ipse interea eorum perfidiæ non ignarus, specie liberandæ obsidione arcis Volgastensis, ad
 8 Stetinum obsidendum tendebat. Consilium Rex odoratus, Contium biduo præuenit; nam ex Vsedomia cum milite, atque iusto apparatu bellico soluens, duarum horarum spatio triginta milliaria conficiens, per Viadrum, & trans portum, Oderburgum plenius velis præteruectus, ad milliarem prope Stetinum exposuit militem: Aduentum Regis Bogislaus, & Stetinenſes primo ægre se ferre simularunt, clausisque portis, quasi se defensuri, ad Regem Legatos misere, qui ipsum allocuti, retulerunt, cupere illum, ut Dux sui copiam faceret, quo coram, quid vellet esset expositurus; neque illum adire palam Dux abnuït, cum quo iam clanculum tranſegerat; atque eadem die in castris inter eos fœdus ictum, cuius hæc præcipua fuerunt capita: Primum, amicitia inter Regem, & Ducem, & libera inter subditos commercia essent: secundum, teneret hoc fœdus ad defensionem tantum: tertium, nihil contra Cæsarem, aut Imperium tentaretur, sed hæc confœderatio solum fieret, pro Imperij statu in antiqua forma, libertate, & tranquillitate conseruando, reli-

religione, ac Republica tuenda, neque hac transactione quicquam ijs, quæ Bogislaus Romanò Imperio debebat, detraheretur: quartum, restitueret Rex, quæ occupasset, aut occupaturus erat in Pomerania loca; Dux ea non alienaret, ijsque homines præficeret, qui Regijs commissarijs in ijs, quæ ad Prouinciæ defensionem pertinerent, præsto essent: quintum; priuilegia Stralsundæ, & fœdus per eam cum Rege initum salua manerent, ipsiusque grauamina sine mora, & secundum æquitatem tollerentur. Sextum, Caminenfis Episcopatus, qui sub Pomeraniæ ordinibus comprehenditur, huic conuentioni includeretur, fruereturque ipsius commodis, hoc solum addito, quod si quid deinceps, Diœcesi aut Capitulo, contra ipsius priuilegia, statuta, aliasque leges fundamentales, propter electionem Episcopi, aut Coadiutoris, aut alia quacunque ratione, iniungeretur, hoc Rex iunctis cum Duce viribus vetaret, atque Episcopatus liberam electionem, dignitatem, & iura tueretur. Septimum, neuter altero incio ab hac conuentione discederet: Dux cum nemine de mutua defensione pacisceretur; Rex si quid in Pomeraniæ utilitatem innotare vellet, Ducem certiorrem faceret. Octauum, locus Principibus, si
qui

qui hoc etiam fœdus inire vellent, relinqueretur. Nonum, huic tranſactioni alia, aut facta, aut facienda nihil obesset. Decimum, Sueci, & Pomerani, tanquam vnius Prouinciæ incolæ haberentur, & moneta tam Regia, quam Ducali promiscue vterentur. Vndecimum, si qua oriretur controuersia, non armis, sed ciuilitè decideretur. Duodecimum, si Bogislaum sine hæredibus virilis sexus decedere accideret, antequam Elector Brandenburgicus successor designatus hanc conuentionem ratam habuisset, aut ad liberandas eas Prouincias opem tulisset, aut eidem de successionē moueretur, Rex eas Prouincias sequestro apud se haberet, donec omnis de successionē controuersia dirimeretur, & sumptus belli a successore, absque vlla Pomeraniæ ordinum, atque incolarum contributione, aut onere, sibi rependerentur. Vltimum, singulo decennio hoc fœdus renouaretur. Hæc in castris conclusa, in veteri Stetino signata sunt eodem die xij. Calendas Augusti; quo die Rex cum instructis copijs urbem ingressus, vallum, portas, & forum militum præsidio firmauit, tormentaq. quæ ex nauibus sumpsit, opportunis locis disposuit, ac occupato sequenti die Oderburgo, xj. Calendas Augusti Stetinum redijt;

rum

rum conuocatos militum præfectos, quantum in vrbe præsidij esset. interrogat; Quo cognito, Duci urbem contra hostium vim, non satis esse munitam persuadet, se modum ostensurum, quo melius muniri posset, ipse de opere perficiendo cogitaret: At ciues lentos, & segnes, insuper militaribus laboribus insuetos, opus tarde atque ægre confecturos; milites contra impigros, & laboriosos, qui sæpe hæc munia obeant, cito, & facile absoluturos, si leui pecunia donarentur. Retulit Dux ad suos quid Rex peteret, atque illi, quibus facultas erat, pecuniam vltro contulerunt, cæteri operam, quibus quattuor dierum spatio, quod vix credibile, mira Suecorū alacritate, ciuitas fossa, & lorica circumdata, atque propugnaculis insuper ad iustam defensionem munita: Quod tempus ne desides ij milites, qui operi non incumbebant, tererent, Rex mille quingentos Stargardiam misit, quam nocte intempesta, aggredientes, occuparunt: ex Cæsarianis nonnulli in turrim S. Ioannis, proximumque propugnaculum se receperunt, vnde strenue locum tutantes, non parum Suecos scloporum ictibus offendeabant; sed cum istos cuniculos agere obseruassent, vitæ incolumitatem pacti, cum sarcinis, & ensibus egredientes, magnam

9 farinae, pulueris sulphurei, plumbiq. copiam,
 cum aliquot tormentis reliquere. His a Rege
 peractis Bogislaus, de ijs, quæ acciderant per
 epistolam Cæsarem admonuit, qua suam de-
 fectionē excusans, oblique perstringebat eos,
 qui se tueri debebant, quique per triennium
 deuastata, statiuorum occasione, prouincia,
 irruenti postea Sueco minime restitissent, imo
 vix aggresso Rugiam, Vsedomiam, Volgastū,
 Vollinum, cæteraq. loca, quæ Pomeraniæ pro-
 pugnacula sunt, cessissent; atque armis, qui-
 bus contra hostem vtendum erat, in miseros,
 atque inermes colonos conuersis, captoq. op-
 pido Vcchermunda, quod ipse munierat,
 Vollini arcem diripuissent; Qua opportuni-
 tate Sueciæ Rex vsus, Stetinum, improuiso
 aduentu, ita obsederat, vt sibi necesse fuerit
 cum ipso transigere, si saluam ciuitatem vo-
 luisset: Excusatum igitur propter dictas causas
 se Cæsar haberet, pacemque, qua miserrimi
 populi subleuarentur, procuraret, a qua Re-
 gem non auersum significabat, cum non con-
 tra Cæsarem, aut Romanum Imperium ille
 venisset, sed vt mercaturam per mare, & mem-
 bra Imperij sibi vicina, in suo statu conserua-
 ret, ac contra iniquam vim, quam miles sub
 Cæsaris nomine, præter ipsius voluntatem, &
 rescri-

rescripta, intentabat, tueretur; commendabat
ultimo se humiliter Cæsari, atque specioso
verborum fuco, se illi addictum dicebat, dum
deficeret; pulcro illudendi genere, cum opere
offenderet, verbis demulcens; At Cæsariani ob
perfidiam Stetinenſibus irati, cum ijs, quot-
quot habere potuerunt, ultimo supplicio affli-
gentes, sæue egerunt, atque in perfidiæ pœ-
nam, totam regionem deuastarunt, omneque;
quod nancisci poterāt, pecus abigentes, aper-
ta loca defensionī inepta incenderunt; segeti-
bus quoque & frumentis igne consumptis, de-
structisque molibus, inedia Suecos affligere,
nitebantur, nullo tamen euentu aduersus be-
ne prouisos, contra omnes fortunæ casus, qui
secum necessaria ad plures menses nauium;
10 commoditate aduexerant. Erat hic rerum in
Pomerania status, cum Tyllius, qui exauctora-
to Volleſtano, copijs, cum Cæsari, tum Ca-
tholici fœderis præerat, in Magdeburgensi di-
tione hæreret, vt ciuitate illa potiretur, mul-
ctaretque, quod hostibus Cæsaris in bello Da-
nico adhæſiſſet; luebatq. ditio pœnas militi ad
libitum distributa; sed ciuitas bene munita, a
se arcebat exercitum, donec Christianus Gui-
lielmus, ex Marchionibus Brandenburgicis,
Archiepiscopatus illius vsurpator, promissum

subsidium adferret . dederat hic se in Regis Sueciæ clientelam, atque ante aliquot menses Hamburgi diuersabatur , vt cum Rege tractaret commodius ; verum cū a Cæsarianis Magdeburgenses in dies magis molestarentur , atque vix ciuitate egredi auderent , duos primates Hamburgum miserant, vt cum Christiano de ciuitatis negotijs agerent : his Christianus auditis, conclusoque cum Rege iterum fœdere, cū sex comitibus, & Succico legato, Hamburgo , per medios Cæsarianos , Magdeburgum profectus est : ingredientem mense Augusto ciues, maxima cum lætitia accurrentes, exceperunt , & per plures dies , propter ipsius aduentum , in ciuitate supplicationes habitæ : ipse eadem , qua venerat die , congregato Senatu , in verba Sueci ciues adigit , promittitque noua priuilegia , & se suis sumptibus urbem muniturum : Ad hæc publicato edicto totius Archiepiscopatus subditos ad arma vocat , religionis , & libertatis defendendæ prætextu, vt Cæsarianos spoliarent , & occiderent præcipiens, vbi possent, ipsi deinceps sibi Magdeburgi præsto essent armati . Pauci admodum erant in Magdeburgensi Diœcesi, qui Catholice Christum colerent, quapropter additis insuper iniurijs a Cæsarianis acceptis , libenter arma

arma sumpſere, atque nihil tale opinantes milites aliquot, nonnullis in locis oppreſſere: Hinc Magdeburgum confluentes, Magiſtratus bello adminiſtrando inſtitutus, colligebat, creuitque intra paucos dies accolarum numerus adeo, vt non ad defendendam ciuitatem ſolum, ſed ad exeundum in aperta ſufficere ſit viſus; quare Chriſtianus cū aliquot ſignis Halam profeſtus, Pernburgo ex itinere in fidem recepto, ſeſquialtera ante mediam noctē hora, ad portā Salanam ſe ſtitit: Halenſes antea de conſilio admoniti, accepto ſigno, eam portā, duasque alias, expeditis contra Cæſarianos armis, occuparunt, quibus apertis Chriſtianum cum milite admiſerunt. Cæſarei in arcem refugientes, hoſtium impetum declinauere, cumque arcē dedere recuſarent, Chriſtianus eos obſidere conſtituit, vt ciuitatem quiete poſſideret, deſtructiſque circa arcem aliquot ædibus, tormenta admoueri, & illam quati iuſſit. De his certior factus Tyllius, vt mature ſeditioni occurreret, in Mansfeldico comitatu copias coire mandauit, quas in Magdeburgenſes duceret, reprimeretque ipſorum audaciam, atque maxime conabatur, vt excluſum Magdeburgo Marchionem Chriſtianum deleret; ſed Magdeburgenſes penetrato con-

filio,

filio, Marchionem admonuere, qui se Tyllio
imparem cognoscens, soluta obsidione, Hala
Magdeburgum reuersus est, spe Halensibus
relicta, se cum maioribus copijs, & viribus re-
uersurum; deserta a Marchione ciuitate, ob-
sessi iterum potiti, fuga ijs dilapsis, qui Mar-
chioni fauebant; vtque si alias opus esset, me-
lius tueri se possent, ciuibus nouo pro Cæsare
iuramento obstrictis, trecentum Croatas præ-
fidij augmentum introduxere. Quamquam
ciuium pars maior Magdeburgū ad Marchio-
nem secessisset; neque inquires Marchio co-
pijs, cum Hala, tum ex alijs Archiepiscopatus
locis, auctus, continere se potuit, quin secun-
do erumperet, spoliaretque, ex improviso ag-
gressus prope Calbam tercentos fere Croatas,
qui ex arce Mauritij aliquantulam prædam
deducebant; multi ex his captiui Magdebur-
gum ducti, reliqui adscitis commilitonibus,
incensis ciuitati proximis pagis iniuriam vlti,
oppidulū Vanslebiū depopulati sunt: Mag-
deburgenses contra Mansfeldensi, & Fridber-
gensi arcibus astu interceptis, apud Ottersle-
biū aggrediuntur aliquot Cæsarianorum tur-
mas; cum vero subsidio istis magna vis equita-
tus adesset, illi in tutiora loca se recepiunt. Plu-
ribus hinc inde deinceps velitationibus actū,
modo

modo his, modo illis fauente fortuna. Tyllius vero, & Popennaimus Generalis locū tenens, Marchionis petulantiam reprimendam rati, urbem obsidione cingere, decreuerunt, ne tam facile erumpere valeret, & damnum inferre. Sedata igitur prius Halæ seditione quadam inter ciues, & milites forte oborta, vires omnes vertere, ad expugnanda circa Magdeburgum loca; atque paucorum dierum spatio Prolam, Scenebeccam, Calbam, Stasfurtium, Eglam, aliaque loca in potestatem redegere, ipsiq. Magdeburgenses suæ ciuitati consulere, & reliqua deferere satius rati, Platum, & Burchium pro derelictis habuere, milite in ciuitatem recepto: erant Magdeburgi duo sclopetariorum millia, ducentique fere equites; atque annonæ, bellicorumque apparatus magnam copiam superioribus diebus importauerant ciues, quando primū Tyllij consilium, de se obsidendis erant conspicati, videbaturq. ciuitas imminentem impetum, & obsidionem latura, si aliquis adhuc militum numerus adderetur: Quare Christianus per nunciū tribuno Bocchio, qui in comitatu Mansfeldico suo nomine milites colligebat, significauit, ut copias, quas penes se habebat, in ciuitatem duceret; Bocchius collectis clam bis mille militibus,

litibus, quorum fere octingenti equites erant, deductisq. Querfurto quinque machinis, Halam expedito itinere, quo celerius potuit contendit, cumque ad flumen Salam noctu venisset, Halensi iuuentute præmonita, quingentos milites fluuium transmittit, quibus, ciuium adminiculo, ciuitatē per mœnia clam ingressis, ipse cum reliquis apud Salanam portam inter vineas se occultat; mox illucescente die, dum illa porta aperiretur, ad datum signum arma expedita; quique portam tuebantur cæsi, atque ciues aggredientibus iuncti, Cæsareis nihil tale verentibus magnum damnum intulere: captis mille quingētis, centum quinquaginta fere ceciderunt. Bocchius liberatis, qui Halæ erant, captiuis, Senatum in vincula coniecit, qui a partibus Marchionis non ex fide stetisse accusabatur, pauciq. ex Senatoribus, & ciuibus, qui Cæsaris partes sectabantur, cum aliquot militibus, in arcem confugerunt; verum non diu felici euentu Bocchius latatus est, nam dum arcem occupare tentat, atque defendentibus extrema minatur, Popennaimum, cum magnæ militum manu aduentare, intelligit; Statiua Popennaimus Calbæ habebat, haud procul Hala, cumque ex profugis ea, quæ Halæ fiebant, cognouisset, absque mora colle-

collectum ex proximis statuis militem in hostem duxit, quem ciuitate exeuntem, plaustris, alijsque impedimentis irretitum, ad interuersionem fere deleuit, & vix Bocchius cum aliquot familiarium, trans Salam euasit; sic temeritate huius Ducis, quæ præter finem erant tentantis, subsidium amiserunt Magdeburgenses, quod non exigui momenti futurum erat, si illa obsidio durauisset; & Cæsariani opima præda potiti, eodem victoriæ ardore, Mansfeldensem, & Querfurtensem arces cepere, atque Magdeburgum, cura Volfgango Mansfeldio demandata, arctius obsedere. At ciues propugnaculis se munire, & ad omnes casus belli se accingere, cum Theodorus Falchembergius Sueci tribunus adfuit, ut bellum moderaretur, consilioque, & opere ciuitatem defenderet; inde per media Cæsarianorum castra aliquot militum turmae Magdeburgum ingressæ, tantumque Falchembergij aduentu obfessorum audacia creuit, ut erumpere sexcenti pedites, & ducenti equites, non dubitarint, qui tamen omnes a Cæsarianis capti; nam cum Hallenslebiū occupassent, occisis quinquaginta captisque centum circiter ex Cæsareis, dum asportando comineatū, & munitiones ibi inuentas detinentur, a Popennaimo intercepti, deditio-

nem fecerunt, omnesque ad vnum ad Cæsarianas partes transierunt: neque hanc solam Magdeburgenses calamitatem passi, nam paucis ante diebus oborta immanis, atque horrenda tempestas urbem deformauerat, deiectis turrium culminibus, altioribusque ædificijs. Dum Magdeburgum præteritorum pœnas, & futurorum præfagia patitur, allatae Stetinum Electorum ad Regem litteræ, ipsius secundis respondebant; excusabant omissum in primo responso Regium titulum, consuetudine, & vſu, quibus Imperij Electores neminem Regem appellant, atque ipsum dehortabantur a bello, ea diluentes, quæ se ad bellum mouere, ille asseruerat, suadentesque: vt amice, & ciuilitè controuersia, si quæ essent deciderentur; & Cæsar suam etiam epistola questus est, quod tanto cum exercitu imperium inuasisset, & bello non indicto, turbas, seditionesque excitasset, imperabatque tanquam Romano Imperio subiecto, vt ab armis desisteret; At Rex, qui non ideo scripserat, vt pacem iniret, sed vt bello prætextum quaereret, respondit quidem, sed nihil de pace; Imo insuper nouam querelam addidit, quod sibi Cæsar tanquam Romano Imperio subiecto scripsisset; cum se ne latum quidem vnguem in Imperij limitibus possidere profi-

profireretur. Bellum igitur prosequēs, ad Brandemburgicum Electorem scripsit postulans, ut secum fœdus iniret, addito, alios Germaniæ Principes, atque Ordines iam fœdere sibi iunctos esse; scilicet aperte id profiteri illum volebat, quod iam secretis pactiōibus erat amplexus; ipse admonitus Cæsarianos Ghertij munimenta excitare, ut ea videret, mense Augusto, cum septuaginta equitibus Stetino egressus, magnum discrimen subiit. Militabat Regi Quintinus quidam Germanus, equitū subcenturio, qui antea Cæsari stipendia meruerat; hic spe præmij adductus ad Contium deflexit, occasionemque Regis intercipiendi edocuit, neque neglexit consilium Contius, sed missis quingentis equitibus, Regem Stetino excludi iussit; Rex itaque Cæsarea castra scrutatus, Stetinum reuertens, proditum se sensit, & aut mori, aut se captivum tradere illum oportuisset, nisi peropportuno subsidio tres Suecicorum equitum turme, quas ipse sequi iusserat, adfuissent: gnauiter hinc inde res acta, dum illi Regem capere, isti seruare nituntur; Sueci tandem impetu facto, acceptoq. secum Rege Stetinum euasere, vbi equitum quidam Centurio proditiōis conscius, eliso gutture pœnas luit: neque ego Regem hoc in casu temeritatis excusarem,

eufarem; qui ob leuem causam in discrimen-
certum se dedit: non enim tanti intererat, si
ipse Cæsarianorum munimenta non vidisset,
qui per alium poterat tutius, & fortasse melius
eadem adnotare; sed inerat singulari Dei pro-
uidencia cæteris bellicis virtutibus aliquando
temeritatis vitium, quo caderet; nam in bel-
licis rebus nemini fidens, ipse omnia obire
munia, cuncta visitare, nullibi non adesse Go-
stadius solebat: Appulere inter hæc Stralsun-
dam duodecim naues, cum quattuor Batauor-
um militum legionibus, quæ pro Rege in
orientali Frisia conscriptæ fuerât, & Stetinum
ex Borussia duæ Suecicæ legiones venerunt. Ve-
litationum post hæc passim, dum Cæsarei Gher-
tio Stetinum versus, Sûeci hinc Ghertium ex-
currerent. Rex vero maioribus intentus, Vol-
gastum tendit, ut arcem expugnaret; sed ante-
quam eo venisset, arcis deditiorem accepit,
quæ quinquaginta dierum obsidionem, atque
octies mille bombardarum ictus tolerauerat.
Quoniam vero ex superioribus velitationibus,
& prælijs, multi hinc inde captiui abducti fue-
rant, his, atque ijs, qui in posterum caperen-
tur, redimendis, transactio inter Cæsarianos,
& Suecos, certis conditionibus pacta est, ex-
clusis Pomeranis, & Croatis, quorum primos
Cæsa-

Cæsariani tanquam rebelles, secundos Sueci, tanquam regionum vastatores, tractatui includere noluerunt. Rex vero Stetinum ad pecuniam pro bello exigendam redijt, vbi Pomeraniæ ordines, transactioni a suo Duce cum Rege factæ, apposito publico sigillo, subscribere: vrbs quinquaginta thalerorū millia intra aliquot dies se regi numeraturam sponondit, reliqua prouincia totidem, concessio insuper Regi super nauibus vectigali ternorum cum semisse pro centenis: His habitis ipse, quamuis Bogislao, cæterisque ordinibus contranitibus, qui Griffenhagam prius, & Gherthium expugnari cupierant, vt liberi molestia, Cæsarianorum viuerent, Stetino soluit, relicto cum sufficienti præsidio Hornio castrorum, præfecto, magnaue annonæ, & munitio-
 copia, nauigauitq. Megapolim versus, vt in eam prouinciam bellum inferret. Confluxerāt Gherthium omnes Cæsarianorum vires, vt Suecum Stetini opprimerent, aut morarentur saltem, ne vltius progrederetur; At Rex temere se facturum ratus, si summam rerum sorti vnus prælij committeret, cum securius, etsi cunctatius, vincere posset, decreuit, dum illi circa Stetinum tempus terent, qua ciuitate non facile erant potituri, in Megapolim vbi

rarus miles, tenuiaque præsidia, irruptionem facere; atque hoc semper moris habuit Rex, hostes suos in difficili aliquo opere implicare, ipse interea, qua nemo resistebat, excurrere.

- 12 Porro Cæsariani collationibus exigendis in-
renti, Pasbaldiam militum manum miserant,
qui illius ciuitatis primates abducerent obsi-
des, quod illa ingentem pecuniæ vim, quam
nomine decursarum contributionum repo-
scebant, se posse ob inopiam dare negauerat;
neque solum milites captiuos primates abdu-
xerunt, sed etiam ciuitatem, ablatis quæ secum
ferre poterant, expilarunt: reliqui ciues in Cæ-
sareos ob damna accepta male affecti, & ne-
vacua in posterum ciuitas militum petulan-
tiæ, arbitrioq. pateret, cum a Cæsarianis pro-
derelicta haberetur, Vechermunda Suecos
excuiuerunt, quorum duo signa præsto habue-
re; coniunctoq. cum ipsis opere, vallum circa
urbem restaurarunt: fuit in ciuitate, qui Cæ-
sarianos de ijs, quæ fierent, admoneret, mis-
sæque sunt tria militum millia, qui ciuitate,
Suecos expellerent, quod facili negotio actum,
nam cum pauci essent Sueci pro ciuitate de-
fendenda, neque possent mœnium circuitum
custodire, & necessarijs ad defensionem care-
rent, post leuem pugnam cessere, nonnulliq.

Vecche-

Veccheram flumen, quod ciuitatem allabitur, tranantes, euaserunt, reliqui caesi ad vnum sunt, fauitum deinceps in ciues promiscua caede, neque foeminis, aut impuberibus venia, sola redemptionis spes aliquot ex ditioribus in captiuitatem ductos seruauit. Nitebatur Con- tius post discessum Regis Stetinum in pote- statem redigere, atque cum ciuibus aliquot transegerat, vt cum ipse ciuitatem appropin- quaret, sibi portam, quæ Ghercium spectat, aperirent; & xvj. Calendas Octobris Ghercio cum toto exercitu Stetinum versus profectus est: At Sueci, cognito ipsius aduentu, portis sese effundunt, manus conferunt, atque sum- ma contentione duas horas præliantur est; cū- que proditione detecta ciues, qui cum Con- tio pacti erant, portam aperire vetarentur, Cæ- sariani receptui cecinere, atque iterum Gher- cium re infecta rediere: Fertur pridie eius diei, quò hoc prælium commissum est Stetini vasa sulphureo puluere plena, arciq. principis sup- posita, reperta fuisse, vnde proditionis orta, suspicio Suecos cautiore reddidit, ciuesque facinus patrare prohibuit: Cecidere eo præ- lio hinc inde plus minus mille quingenti, non- nullosq. captiuos Cæsariani abduxerunt. Rex interim felici navigatione Stralsundam appu- lerat;

lerat; exceperantque aduenientem magna,
cum lætitia ciues, ac tota clastis quinquaginta
nauibus conlans in portu confedit, quousque
13 ventus aduersus durauit. Gostauus vero non
diu Strallundæ moratus; ineunte Octobre
cum exercitu, qui sex hominum millibus con-
stabat, mouit, atque eo die Barthij castra me-
tatus, postero Damgartum petijt, ibique tur-
rim, & munimenta expugnauit: Sæue eo die
in Cæsarianos animaduersum, nam quotquot
Damgarti fuerent, aut e fenestris eiectione, aut igne
absumpti sunt, nemine reliquo, excusabantq.
Sueci hanc sæuitiam, exemplo sibi a Cæsaria-
nis Pasbaldiæ dato, ubi Suecus nemo in capti-
uitate seruatus fuerat. Post biduum circa me-
diam noctem Sueci Rebnitium circumfede-
re, illudq. corona circumdatum expugnaue-
runt, eadem, ac Damgarti in defensores sæui-
tia, soliq. tribuni, & Centuriones, redemptionis
potius spe, quam miseratione seruati. Pa-
tebat hinc in Megapolim aditus nullis arcibus
impeditus, sed Dux Sabellius cum valida equi-
tum, peditumque manu in aperto contra Re-
gem castra posuerat; Quapropter Rex, qui
prælij aleam subire detrectabat, alliciendis in-
colarum animis, edictum ad Megapolitanos,
& ad Rostochienfes præsertim promulgauit
suadens,

suadens, vt ad suorum dominorum Adolphi
 Friderici, & Io: Alberti partes redirent, quos
 vt in pristinam sedem restitueret ipse se venif-
 se dicebat, minitansq. ijs, qui secus fecissent se-
 quam persecutionem, & fore vt suorum regno-
 rum commercio prohiberet. Erat Rostochij
 Casarianorum præsidium, sed non adeo fir-
 mum, vt se posse viribus Regis, & perfidiæ ci-
 uium resistere consideret; quamobrem Dux
 Sabellius, pulcro astu recentem militem in vr-
 bē introducere conatus est; res ex voto euenit
 hoc modo; quingentos equites sub ductu Lau-
 rentij Hofschirchij protribuni urbem adequi-
 tare iussit, ac petere, vt Vilmariam ire per vr-
 bem sibi cōcederetur, vt ciuitatem illam con-
 tra Suecos custodirent; Rostochienses transi-
 tum minime negauere; hoc cauto, ne omnes
 simul, sed manipulatim transirent: Ingressus
 hoc pacto manipulus primus, in foro, vbi præs-
 idium præsto erat, se stitit, reliqui equites, ca-
 tenis repagulisq. fractis, in ciuitatem per vim
 irruperunt, instructaq. acie duobus diebus, ac
 noctibus in foro mansere, donec a ciuibus ar-
 ma in curiam allata, iuratumq. se plura non
 habere, quam tulissent; inde Casareis nuper
 ingressis hospitia in vrbe distributa, & ciuitas
 munita; occursumq. Sabellij prudentia Regis

conatibus, qui eam a ciuibus in deditionem habere sperauerat, quiq. cum se nihil proficere posse animaduerneret, inde, vt dicemus, discessit. Colligebat hoc tempore circa Hamburgum, & Lubecam pro Rege Sueciæ milites Franciscus Carolus Lauuemburgicus, ex Saxoniae Ducibus, quibus Cæsareos ad Albim distraheret, atque ideo opportuna aliquot loca, ad illud fluuium sita, Butzenburgum, Vinscenium, Lauuemburgum, & Naihusium occupauerat, maioraque moliebatur, ni opportune a Popennaimo occursum esset, nam cum hic intellexisset, quæ Lauuemburgicus tentaret, iunctis cum Rainachero tribuno, qui in Frisia orientali pro Cæsare legionem conscripserat, viribus, Razenburgum oppidum, decem Lubeca miliaribus distans, contendit, quo Lauuemburgicus cum suo milite concesserat, neque iste prius Popennaimi aduentum intellexit, quâ ille castra circa Razenburgum metaretur: Erat in arce Razenburgica Augustus, Francisci Caroli frater, qui fratris perfidiam auersatus, in fide erga Cæsarem perseuerabat, negatoque fratri in arcem ingressu, illam aduenienti Popennaimo dedit, vnde hic ad oppidum inuadendum se accingebat, cum Franciscus Carolus colloquium petijt, quod

ad horæ quadrantem concessum; at ille collo-
quij specie nauiculam conscēdens, Lubecam
aufugere nitebatur, sed Cæsariani crebra eia-
culatione fulminantes, nauicularij guberna-
toris vno ictu capite adempto, nauiculam sti-
terunt: Porro Lauemburgicus in terram re-
uertere coactus, Popennaimo certis pro salute
conditionibus se dedit, extinctumque est ex
ea parte bellum, dum apud Stetinum, & in
Megapoli flagraret, nam Cæsariani Gherrio
quotidie excurrentes Stetinum affligebant;
& Sueci Colbergam obsederant; erant vtrin-
que varij conatus, dum illi Stetinum in pote-
statem redigere, & Colbergam tueri, isti hanc
occupare, illud defendere conarentur; atque
inter alia Cæsarianorum Colbergam missum
subsidium, cum a Suecis prohiberetur, Steti-
num prope excurrit, vnde, quamuis hoste
strenue repugnante, ingentem pecoris vim
15 abduxit. Intellectis interim Regis in Mega-
poli progressibus Contius, vt pluribus oppor-
tune prouideret, Sabellium Ducem cum But-
lero, & Aydone tribunis, Hofschirchio, ac
Aloysio Gonzaga protribunis, alijsque Offi-
cialibus, ac bis mille & quingentis delectis pe-
ditibus, atque mille sexcentis equitibus misit,
qui Regis progressus sisteret. Sabellius Regem

apud Rebnitium affecutus, quamuis militum numero impar, contra ipsum castra posuit, ac viginti duos dies detinuit, quousque ille relicto Rebnitij, cum suarum copiarum parte, Bannero discessit; tum quoque Sabellius cum ab ea parte impetum auertisset, Deminum reuersus est. Hæc circa Octobris finem gesta, atque ineunte Nouembri, Ghertio tria peditum, & duo equitum millia Colbergam, sub ductu Coloredi, a Contio missa, vt obsidionem illius soluerent, Suecosque ex Borussia aduentantes, impedirent: ipse quoniam sine equitatu remanserat, Sabellium cum equitatu Demino acciuit, suisque addidit copijs: neque hostes fugit Cæsarianorum, de ferendo Colbergæ subsidio, cōsiliū, quapropter Hornius cum mille quingentis peditibus, & mille equitibus Stetino profectus, cum Baudisio tribuno, & cæteris, qui ex Borussia veniebant, se coniunxit; adortusque est Cæsareos inter Stargardiam, & Sciffelpenium: acriter vtrinque vsque ad noctem res acta, qua superueniente, Cæsariani ferre subsidium obsesse vrbis se haud posse conspicati, Trombergam in Marchiam diuerterunt, Sueci vero Graiffembergam; vbi suum Regem habuerunt obuium, qui rebus Megapolitanis Bannero præposito, Stetinum

reuer-

reuertebatur, vt subsidium Colbergæ impedi-
ret, ac cum ipso Sterinum in castra rediere;
Cui ciuitati in inferiori suburbio ad Viadrum
exortum custodum negligentia incendium,
non parum attulit damni, cōbustis supra cen-
tum ædibus, atque habitatoribus consumptis.

- 16 Sed dum terrestribus armis agebatur, mariti-
ma non desistebant, Suecicis nauibus totam
(Balthici maris oram, quæ ad Pomeraniam, &
Megapolim attinet, excurrentibus; Quam-
quam ex Vismariensi portu nonnullæ Cæsa-
rianorum aliquando erumperent, proximaq.
loca tuerentur: euenitq. vt earum prætoria,
tempestatis vi a cæteris disiecta, in plures Sue-
cicas incideret, a quibus post longum cōfli-
ctum ad portum Trauemundanum impulsæ,
vadis allisit, vbi aliquandiu a Suecis obsessa, a
Lubecensibus tandem auxilium habuit, om-
niaque quæ in ea erant Lubecam asportata.
Mouit hoc Lubecensium facinus Regem, vt
ad ipsos litteras mitteret, & doleret, quod suo
hosti opem ferrent, dum ipse Germanicæ liber-
tatem quæreret, sibiq. milites in ciuitate col-
ligere (quod Lubecenses antea vetarant) dene-
garent, patriæ libertati militaturos: horum
non Lubecenses in communi arguebat, sed
quosdam, qui male erga se affecti, Cæsaris par-
tes

tes adhuc sectarentur, hisque minabatur, cæteros beneuole admonebat, vt sibi fauerent; diuiseratque causam quærelæ, vt ciues inuicem male fidos redderet, atque in partes distraheret, vnde facilius sibi ciuitatis occupatio esset; nihil enim ciuitates, aut Respublicas adeo debilitat, hostiue aditū aperit, vt ciuium discordia, nam dūm hi parum inter se consentiunt, quæ Reipublicæ in commune bonum ratio haberi potest? Exeunte hoc anno, publico accessu Electoris Brandenburgici Sueco vires auctæ. Leuir hic Regis inter cæteros excitatores potissimus fuerat, vt ille in Germaniam ingrederetur, & contra Cæsarem arma caperet, nouitatis cupiditate, quod a Cæsareo milite premeretur, aut perfidia; An fortasse fore rebatur, vt sororis fortuna frueretur; Prætextus fuerat cum Collegis, vt diximus, religionis reformatæ superstitio, & ne Cæsaris filius Romanorum Rex eligeretur: sed hæcenus præsentem Cæsaris potentiam veritus, inter abdita sensibus condiderat, cui parti adhæsurus esset, Cæsarem inani spe, Regem promissis detinens; ac tandem habitis, quas memorauimus, a Rege litteris, iamque ipsius felicia adhuc arma proxima sentiens, cum ambagibus vltius locus non daretur, mentem suam

quadan-

quadantenus patefecit, datoq. ad subditos mādato, cauit, ne a Cæsarianis prædam abduci, contributionesve exigì paterentur, milites vero Cæsaris, qui intra suos limites manerent, minime molestarent: atque hæc quidem anticipiti mandato, quo duceretur, inclinaturò; cæterum suam fidem Regi obstrinxit, se ad ea promptum fore, quæ ipse mandaret, & communem causam minime deserturum. Hæc primo anno Suecici belli gesta, quorum partem cum Cæsar intellexisset, veritus, ne in peius ruerent, sub quinto idus Nouembris Ratisbonæ, vbi adhuc comitiorum causa hærebat, mandatum edidit, nouas de contributionibus, & militibus, in Imperio obseruandas præscribens leges; non enim ipsum fallebat, qua fama in vulgus distraheretur, ob militum petulantiam; nam in Germania increbuerat rumor, non sponte militum, sed superiorum iussu ea in populos exerceri, quæ exercebantur; Quo enim pacto fieri posse, aiebant, vt Principum querelas, de militaribus iniurijs, toties repetitas, Cæsar inultas reliquisset, ni ipse illos ita se gerere iussisset? vt igitur hanc calumniam a se Cæsar arceret, de iustitia, necessitateq. belli aduersus Suecum aliqua præfatus, certa militibus stipendia, eo edicto constituit,

stituit, ab ordinibus, iisque, qui statua præbituri erant, eroganda, vltimiq. supplicij comminatione cauit, nequis vltra constitutum exposceret; Ad hæc novos vbiq. delectus instituit, & Tyllio, quem Catholici fœderis generalem armorum præfectum, suis quoque exercitibus præfecerat, mandata dedit, de nouo milite colligendo; atque quoniam cum Galliarum Rege pacem inierat, vt in Suecicum bellum omnes vires intenderet, reliquias sui exercitus, ex Italia reuocauit. Post Mantuæ desolationem, incendiaque, ac vastationes feracioris Italiæ partis, Germanicus exercitus, qui Rambaldo comite Collaltensi duce in Italiam venerat, in Mediolanensem Ducatum in statua secesserat, vbi pestem vltimum diuinæ iræ flagellum, post clades & famem, omniaque aduersa, ob patrata facinora, & sacrilegia, experiebatur; atque Rambaldo dum ad triumphum Italicæ deuastationis in Germaniam pergît, in ignobili vico, immatura morte, extincto, Aldringhero Generalis locum teneti parebat. Exigeret fortasse locus, vt miserandam Mantuæ desolationem deplorarem, ni alios hanc Prouinciã melius administraturos præscirem, atque institutum non esset, bello Suecico solum gesta percurrere;

hoc

hoc vnum mihi præter institutum dicere liceat; rationi congruum non videri, tantæ cladis authorem Cæsarem extitisse, qui innumera pietatis exempla posteris est relicturus; adeoque Mantuana coniux, quæ patriæ amans, virum in tam honesta causa dilectissimæ uxori obsequuturū, adeo ultra limites sæuire passa non esset; & crediderim nonnullos exercitus illius procures, Lutheri veneno infectos, mandatorum metas, odio illibate in Italia Catholicæ religionis, Italicique nominis, prætergressos; aut auaritia, ad impia ea facinora impulit, quæ vidimus; aut fato, quo Germanorum inuasionem Italiæ exitiales sunt, hæc euenire: quomocunque hoc fuerit, quasi suam Deus iniuriam vlciscebatur, & cladibus, incendijs, morbisque vix tertia exercitus pars reliqua, statiuā in Mediolanensi Ducatu habebat, cum Cæsar in Germaniam contra Suecum reuocauit; datumq. Aldringhero reducendi negotium. Præter hæc Catholici fœderis Principes, Colonienſis, Treuerienſis, Moguntinus, Bauarus, Lotharinghus, & reliqui Germaniæ Catholici, omnibus viribus assistendum Cæsari decreuerunt, verentesque ne Euangelicorum (ita Lutherani falso se appellant) cum quibus sibi erant continuæ ob religionem, aliasq.

causas, controuersia, vires augeretur nimium,
 principijs opportune obuiam ire statuerunt;
 & pœnituit aliquos, si qui fortasse primis, de
 Rege laceffendo, consilijs adhæferant, in-
 ceptu, cum non Cæsarem opprimi, sed ipsius
 potentiam retundi, peculiari Principum desi-
 derio, qui semper alios potentiores fieri ægre
 ferunt, cupiuisent; Atque ideo milites in sua
 quisque ditione conscribere cœpit, quos Cæ-
 sarianis adiungeret, communemque religio-
 nem tueretur: Nam Protestantes hoc pro
 religione, libertateque conscientia,
 bellum fieri iactabant: Hæc fu-
 turi belli fundamenta ia-
 ciebantur cum annus

a. Christo nato

MDCXXX.

elapsus

est.

75

COMMENTARIORVM

DE BELLO SVECICO

LIBER SECVNDVS.

Breuiarium Libri .

1 *Suecorum militaris disciplina . Griffinhagam Gostaus, & Gbertium capit . Casariani Francofurtum ad Viadrum se recipiunt .*

2 *Tyllius Francofurtū, & Lanßbergā munit . Rex ex noua Marchia in Pomeraniam regreditur , pluribusq. locis potitur .*

3 *Tyllius Regem in Megapolim sequitur , qui Stetini comitijs ordinum Pomerania interist ,*

4 *Colberga deditur Suecis . Tyllius ad Magdeburgum iterum obsidendum mouet .*

5 *Gostaus Stetini parat naues & milites ; Albi duos pontes imponit , Francofurtum, & Lanßbergam expugnat , Protestantibus Lipsia congregatis scribit .*

6 *Protestantes Lipsia comitia habent , quibus bellum in Casarem decernitur .*

7 *Rex auxilium Magdeburgēsisbus praparat ; Vetus Brandenburgum occupat ; ab Electore Brandenburgico Spandauiam habet , a Saxonico nihil impetrat .*

8 *Obsidio , & expugnatio Magdeburgi ; Eius ciuitatis origo , augmentum , & descriptio .*

9 *Casar milites undique colligit , quod facit & Rex . Finitimorum Principum , dum hac gererentur , consilia .*

10 *Gostaus Brandenburgico irascitur , Stetinum proficiscitur , Grysbaldiam in ditionem accipit .*

11 *Duces Megapolitani Megapolim inuadunt , omnemque occupant , præter tres solas ciuitates .*

12 *Rex in nouam Marchiam regreditur , Popennaimum frustra opprimere nititur , Verbena , Tanghermunda , & Hauerberga potitur .*

13 *Tyllius Regi occurrit : Casarei equitatus pars in flatiuis caditur : Rex pralium detrectat .*

14 Tyllius a Rege discedit. Comiti Fyrstembergio iungitur; Negantis auxilium Saxonis regionem inuadit.

15 Saxo cum Rege suas copias coniungit, & contra Tyl-
lium ambo tendunt.

16 Tyllius capta Lipsia aduentare hostem intelligit; contra
ipsum ducit; Lipsensis clades.

17 Rex plures subigit ciuitates, & ditiones, in Franconiam
tendit; ipsius uxor ex Suecia, & Hamiltonius ex Anglia cum
classibus, & exercitibus adueniunt.

18 Aldringberus sistere Regis progressus nequicquam niti-
tur. Rex Herbipolim, aliaq. loca in potestatem redigit.

19 Saxo Boëmiam intrat, multas ciuitates, & inter alias
Pragam in deditionem accipit.

20 Megapolitani Duces suam totam ditionem recuperant.
Popennaimi conatus.

Gesta hæc anno M DC XXXI.



Sequentis anni sæua hyems
bellum non distulit, Ger-
manix frigora aspernanti-
bus Suecis, qui frigidiori
cælo assueti Germanici,
quamuis intèssissimam, in-
tèperiem minime sentie-
bant; iactabatque Rex, naturæ suorum gna-
rus, se plus hyeme, quam æstate præstiturum,
atque ideo suas copias nunquam in hyberna-
deduxit, sed semper in castris detinuit. At cum
pernoctare sub dio militibus aliquando opus
esset, vt cõmodius hoc, & alia munia obirent,
magnum pellicearum vestium numerum ex
Lappo-

Lapponia ferri curauerat, quibus milites te-
 rentur, frigusque arcerent: Inde vt populo-
 rum animos ad suas partes attraheret, quod
 non parum ad summam rerum spectare cre-
 debat, seuero edicto cohibuit militum licen-
 tiam, ne quid comburerent cauens, aut plus
 extorquerent, quam constitutum esset, mul-
 taque addidit, ne populis milites essent gra-
 ues; & hoc non solum ad alliciendos incola-
 rum animos fecit, sed ad milites in officio, &
 militari disciplina continendos, si enim regio-
 nem militum arbitrio concessisset, expilatis
 domibus, herisq. spoliatis omnia secum aspor-
 tassent, vnde impedimenta exercitui, militiq.
 ex disciplina ad voluptates, & luxus transitus:
 incolæque irritati, qui iam sibi aut adheferant,
 aut cesserant, descuiissent; reliqui magis resti-
 tissent. Rex vtrumque inconueniens vno,
 eodemque edicto effugit, hocq. insuper con-
 sequutus est, vt miles in Germania, eadem
 cum seueritate militarit, qua in Borussia, ali-
 bique, vbi huic Regi stipendia mēruerat. Mi-
 ram Gostauus militiæ disciplinam seruabat,
 seueramq. & exemplarem, dum milites mol-
 litie, otioq. marcescere minime pateretur, sed
 continuis, moderatis tamen, laboribus exerce-
 ret, ratus immodicā mollitiem nihilo magnis
 facino-

facinoribus aptiorem esse, quam dementiam, & fieri non posse, ut is qui luxui, & mollitiei indulget, viro aliquid dignum vel consulat, vel agat. Exercebat igitur semper militem aut prælijs, aut militari alio munere, ne per desidiam mollesceret; quapropter indefessum laboribus, prælijs fortem, imperterritum periculis habuit; Atque hæc eadem fuit veterum in militares viros seueritas, cum arbitrarentur hominem, dum vitam commodam voluptuosamque duceret, illam magni pendere, ideoque vitare pericula; dum exercitam & laboriosam, floccifacere, & pericula cupere, vel ipso vitæ fastidio: Additur naturalis ratio, nam dum quis cibo repletus, aut voluptatibus immersus est, crassescentibus humoribus, pigrescit, & decora torpentis ingenio non curat, id decorum existimans, quod sine periculo, aut labore voluptuosum est; Cum luxu vero caret, decora, tanquam quæ luxum parent, si alia ratione non moueatur, etiam cum maximo discrimine quærit. Sequebatur exercitam militum vitam, ordinum prudens dispositio, qua cum aciem instrueret Rex utebatur; ita enim aciem muniebat, ut in arcis modum milites pro mœnibus starent; erant in acie propugnacula, cortinæ, ut vocant, cæteraque, quæ nostrorum

tempo-

temporum militaris Architectonice ad muniendas arces inuenit, quæque in plano posita figura patitur; Neque poterat aliquis partem ullam aciei aggredi, quin a fronte, & ab utroque latere scloporum ictibus offenderetur; Equitatu insuper vndiq. sepiebat, qui ad congressum cogi non poterat, cum a pedite mira ordinum dispositione tegeretur, his tormentorum inauditus vsus accesserat, quæ ita disponebantur, vt defenderent, & læderent, ipsa ab hostium impressionibus tuta essent; Quibus vtentem artibus mortuum quidē diuinā prouidentia vidimus, at non acie fustum, aut vctum. Addiderat militari continentia, & disciplinæ religionem (si ita licet hæreticorum impietatem appellare) animorum moderatricē, & inter consentientes amoris nexum, inter discordes odiorum matrem; Nam singulis legionibus aderat Lutherani dogmatis prædicans, qui animi passionibus, secundum eius gentis errorem, mederetur, & quotidianis cōcionibus vitia reprehenderet, curaretq. vt singulis diebus binæ saltem ad Deum preces haberentur, quas vnaquæque legio in aciem disposita per rhythmos, vernacula lingua, quasi hymnum concineret; tantumque ardoris ex his prædicantibus milites imbiberant, vt propter

pter Lutheri insanum dogma, vitam, omniaque
spernerent. Nempe Lutherus impia, captio-
saque arte populos illos deluserat, eorumque
animos sibi deuinxerat, dum pleraque conce-
dit, quæ cupiuerant, cælum promittens, si con-
stanter fortiterque in sua superstitione vixissent;
quapropter, cum a prædicantibus Lutherus,
eiisque præcepta semper ob oculos poneren-
tur, non ad prælium solum milites, sed ad mor-
tem ipsam imperterriti accessissent. Hæc ita
disposita superiorum cura conseruabat, dum
& ipsi eadem cum seueritate vitam trahentes,
docerent exemplo, & super milites inuigila-
rent. Erat in exercitu superiorum maximus
numerus, nam post Regem, & ipsius vices ge-
rentem, binis, aut ternis legionibus Campima-
resciallus, vt vocant, seu castrorum præfectus
vnus præerat, vnusque generalis ordinum du-
ctor; singulæ legiones suo Tribuno parebant,
atque præter hunc, ipsius vicarium, & legionis
ordinum ductorem habebant; Inde vnaquæ-
que in cohortes partiebatur, quibus singulis
suus aderat Centurio, Locumtenens, Vexilli-
fer, ordinum Ductor, Decuriones, & quinis
militibus præfectus exercitator miles; cæteri
a tot superioribus ordinatim exerciti, & edo-
cti, etiam si ordines turbarentur, suum agno-
scebant,

ſcebant, & adibant locum, quamvis minime admonerentur. Tali cum exercitu Goſtauus ſuperiori anno, ea fecerat, quæ narrauimus, & potiffimas Pomeraniæ ciuitates in poteſtatem redegerat; cumque in hybernis hyemale tempus minime terere decreuiſſet, vt Stetinum a Cæſarianorum moleſtijs liberaret, qui ipſum, dum Griffenhagam, & Ghertium haberent, quaſi obſidebant, duo hæc loca in primis expugnare conſtituit, præſertim cum id a Bogiſlao, & Pomeraniæ ordinibus enixe poſtularetur. Principio itaque menſis Ianuarij luſtrato Stetini exercitui ſtipendia dedit; inde Dammu, quod trans Viadrum e regione Stetini ſitum eſt, duodecim peditum legiones, & octoginta quinque equitum turmas deduxit, iuſſitq. adferri ſeptuaginta maiora tormenta, cum minorum machinarum, ligonum, aliorumq. militarium apparatusum magna copia. Cum hoc apparatu Dammo Griffenhagam petijt, maioribus tormentis aduerſo flumine nauibus aduectis; atque ita poſtridie eius diei, quo Dammo diſceſſerat, extructis munimentis, diſpoſitisque machinis, Griffenhagam omni vi quaterere cœpit, brèuiq. temporis ſpatio maxima in mœnibus ruina facta eſt; qua viſa Cæſariani, quorum fere bis mille & quingenti

in eo oppido erant, ab aduersa parte exeuntes Suecis vacuum oppidum reliquere: multi tamen cæsi sunt, & capti, atque inter alios Ferdinandus. Capua eius oppidi præfectus, postquam strenue fortiterque se defenderat, in hostium potestatem venit, pedem & humeros plumbea glande traiectus, quibus deinceps vulneribus ad immaturâ mortem Stetini actus est: Præter hunc nonnulli, etiam alij proceres, captis reliqui Ghercium confugere. Exercitus, qui in Pomerania pro Cæsare erat, Torquato Contio vt diximus, parebat, verum cum hic aduersa valetudine, nempe altero crure apostemate debilitato, in Italiam renocatus esset, eiusdê exercitus Annibali Comiti Sciamburgico a Tyllio demandata fuerat cura; isque tunc temporis Ghercij, vbi præcipua erant stationes, diuersabatur, cum instare Regem ab ijs, qui Griffenhaga aufugerant, allatum est. Munierat Contius non Ghercium solum, sed opere cornuto Viadrum transmiserat, ibique munimenta extruxerat, contra hostilem vim, si aduisset, defensurus. Sciamburgicus vero illud tutari se posse diffidens, diducto Ghercium præsidio, incensoque ponte, quo munimentum oppido coniungebatur, vacuum illud hosti deseruit. Putabat Rex, qui post

captam

captam Griffenhagam, distributo in vtraque Viadri ripa exercitu, victoriam sequebatur, Cæsarianos adhuc munimento inesse, ideoque Baudisium tribunum, exploratum misit; accessit cum decem equitibus Baudisius, compertoque nullum defensorem adesse, Regi id nunciauit, qui præsidio tormentisq. locis impositis, inde Ghertium quætere cœpit: Neque diu Sciamburgicus restitit, cum omnem exercitum accessisse obseruasset, locumque non satis idoneum ad tantum impetum sustinendum cognosceret; quare consumptis igne comitatibus, effusisque vino ac ceruisia in cellarijs, tormenta, & quicquid erat bellici apparatus, ne hosti vsui essent, in flumen demersit; inde suppositis ignibus oppidum incendit, ipseque cum ijs, quas penes se habebat, copijs, Francofurtum ad Viadrum magnis itineribus se recepit; exercitus reliquus, qui in adiacentibus pagis statiuâ habebat, magnum discrimen subiit, dum retrocederet acriter insequentibus Suecis; vnde impedimentorum maior pars amissa, copiarum tamen integrarum partim Francofurtum, partim Lanspergam concessere, ad eâ usque loca, quæ Ghertio supra centum decem miliaria distant, a Suecis acti. Atque hoc pacto tota Borussia, Pomerania, ac noua Marchia:

ad Viadrum vsque & Bartham fluuios Suecis cessere, egregiam operam nauantibus incolis, qui cum ipsis arma coniunxerant, cum ob communem superstitionem, tum quod Cæsarianos oderant, qui se male præteritis temporibus exceperant; & Stetinenses ea molestia, liberati sunt, qua a Cæsarianis Ghertio, & Grifsenhaga afficiebātur. At Sciamburgicus postquam Francofurtum peruenit, recolligere vires, & lustrare suas copias cœpit, cumq. compariisset se Francofurti, & Lanspergæ supra duodecim millia militum non habere, carere commeatibus, munitionibus, & tormentis, atque a Crattio tribuno, quem Lanspergæ præfecerat, moneretur, oppidum illud ex vna parte ab hoste iam obsideri, nec sperandum, ut defendi posset, nisi subsidium cum tormentis, & munitionibus adesset, ad Tyllium, qui adhuc apud Magdeburgum hærebat, de rerum statu scripsit, petens, ut aut ipse cum exercitu veniret, aut subsidium mitteret sufficiens, quo hosti in aperto resistere, atque Lanspergam obsidione liberare posset; si enim hæc in hostium manus veniret, nullam esse defendendi Francofurti spem assererat, excluso omnibus vijs subsidio, & commeatu, exterritisque ab aduersis prælijs, & frigore debilitatis militibus.

bus. Hæc ubi Tyllius accepit, hostem ea parte prohibere constituit, ne a prospera fortuna famam, atque inde (nam quo se fortuna etiam fauor hominum inclinatur) vires acquireret; ideoque cum tribus peditum, & vna equitum legionibus Magdeburgo Francofurtum castra mouit, inde Lanspergam, quæ hosti tunc magis erat obnoxia, lustratum petijt; eoque oppido satis pro tempore munito, Francofurtum in castra redijt, atque illud muniri, commeatibus, atque militari apparatu repleti iussit, vt hostium impetum remorari posset: multa, insuper circa militum disciplinam, iam admodum corruptam, correxit; vtq. commeatum, mitionum, & tormentorum maior adesset copia, eiusmodi apparatus vndique afferri iussit, cum ex propinquis locis, tum ex Silesia, Boëmia, & Morauia, præter modum eius ciuitatis seruandæ cupidus, quam non parum ad summam rerum facere credebat, si cōtra Suecos defendi posset, tanquam, si ipsorum impetum retudisset, edoctrum, Suecos non inuincibiles, cuiusmodi se esse iactabant, atque ipsis posse resisti; inde mutua accepta a Collybistis pecunia exercitui emerita stipendia numerauit, vt miles in officio contineretur. Rex interim suas copias in noua Marchia contraxerat, dilataue-

taueratq. statua militum trans Viadrum, qua
Berlinum situm est, vt fere Vittebergam vsque
excurrerent. Nostri Lanspergæ, Francofurti,
Fyrstembaldiæ, atque alijs in locis, quæ cir-
cumiacent, castra habebant: Ac dum Beerbal-
dæ in suis statuiis Rex hisce rebus intētus age-
ret, cum Hercule Charnacæo Regis Christia-
nissimi Legato, qui ad interponendam sui Re-
gis authoritatem in pace Suecopolonica ve-
nerat, conuentionem ad quinquennium no-
mine dicti Regis iniit, pro communibus ami-
cis tuendis, securitate commerciorum conser-
uanda, & restituendis (vt asseriebant) in pristi-
nam libertatē Imperij ordinibus; ad quæ præ-
standa ipse triginta peditum, & sex equitum
millia alere suis sumptibus tenebatur; Gallia-
rum vero Rex aliquot centena thalerorū mil-
lia numerauit, hoc cauto ne Catholicis aliquid
detrimenti fieret; atque hæc omnia sine Ca-
tholicæ religionis præiudicio essent, quam in-
tactam vbique locorum, in quibus inuenire-
tur, conseruari Gallus volebat. Addidit insu-
per hic; vt cum Duce Bauariæ, & Catholicis
fœderatis Germaniæ, si non amicitia, ad mi-
nimum neutralitas toleretur, ni ipsi pro Au-
striacis armâ sumpsissent; atque hostiliter se-
gessissent. Sic Sueco in dies accrescebant vi-
res,

res, iamque palam Galliarum, & Angliæ Reges, Confœderatorum in Belgio ordines, Dux Pomeraniæ, atque Elector Brandenburgicus partibus accesserant, crescebatq. incendium, quod facili negotio extinguere potuerat, si opportune, debiteq. remedium adhibitum fuisset. Quid enim, si cum exercitus, exauctore Vollestaïno, dimissus est, illæ copiæ in Pomeraniam ductæ fuissent? Non Bogislaus defecisset, non Gostauius tantum in Germaniam penetrasset, & cæteri cunctatius, aut nunquam in partes secessissent: sed quæ vilipenduntur aliquando mirum in modum nocent, & neglecta parua scintilla magnum sæpe excitauit incendium; videmusque in nostro corpore, quod ad Rempublicam similitudinem quandam habet, cum in aliquam partem malus humor fluit, ni purgetur, eo natura cæteros malos quoque congeri, inde bonos corrumpi, atque totum infici corpus. Verum enimvero Sueci ante Tyllij aduentum aliquot loca occupauerant, per quæ aditus in Pomeraniam patebat, omnesque vires intenderant, vt Lansperga potirentur, ideoq. munimentum, quod prope eam ciuitatem supra montem Cæsariani excitauerant, summa alacritate oppugnabant, non minori virtute defendentibus Cæsareis, sed

cum

cum Sueci acriter insisterent, munimentum expugnatum est, vnde vsque Lanspergam excurrentibus Suecis aditus patebat; atque quotidie varijs successibus velitabatur, cum Tylilius, vt diximus, subsidio adfuit; cuius aduentum cum Gostauus sensit, se ea ex parte non ulterius posse progredi ratus, nisi prælium cum toto exercitu committeret, quod sibi temerarium videbatur, aliam inuadere partem solitis artibus decreuit; Imposito itaque nouæ Marchiæ tributo, relictoq. cum octo millibus militum, & magno incolarum numero, quibus arma dederat, fidebarque ob communem hæresim, Hornio, qui tributum exigeret, occupataq. loca defenderet, Ghertium muniri iussit, vt ex ea quoque parte Cæsariani ingressu in Pomeraniam prohiberentur. Ex incendio, quod antequam abiret Sciamburgicus Ghertij excitauerat, vix triginta supererāt domus illæsa cum templo, reliquæ ex oppido non exiguo igne consumptæ fuerant, mœnia tamen intacta remanserant; sed cum comperisset Rex a Cæsarianis cuniculos sub oppido fuisse excauatos, præsidium imponere distulerat, & quosdam solum collocauerat milites, qui excubias agerent; nunc vero cum exercitum ex Pomerania deducere in animo haberet,

ret, oppidum illud munire, præsidiumq. imponere operæprecium duxit, ne eo Cæsariani potirentur, atque Stetinenſes iterum moleſtarent. His ita diſpoſitis cum ſedecim militum millibus ex noua Marchia in Pomeraniam, & Stetinum retroceſſit. Non adhuc Stetinenſes munitionem ad eum ſtatum perduxerant, ad quem Rex voluiſſet, ideoque operis præfectum, & nonnullos alios in vincula duci iuſſit, exemplo aliorum; neque excuſauit frigoris ſæuitia, qua' homines ab opere auellébantur, quodque multi dum glaciem frangerent obruti, aut ſubmerſi eſſent, & humus ipſa frigore indurata ligoni non cederet; aſſeuerante Rege fruſtra excuſari, quæ neceſſario faciendæ ſunt, & quo ea magis ſunt ardua, eo plus intendere vires oportere, cum homo id ſolum non faciat, quod nolit; Inde aliquot dierum ſpatio viſis omnibus, quæ erat neceſſe, ad nouum Brandenburgum caſtra, promouit, quo facili negotio in deditiõnem accepto, eodem ardore Clempenauiam, Treptouium, & Loitium parua oppida occupauit, parum deſinentibus Cæſareis, qui non bene munita loca ægre defendere poterant; poſt hæc Malchino ſine pugna potitus, Deminum obſedit; ac poſt octo dierum obſidionem,

quos vastandæ regioni, & se muniendo impendit, octauo demum Calendas Martij expugnationem instituit. Tenebat Deminum Dux Sabellius cum mille quingentis militibus, muniueratq. se ab ea parte, qua locus erat debilior, quantum tempus, geluque concretum solum patiebantur; ac primum Suecorum conatus repulit, strenueque sese defendit, quamuis acerrime oppugnaretur, donec munita turris, quæ ab altera parte quadringentis ferme passibus oppido procul ab Holchianæ legionis Centurione, cum aliquot militibus & tormentis tenebatur, prodente eodem Centurione, Regi deditionem fecit, tum Rex relicta, quam oppugnabat, parte, prope turrim ductis tormentis, superataq. palude, quæ inter turrim & oppidum erat, ac tum congelata tormentorum pondus sustinebat, murum oppidi, nudum munimentis, ac simplicem, quater ecepit. quamobrem Sabellius, qui seruare milites in mandatis habuerat, quarto ab incepta expugnatione die, decoris conditionibus cum Rege transegit, deductisque duobus tormentis, vexillis, armis, & impedimentis, sonantibus tympanis in Megapolim profectus est; & Gostauus eius ciuitatis possessionem magni pendens, validum præsidium imposuit iubens
cam

eam mœnium partem refici, quam tormentis
 quassauerat, præfectoq. vrbi Bannerō, & reli-
 quo exercitu in præsidia distributo, Stetinum
 3 reuersus est. At hercule Tyllius postquam Re-
 gem in noua Marchia assequi non potuit, in-
 tellexitque in Megapolim discessisse, relicto
 Francofurti, atque Lanspergæ sufficienti præ-
 sidio, post illum castra mouit: constabat Tyllij
 exercitus viginti militum millibus, trahebatq.
 secum viginti sex tormenta, quo cum appa-
 ratu vetus Brandenburgum, & Rappinum pe-
 tijt, inde expugnata Felsperga, cæsifq. ad vnum
 defensoribus, qui deditionem facere nolue-
 rant, nouum Brandenburgū obsedit: Præerat
 ciuitati Cniphufanus tribunus Suecus, inerātq.
 duo militum millia, præsidium satis firmum,
 ni Tyllius tam acriter oppugnasset, nam hic
 simulac ad ciuitatem accessit illam tormentis
 quati, & corona circumdari iussit, atque breui
 temporis spatio aperta iētibus mœnia milites
 subiere, ac etiam si bis terue a defensoribus re-
 pellerētur, denique tamen per vim irruperūt.
 Cecidere gnauiter pugnantes defensores fere
 omnes, & Cniphufanus cum vxore, tribus filia-
 bus, centurionibus quibusdam, ac sexaginta,
 fere gregarijs militibus in Cæsarianorum ma-
 nus viuis peruenit. Ciuitas a Cæsareis prorsus

deuastata est, ex quibus ducenti circiter desiderati. Antequam Brandenburgum in Tyllij potestatem veniret, Gostauus post occupatum Deminum, inter hoc, & Treptouium posuerat castra, vt nostrorum conatibus resisteret, non ignarus fore, vt sua illi vestigia sequerentur, atque ipse interim cum Pomeraniae ordinum comitia tunc temporis Stetini haberentur, petereturq. a se, vt ex Pomerania praesidia deduceret, quo prouincia subleuaretur, Stetini ijs comitijs assistebat, metuens, ne eadem leuitate, qua populi illi ad se defecerant, ad Caesarem, proximumq. ipsius exercitum redirent: Ordinibus igitur, Duceq. coram honorifica de se, suaq. expeditione praefatus, religionemq. & libertatem obtinens, quarum causa se venisse assererat, de praesenti rerum statu disseruit; instare ferocem saeuumq. hostem, qui si indefensam Pomeraniam nancisceretur, nullum saeuitiae genus esset omittitur, contra illam prouinciam, quae primo arma in Caesarem sumpserat, atque eo acriorem futuram ultionem, quod exemplum caeteris erat praestitura; neque haec, quae modo a me petitis (aiebat Rex) ab ijs proponuntur, qui quietem cupiunt, sed a publicae pacis osoribus, qui quietis specie cuncta miscere in animo habent.

Quid

Quid enim si ex hac ego prouincia exercitum deducam, hostisque quoquo modo succedat? Anne militum molestia liberabimini prima, Romani Imperij contra me futuri propugnacula? Succedet Sueco Cæsareus miles, quorum si hic vobis carior, cur me ita lubentes aduocastis, recepistis? Quod si me recepisse pœniteat, pœnitentię satisfactorius causam peto; si noua cupitis, vestram leuitatem doleo, misereorque, quod noua veteribus in Republica peiora esse nescitis; nam dum aliquis a proprio ad extraneum Principem deficit, proprium iniuria inimicum sibi, alterum beneficio amicum reddit; si ab extraneo postea ad proprium redit, hunc veteris iniurię ultorem, illum recentis memorem, atque ambo inimicos habebit. Præstat leuitati constantia, atque in eo permanere statu, quem quis aliquando sibi elegerit, quam continuis mutationibus agitari. Sed quæ modo proponitis, mitius interpretari placet; scilicet meam potentiam, victoriasque, libertatis studiosi, vere mini, quasi dum meis armis vobis adsum & faueo, libertati vestræ aliquid detrahā; cur militem igitur non conscribitis, priusquam exercitum meum deduco, quo prouinciam hanc vestram ipsi defendere possitis, atq. ego in maiore nostræ

stræ religionis, Germanicæq. libertatis vtilitatem ad vltiora pergam? neque velim putaretis, auaritiam, aut in vestris oris regnandi libidinē, me ex meo Regno euocasse, cui abundantes diuitiæ, latæq. prouinciæ patent; me religionis zelus, vestræ libertatis desiderium, vestræ preces euocarunt: Hæc ideo dixi, vt ea, quæ armis assero, verbis quoque tuear, & ne mihi aliquando tacuisse imputetur; vos quibus ita placet, quæ petitis habeatis. His verbis minabundus orando finem fecit, quasi militem ex Pomerania deducturus, & Cæsarianis ad libitum prouinciã relicturus; neque Bogislaus iratum, aut iram simulantem detinere precibus potuit, quin in castra eodem die reuerteretur. Memorant vere Regem iratum fuisse, atque de reditu in suum Regnum cogitasse, cum tam infidos, lentosque in ijs, quæ promississent, Germanos vidisset. At Stetini in Comitijs ab ordinibus decretum, vt decem millia militum, prouinciæ sumptibus, conscriberentur, qui Regi, Duci, ac Prouinciæ sacramentum præstarent. Missi cum hoc nuncio legati Gostauum ita mitigauere, vt sua præsidia ex Pomerania deducturus, & vltius progressurum se promitteret, postquam decretus miles extitisset; ac interim ad præsentem prouinciã

uinciæ tutelam, omnes accolas ad Ghertium muniendum conuenire iussit, vt incepta munitione citius absolueretur, atque ipse ex Pomerania minime discedere decreuit. Inter hæc componēda de obsidione noui Brandemburgi certior redditur, & ne ciuitas, præsidiumq. illud amitteretur, Fridlandiam, viginti ab obsessa vrbe milliaribus, castra mouit, opem laturus, & prælium non detrectaturus, si ante expugnationē eo peruenisset, cum vero amissam ciuitatem, cæsosque milites sensit, dolore perculsus, Anclamum retrocessit, cum non amplius cum hoste congredi operæprecium haberet, ibiq. in Cæsarianos inuectus, quod milites suos fere omnes Brandemburgi obruncassent, eos qui Colbergam dederant, atque tunc per nouā Marchiam Francofurtum

4 transmittiebantur, detineri iussit. Venerat circa eos dies in manus Suecorum Colberga, a præsidiarijs post longam obsidionem decoris conditionibus dedita, nam cum eduliorum inopia Cæsariani laborarent, neque subsidij spes esset, mense Martio cum hoste pacti sunt; exiure ex ea arce sex equitum turnæ, & nouem peditum signa, cum armis, sarcinis, ardentibus funiculis, sonantibus tympanis, ac duabus machinis, relictis tamen vexillis, quæ

a Sue-

a Suecis impetrare transigendo nō potuerant. Fuit huius arcis deditio magni momenti, non amissa solum magna militarium apparatusum copia, & multis diuersarū magnitudinum tormentis, sed ipsa loci opportunitate, qua Cæsarei priuati sunt. Sedet Colberga ad mare Balthicum, tutissimo contra omnem ventorum impetum portu ornata, atque adeo forti situ munita, vt Rex oppugnationem tentare respuerit; Pomeraniæ Borussięque inuadendis commodissima, neque poterat Rex quiete has prouincias possidere, dum hæc, atque Vismaria, celebris item eius maris portus, Cæsari obedirent; nauium enim commoditate, Vismaria Colbergam miles deuchi, atque inde eas prouincias infestare poterat; & Tyllius horum gnarus, defendi omnibus conatibus, conseruariq. eam arcem iusserat, subsidijq. curam Gabrieli Roix Vismariensi præfecto demandauerat; at hic dum militem nautasque colligit, intercepta, trucidataque a Suecis nautarum, qui Vismariam tendebant, parte non exigua, detentus, eatenus subsidium distulit, vt ipsa hosti dederetur, & quattuor naues, quæ cum annona, recentiq. milite subsidium erant allaturæ, tertio a deditione die Colbergam peruenere; nec prius obsessorum deditionem

cogno-

cognouerunt, quam duas Suecicas celoces in portu viderent, & aduersis tormentorum ictibus ex oppido peterentur; cum igitur subsidium inferre, & locum recuperare non possent, Vismariam vela vertere; quod si ante triduum aduenissent, Colberga per eam saltem ætatem esset seruata, ac impediuiisset, ne ulterius progredieretur, Regem, qui maiorem in Germaniam impressionem non erat factururus, nisi terga firmasset, omnemque suspicionem amouisset, ne reditu in suum Regnum priuaretur. At detenti Colbergenfes dedititij post aliquot dies placato Rege Lanspergam incolumes ad suos transmissi sunt, & Tyllius capto direptoq. nouo Brandemburgo, postquam se in Pomeraniam irrumpere minime posse cognouit, occupato, munitoque a Rege omni transitu, Magdeburgum redire constituit, cum vt eam ciuitatem obsideret, tum vt Regem, ciuitati non defuturum, in æquiora traheret loca, patrijs auxilijs procul, vbi manus conferendi copia daretur. Accessit quod cum incunte vere glacies, niuesque liquefcerent, auxilia ex Lotharingia; alijsque locis, in quibus pro Cæsare miles conscriptus fuerat, Magdeburgum aduentabant, quibus iungi magni momenti erat: relicto igitur nouo Brandem-

burgo, Rappinum redijt, præmiſſo Coloredo tribuno Bincenum verſus, ad tentandum Viadri tranſitum, quem ſi tranſmittere potuiſſet, cū Rege acie decertare conſtituerat. Sed iam propugnacula, quæ ante pontes fluminis Sueci excitauerant, ad iuſtam deſenſionem erant perducta, neque expugnari poterant, ſine magno temporis diſpendio, militumque clade, quapropter Coloredus deuſtata regione ad Tyllium redijt, qui vetus Brandenburgum progreſſus, miſſaque Hauelbergam equitatus parte, in ditione Magdeburgica reliquum exercitum diſtribuit; & ciuitatem illam arcta obſidione cingens, primaria caſtra Mècheræ
5 metatus eſt. Inter hæc Goſtauus magnam vim nauium Stetini cogeſcit, ex quibus pontem fabricari iuſſit lōgitudinis CLXXX. pedū, latumq. ita, vt quinque equites ſuper illum obequitare poſſent; atque huic ſimilem alium, ſed minorem conſtruxit, vt trans Viadrum pluribus in locis tranſitum haberet, neque ſibi opus eſſet ſemper Stetinum tendere, quando trans flumen ire oporteret. His pontibus, magnaq. tormentorum, ac militarium rerum copia aduerſo fluuio aduectis, nouam Anghermūdā ſe contulit, ibiq. collecto exercitu, maiorem pontem prope Suedam, minorem ad Ferathum collo-

collocavit, eosque validis propugnaculis muniuit, ne a Cæsarianis occupari possent, ipse cum exercitu inter vtrumque, prope fluuium, castra posuit, in quæ omnem annonam, quæ in proximis locis custodiebatur, afferri voluit. Hæc peragenti defertur Tyllium ex Megapoli discedere, quapropter postquam Coleredus, scrutatis pontibus, discesserat, sexcentos equites dimisit, qui progressus Tyllij obseruarent, & postremos exercitus interciperent; atque ubi illum, relicto Francofurti, & Lanspergæ præsidio, reliqua deferere, & Magdeburgum tendere intellexit, relictis, qui pontes tuerentur, Francofurtum versus castra mouit; ipseque cis fluuium cum decem millibus peditum, & centum equitum turmis, ab altera parte Hornius castrorum præfectus, cum viginti turmis equitum, & bis mille peditibus, incedebat; maiora tormenta per flumen, cum apparatibus, minora per ripas trahebantur: hoc ordine, pergens, ex itinere Libembaldiam, & Fyrstembaldiam occupauit, & quinque Croatarum turmas, quæ Zidenicæ statim habebant, obtruncatis ad centum quinquaginta, impedimentis spoliauit; octauis denique castris Francofurtum peruenit. Ciuitatis illius cura penes Sciamburgicum adhuc erat, cui Tyllius duo

millia militum sufficiens praesidium reliquerat, quod ipse, quando Regem ad se venire cognouit, adscitis septingentis alijs, auxit: inde ut hostem diutius moraretur, daretq. tempus Tyllio, quo Magdeburgum expugnaret, atque postmodum Regem in Francofurti obsidione implicatum deprehenderet, extra ciuitatem munitiones quasdam extruxit, incensisque suburbijis, & concisis vineis, fossas duxit, quas militum praesidio firmauit; verum cum a Tiffembacchio tribuno, quem exploratum miserat, tales esse Regis vires intellexisset, ut sustineri ab extructis munitionibus minime possent, ne militem, quem imposuerat, amitteret, eas deseruit, & ciuitatem clausit, ipsi defendendae omnino intentus. Est Francofurtum ad Viadrum ciuitas satis celebris, florentissima olim academia insignis, & mercimonio diues; habet ab vno latere fluuium, ceteris in partibus antiquo more muris septa. Quinto idus Aprilis primum Rex ciuitatem subiit, totusque exercitus ad sclopi ictum accessit; Mox Gostauius perlustratis omnibus locis, opportuna ad fossas ducendas, & tormenta collocanda designauit; inde Sueci ductis fossis, se in combustis suburbijis munierunt, quamuis ab obsessis crebris tormentorum,

rum, scloporumq. ictibus, eruptionibusq. ab opere deturbarentur. Sequenti die vrbs corona circumdata est, strenue se defendentibus Cæsareis; Rex vero postquam in aperto campo prædicantis sui concionem audiuit (quem morem antequam ad prælium accederet semper seruabat) ad milites perrexit, ipsosq. ad opus hortatus, Cæsareos aliquot, qui fossam tuebantur, impetu facto, in ciuitatem pepulit; post hæc cōtra Gubiniensem portā, duodecim maiora tormenta, quæ iam disposita erant ad ruinam faciendam, aperiendamq. aggressuris viam, explodi mādauit; cumque excitati præter hoc duo cuniculi incenderentur, ea porta disiecta corruit, non sine defensorum strage; & Sueci ruinam subeuntes in ciuitatem irruerunt, cæsis obuijs Cæsarianorum; cæteri cum iam hostem in ciuitate esse senserunt, in fugam cum sarcinis se ex altera porta dedere; at cum ciuitas tota impedimentis repleta esset, militumq. auaritia nimium onus secum ferret, dum fugientes potius angustia detinentur, Sueci persequuntur, illorum fere centum in fluuium præcipites dati sunt; in reliquos promiscua cædes edita, adeo vt ex toto prædiariorum numero vix mille superfuerint; inde in ciues, ædificiaque sæuitum, cum Sueci nemini

nemini parcerent, sed omnia depopularentur, & depreſdarentur. Eius ciuitatis damnum multis auri myriadibus æſtimatur, fuereq. ipſius participes vicinæ ciuitates, quæ nundinarum occasione Francofurti merces habebant; auxit calamitatem excitatum incendium, quo multæ ædes conflagrarunt; trucidati ſunt ex Cæſareis ſupra mille quingentos, inter quos Tribunus quidam, nonnulliq. alij fortes viri occubuerunt; capti fere quingenti, atque præcipue Sparius, & Vallius tribuni, cum multis Centurionibus, alijsq. Officialibus; Sciamburgicus Tiſſembacchius, & Comes Môtiſcuculi, cum ſexcentis circiter gregarijs militibus, Glogouinum maius in Sileſiâ euafere; ex Suecis quadringenti cecidere, nemine ex proceribus cõprehenſo; magna inſuper tormetorum, & militaris apparatus copia Goſtauus potitus eſt; ſic ea ciuitas corruit, non ſine Regis nota, qui poterat incolumem ſeruare; nam cum deſenſores diſiectam cuniculis portam viderant, Suecoſque ad irrumpendum paratos, pulſato tympano bis petierant, vt certis cõditionibus tranſigerent, & in dẽditionem acciperentur; quo pacto illæſa ciuitas in manus Regis perueniſſet; Goſtauus vero iratum ſe fingens ob cladem a ſuis ad nouum Brandenburgum acceptam,

exerc-

exercitui eam prædam concedere voluit, vt promptiorem ad reliqua haberet; At sequenti die, postquam milites præda onusti, sed non satiati, ad signa rediere, opportunitatem ciuitatis considerans, illam munire decreuit; atque ita sex legionibus impositis, vallum restaurari præcepit, cumque maxima annonæ esset penuria, & ciues non solum non haberent, quæ militibus darent, sed nec etiam quæ comederent, apertis horreis, quibus Cæsariani copiosas fruges incluserant, ciuibus, atque militibus frumentum, aliaque necessaria largitus est. Posthæc exercitu reliquo in circuitu distributo, quoniam passionis Hebdomadam stylo veteri celebrabat, in ciuitate sacris suæ sectæ intentus, consedit; vbi vero Paschatis festa veneratus est, Lanspergam exercitum duxit, occupataq. in itinere Crosse, cum copioso apparatu, & annonâ, circa Lanspergam exercitum distribuit, & vallo se munivit; inde admotis tormentis, quæ per inusitatos calles a rusticis indicatos, ad ea loca perduxerat, ad quæ nunquam posse illum peruenire, obfessi putauerant, mœnia quatere cœpit, occupatisque munimentis, quæ extra ciuitatem erant, propius fossis valloque accessit, quod cum obfessi vidissent, exemplo Francofurti exterriti,

territi, facta deditioe, pridie Calendas Maij, cum sarcinis, vigintiquinque peditum signis, duodecim equitum turmis, & quattuor campestribus machinis exiuerunt, atque Glogouium maius in Silesiam incolumes deducti sunt. Gostaus praesidio ciuitati imposito, Fracofurtum cum exercitu redijt, vnde occasione partē victoriæ ad Protestantes, qui Lipsiam ad Comitia conuenerant, litteras dedit; Scribebat gratulari se, quod tādē Catholicorum iugum excutere fortiter decreuissent, extollebat suas victorias, vltimumq. suadebat, vt totis viribus sibi assisterent, qui nunquam communi se&æ, & causæ esset defuturus. Habebatur Lipsiæ a Protestantibus comitia ob negotium obsidionis Magdeburgicæ: erat enim illa ciuitas cum Protestantibus, liberisque ciuitatibus scēdere iuncta, quamobrē in praesenti calamitate auxilium a confœderatis implorauerat, & Christianus Guilielmus, qui ciuitatem illam tenebat, cognatus fere omnibus Protestantibus, aut affinis, vrgebat, vt sibi succurreretur: quapropter Elector Saxoniae Protestantium supremus ea comitia indixerat, & congregauerat. Agebatur itaque Lipsiæ de modo, quo Magdeburgo auxilium daretur, erantq. varię opinioniones, vt varij erant affectus;

At

At Magdeburgicus Legatus, qui Cæsareos vigiles, rustico amictu fallēs, euaserat, comitijsq. pro sua ciuitate intererat, miserabili oratione recusantis, desperatisq. specie ad auxilium ferendum animos flexit. hic prolixa incomptaq. barba, intonso crine, facie, habitu, cunctis ad miserationē compositis, in Principum conuentu occasionem nactus, ita locutus esse fertur. Non me huc, Principes viri, mei ciues misere, vt auxilium vestrum pro miserrima patria implorare, cui omne subsidium serum futurum est, quæque ab imminente excidio minime defendi iam potest; neque ego tantum meæ animæ, gloriæq. inuidissem, vt specie procurandi non profuturi auxilij effugissem, ne inter patriæ ruinas tumularer; sine patria vitam detestor, atque vna cum ipsa cadere malo, qui felices eos, beatosq. existimo, quibus ante patrum, suorumq. ora pugnando sub patriæ mœnibus fortiter mortem oppetere, continget: me beneuolentia erga vos meorum ciuium misit, me profutura, si dictis meis credideritis, imminentium cura, vt postquam vestri vos periculi admonuero, in gremium patriæ apud domesticos lares ab immani hoste trucidandus reuertar. Nostræ ciuitatis obsidio, imo vestræ, Euangelici proceres, eousq.

perducta est, ut neque solui possit, neque nos id cupiamus; nam qui possemus in ea patria, vivere, quam cum florentem, vigentemque viderimus, in posterum deformem deuastatis agris, mutilam incensis suburbijis, horridam, direpta maiori ipsius parte, reliqua concussa, dilacerataque essemus aspecturi? cesset iniquum hoc desiderium, si cui inest; Præstat nos desolatæ patriæ gnauiter pugnantibus victimas cadere, & nostro sanguine ruinas tantæ urbis aspergere, quam sine patria, sine laze toti terrarum orbi ludibrio esse; vos solū quibuscum communibus sacris, sanctoque fœdere quondam coniuncti fuimus, oramus, obtestamurque, si quid meriti fuerimus, cum pro religione, pro vobis ceciderimus, ut incolumes esse velitis, atque contra illum hostem, qui nostro casu omnium vestrum ruinā aggreditur, unitas vires intendatis, ne ab ipso pariter opprimamini. Quid enim Cæsarem moliturum putatis, postquam Magdeburgum, quia Lutherum, quia vestram amicitiam colit, diripuerit? Scilicet ad vestram ruinam hæc tendunt; atque utinam Magdeburgum cadens id persuadeat, quod cum staret, non potuit; namque hæc spes sola nos in summo hoc discrimine solatur, quod nostra calamitate docebimini,

quo

quo ista Cæsaris pietas tendat, ac in futurum
 (faxit Deus) cautiores aduersus ipsius insidias
 eritis; Vltimum supplicamus, procures, vt
 postquam Magdeburgo opportunam opem
 minime tulistis, vbi hostiles conatus iam im-
 minentes, a vestris capitibus auerteritis, co-
 gnati vestri Christiani, nostrumque, qui vo-
 bis vltimum vale iam dicimus, cadauera inse-
 pulta iacere non sinatis, cum pro religione,
 pro patria, pro vobis ceciderimus. Perorante
 Magdeburgico Legato vix concepta ira Prin-
 cipum lacrymas cohibuit, incenditq. ciuitatis
 calamitas mirum in modum animos, at non
 deerant in eo conuentu, qui etiam si Catholi-
 cos, Cæsaremque odissent, & Magdeburgi mi-
 sererentur, præferebant tamen securitatem
 propriam alienæ commoditati, ideoque Cæsa-
 ris potentiam metuentes, ægre deducebantur,
 vt palam bellum sumerent; verum enimvero
 allatæ Gostauæ litteræ nutantes confirmaue-
 runt, nam auditis ipsius progressibus, atque
 Cæsarianorum consternatione, nihil ab ipsis
 sibi amplius timendum rati, in eorum senten-
 tiam iuere, qui bellū palam sumendum, tuen-
 dumque Magdeburgum suadebant. omnibus
 itaque suffragijs decretum est, vt arma non
 pro hac causa solum sumerentur, sed vt liber-

- tas Germaniæ, & religionis (vt aiebant) in pristinum statum restitueretur; quoniam vero tunc temporis nemo ad subsidium obseffis ferendum paratior erat quam Suecus, cuius opportune allatæ litteræ ipsius in Lutheranos prouum animum testabantur, constituere, cum ipso transigere, omniaq. ipsi suppeditare, quæ ad Magdeburgum obsidione liberandum necessaria essent; missis itaque ad transigendum Commissarijs, Magdeburgensem Legatum læto animo esse iusserunt, neque despondere animum ciues debere, non enim eo iam res deuenisse, quemadmodum ipse dixerat, vt de salute ciuitatis desperandum esset; stare ciuitatem adhuc, & affuturum breui cum toto exercitu Regem subsidio, ac obsidionē soluturum; se quoque si opus esset, cum militibus suppetias venturos; quæ corruissent, aut deuastata essent, in posterum paucis annis vel mensibus refarcitum iri, atque ita spe, promissisq. onustum in suam ciuitatem dimiserunt.
- 7 Dum hæc Lipsiæ decernuntur Rex cognita, obsidione Magdeburgi propria sponte præsto esse decreuerat, cum vt eos ciues, suasque partes tueretur, tum ne Christianum, qui sub sua protectione uiuebat, deserere videretur; missis itaq. clanculum nuntijs, se affuturum breui pol-

ui pollicitus est, interea forti animo essent, & strenue se defenderent; ipse quoniam vetus Brandenburgum a Cæsarianis adhuc tenebatur, ne post se hostem relinqueret, ad illud expugnandum animum applicuit; misso igitur antequam castra moueret, tubicine cū mandatis, Vittenhorstium Cæsareum tribunum, qui ciuitatem præsidio tenebat, & diligenter muniebat, admonuit, vt intra viginti quattuor horarum spatium decerneret, & mētem suam aperiret, vtrum deditionem facere, an repugnare mallet; Quod si locum tutari eligeret, nullam sibi postmodum veniæ spem reseruaret. Vittenhorstius, pernicibus equis misso nuntio, Tyllium super hoc consuluit, a quo mandatum accepit, vt strenue se gereret, & ciuitatem vsque ad extremum defenderet, verum cum postea Tyllius locū illum satis non esse munitum, imperfectis adhuc, quæ inceperant; propugnaculis, intelligeret, mutato consilio Vittenhorstium in castra circa Magdeburgum se recipere iussit; Quod ille asportatis secum sarcinis fecit, & Rex ciuitatem immisso præsidio occupauit. Atque inter hæc Protestantium litteras Lipsia accepit, quibus ad liberandum Magdeburgum, oblatis auxilijs, inuitabatur. Oblata Gostauus minime respuit,

spuit, sed respondit gratulari se, quod Principes tam sancte, vtiliterq. decreuissent; fautorum se illorum petitionibus, & obsessæ ciuitati subsidium laturum, ijs quæ offerebant pro occasione vsurum, parati ipsi essent ad ea faciendâ, quæ ipse opportune petiisset; vt igitur præter suam propensionem, Principum pronos animos ad hanc expeditionem vidit, ad subsidium ferendum se accinxit; & transmissa cum toto exercitu Viadro, Chepenicum se contulit; inde quoniam per Electoris Brandenburgici ditionem sibi transeundum erat, Berlinum ad eum misit Comitem Ortemburgicum petitem, vt Culstrinum & Spandauiam cum annona, & menstruo stipendio sibi traderet, quo tutius Magdeburgum petere posset; redditurum se ea loca simulac ciuitatem illam obsidione liberasset; neque se hæc ideo petere, quod de ipsius fide dubitaret, sed quod eius præfectos, & Commissarios suspectos haberet, qui sibi cum Cæsareos apud Gheritium fudisset, ac persequeretur, Culstrini portas clauferant, quod non parum damni sibi attulerat, cum hostem omnino delere propter illud solum impedimentum nequiuisset. Ægre deducebatur Elector ad ea loca tradenda, quæ situ, & munitione suæ ditionis potissima erant

propu-

propugnacula; qua de causa Ortemburgico, & Hornio, qui post illum cum iisdem petitionibus venerat, se ea loca daturum negavit; Cæterum Regis mandatis obsequuturum, atque ijs locis Commissarios præfecturum, qui in omnibus illi præsto essent; His Gostauus non contentus cum quinque equitum turmis, mille sclopetarijs peditibus, ac quattuor paruis machinis, Electorem allocuturus Berlinum perrexit; Elector ad milliare prope ciuitatem obuius occurrit, & post amicam salutationem, & priuatum in siluula colloquium, quod integram fere horam durauit, in ciuitatem redijt, suos consiliarios super petitione Regis consulturus; Rex cum Electoris Palatini vidua, quæ ipsi quoque cū Brandenburgico obuiam venerat, in campo responsum opperiebatur. Postquam vero regressus Elector responsum secundum Regis voluntatem non tulit, indignabundus in castra volebat redire, sed affinis mulieris precibus detentus, Berlinum cum mille sclopetarijs intrauit, atque altera die rursus cum Electore egit, vt sibi loca, quæ petierat traderet, secus se obsessis Magdeburgensibus opem minime laturum; accefferat interea prope Berlinum Suecicus exercitus, vnde Elector, vel rationibus a Rege adductis persuasus, vel

vel armis ipsius territus, tandem descendit, vt Spandauiam daret, de Custrino nunquam persuaderi potuit. Rex itaque accepta Spandauia, impositoq. praesidio, Electore, & Illustribus foeminis salutatis, in castra Chepenicum reuersus est; Inde pridie nonas Maij Posdamum mouit, Electoremque Saxoniae postulauit, vt suos milites secum coniungeret, quo facilius ciuitatis obsidionem solueret, vel saltem sibi transitum per Saxoniae fines, nempe per pontem Dessauensem concederet, quo compendiosiori via Magdeburgũ veniret. Vtrumque Saxo aperte reculauit; primum, quod non adhuc sufficientem militem se collegisse dicebat, alterum ne sedes belli in sua ditione staueretur; tantumq. absuit vt aliquid concederet, vt etiam Regem, qui colloquium petebat, alloqui respuerit, sua negotia, occupationesq. causatus, quod tunc temporis praesertim in militibus recensendis esset occupatus. Me difficultates istae, quas passim Germaniae Principes Regi mouebant in eam sententiam trahunt, vt existimem illos Regis arma suspecta habuisse, quasi ille ipsorum desiderium victorijs superasset; An fortasse, vt mos est ijs, qui nefaria facinora audent, pauescebant enormitatem sceleris, & quamuis animo contra-

Caesa-

Cæsarem proprium Dominum arma sumere,
 decreuissent, instituti executionem abomina-
 bantur; hoc de Saxone dicere licet, illum non
 prius arma in Cæsarem vertisse, quam Tyllius
 suæ ditionis partem deuastasset; At hercule he
 moræ eatenus Regem detinere, vt Magde-
 burgum excidium passum sit; nam dum Go-
 stauus cum Saxone, & Brandenburgico alter-
 catur, Tyllius obsessam ciuitatem expugna-
 8 uit. Respirauerat post profectum in Megapo-
 lim Tyllium Magdeburgum, soluta vadiqua-
 que obsidione, cum ille maiorem militum
 numerum secum abduxisset; ideoq. ciues, &
 præsidarij milites excurrabant sæpe ad trigin-
 ta vsque milliaria, opprimebantq. Cæsareos
 statiuâ minus vigilanter custodientes, & præ-
 dam, commeatumq. in ciuitatem adducebât;
 verum cum ab externo hoste securi quodam-
 modo viuerent, internis discordijs agitari cœ-
 pere, dum ciues in ciuitatē, & suas domos re-
 cipere militem Suecum, quem Marchio Chri-
 stianus conduxerat, abnuerent; sed hæc lis
 cito, intercedente Senatu, sedata est, om-
 niq. dissidio sublato Christianus, ciues, & mi-
 lites fidem sibi mutuo obstrinxerunt, se vna
 aut victuros aut morituros, donec ciuitatem
 ab hostium conatibus liberam præstarent;

ideoque alias insuper munitiones extra ciuitatem excitare, vallum reparare, & se ad quemcunque casum accingere. Præerat Cæsareis, quos circa Magdeburgum Tyllius reliquerat, Popennaimus, qui nihil relinquebat intentatum, ut pro viribus quas habebat, ciuitatem molestaret, atque interim dum Tyllius abesset, Volsenbutulæ in suis statuiis scatas, & alia instrumenta bellica fieri, pararique curabat, quibus vrbs adueniente Tyllio sine mora expugnaretur; neque dum militaria moliretur, mitiora consilia intermisit, hortatus Christianum litteris, ut ad Cæsaris obedientiam rediret, vitaretq. imminentem ruinam; sed parum admodum potuere pia verba apud proteruum illius animum, qui religionis prætextu suam Tyrannidem obtegens aures non præbebat suadentibus, ut Cæsaris clementiæ se remitteret, veritus, ne ditione ab illo spoliaretur; Popennaimus vero ubi hæc remedia minus valere animaduertit, animum applicuit, ut quoquo modo vrbe potiretur; Falchēbergio itaq. Regis Sueciæ tribuno, qui Suecis Christiano militantibus præerat, per tubicinem significauit, quam procul Regis subsidia abessent, & quam ipse ad ciuitatem expugnandam esset paratus; Cederet igitur dum tute posset,

posset, & Cæsari gratificaretur, beneficium non neglecturo, sed condignū præmium porrecturo, si ipsius opera rebelli ciuitate potiretur. hæc vero alium pepererunt effectum, quam Popennaimus putarat, nam non solum Falchēbergius allatis rationibus persuasus fuit, sed irritatus ultro, tanquam sibi hæc quasi proditori proponerentur, tubicini respondit, se pro hac vice illum excusare, quod fortasse eorum, quæ afferret inscius venisset, in posterum nemini parsurum, sed in furcam acturum, qui eiusmodi sibi nunciaret, ac se mirari, quomodo Popennaimus, alioquin egregius, honestusque miles, scripsisset hæc sibi, qui prodicionis nunquam suspensionem dedisset; atque hæc quidem tubicini, Christiano vero, & Magdeburgico Senatui acceptam epistolam ostēdit, ut ipsorum animos, hac de causa irritatos, erga suum Regem magis affectos redderet, & suam fidem ostēteret; inde ut strenue patriam defenderent cohortatus, cum suo milite egressus, ad Albim quinque a ciuitate miliaribus procul, Scionebeccam versus, paruum munimentum excitauit eo consilio, ut liberum, in Saxoniam transitū sibi seruaret, vnde comitum pro militibus quæreret, quibus nolebant ciues ex suo impartiri; mox munitioni

milite imposito, qui tutari posset, Magdeburgum reuersus est; atque hoc munimentum Magdeburgensibus per integrum fere mensem utile admodum fuit, nam non per siluam crucis solum, ad quam id situm erat, Gommerra copiosam annonam habebant, sed etiam ex eo erumpentes milites Cæsarianis eripiebant, quæ illi sibi quæsiuerant, illosque non parum molestabant; & Popennaimus, qui ad illud expugnandum accesserat, prohibere non potuit, quin ad finem perduceretur, cum non sufficientem militem haberet, ut illud iam ad iustam defensionem perductum expugnaret; sic iuuit hoc Magdeburgenses non parum, quousque Tyllius ex Megapoli redux circa idus Aprilis illud expugnauit. Distribuerat ut diximus in Magdeburgensi ditione Tyllius exercitum; atque ubi aliquot dies curandis corporibus insumpsit, ciuitatem propius accedere, atque adiacentia munimenta expugnare deliberauit; Mechera igitur, & Pechauio mouens cum exercitu inter Præsterense, & Craizhorstense Magdeburgensium munimenta in silua confedit, excitatoque ibidem vallo se munivit; missis inde militibus, qui viam ad ciuitatem infiderent, ne hostes in illam aufugerent, munimentum vltimum ad Albim aggressus

gressus est, tormentisque ab utraque fluminis
 ripa directis, quati iussit, atque eadē die a præ-
 sidiarijs deditum in potestatem redegit; pari
 felicitate intra paucos dies Præsterense, Craiz-
 horstense, Præsteram, Cracauiam, & Bucca-
 uense munimenta expugnavit; quo pacto ex-
 tra urbem omnium maximum munimentum
 Magdeburgensibus solum restabat, quod vec-
 tugal appellabatur; amittere in ijs munimen-
 tis ciues militum pugnacissimos, & ea, quæ
 maximi pendebant, vix vsui fuere. Porro Tyl-
 lius conspiciatus, nullum aliud amplius extra,
 urbem munimentum extare, quam vectigal,
 illud quoque aggredi operæprecium ratus est,
 ut postmodum alia omni cura liber ciuitatem
 acrius oppugnaret; dispositis itaque machinis
 ruinam excitare cœpit, factumq. est, ut cum
 vallum ex arenosa, minimeque tenaci terra
 conflatum esset, breui temporis spatio ipsius
 integrū latus corruerit; quo viso Falchember-
 gius milites in ciuitatem iam munimentis nu-
 datam reuocauit, combusto prius ponte, qui
 vectigal ciuitati coniungebat. Tyllius ut ho-
 stem vectigal deseruisse cognouit, metuens
 insidias, neue suppositis ignibus, cum militem
 imposuisset, disijceretur, vsque ad noctem
 præsidium imponere distulit, qua aduentante
 demum

demum aliquot peditum signa immisit, qui illud contra ciuitatē munirent. Licet hic Magdeburgensium exemplo infelicem mortalium industriam deplorare, qui aliquando quidpiam moliantur, & faciunt, sibi vsui, & commoditati futurum credentes, quod deinceps in ipsorum perniciem, & ruinam vertitur; extruxerant Magdeburgenses immensis laboribus, & sumptibus extra suam ciuitatē tot munimenta, vt hostem impedirent, & distinerent, ipsi interea temporis beneficio fruerentur, & obsidionem in longum traducerent; at hæc ipsa faciliorem expugnationem reddiderunt, fuereq. in causa, vt ciues citius suæ patriæ excidium viderent, nam amisso extra ciuitatem magno militum numero, iam adeo pauci in ciuitate supererant, vt tenere totam non possent, atque ea ipsa, quæ in sui defensionem fabricauerant, munimenta, in se præparabantur; verum Christianus, & Falchembergius vbi præter spem amissa propugnacula tam cito videre, de rerū statu Regem, & Protestantes, qui Lipsiæ diuersabātur, missis clandestinis nuncijs admonuerunt: ipsi cum militum numerum nimis angustum esse cognoscerent ad totam ciuitatem tuendam, suburbia deferere decreuerunt, præsertim cum Sudem-

demburgum Cæsariani iam oppugnare cœpif-
 sent; excitato itaque Sudemburgi, & in noua
 vrbe incendio, ædes combusserunt, atque ex
 igne superstites, adhibitis machinis, cunicu-
 lisque, solo æquauere, ne hostis ijs contra se
 vteretur, aut in ijs hospitia collocaret; Cæsa-
 riani igitur Sudemburgū circa Calendas Maij
 occuparunt, & Popennaimus quarto nonas
 eiusdem mensis nouam urbem cum quinque
 legionibus ingressus est: mox Cæsarei fossas
 ducere, graui obsidione ciuitatem cingere,
 omnesq. vias intercipere, quibus Magdebur-
 gum aditus pateret. Inter hæc Gostauī ad ob-
 sessos litteræ interceptæ sunt, quibus partim
 ad Francofurtum victoriam narrabat, & se sub-
 sidium breui cum toto exercitu allaturum, per
 suum honorem iuratus, promittebat, essent in-
 terea bono animo, & se strenue defenderent;
 has ad se allatas Tyllius, qui Mecheræ diuersa-
 batur, quamuis Francofurtenſi clade percul-
 sus, ad Popennaimum misit, vt obsidionem
 vrgeret, nam aduentare Regem, & Protestan-
 tes vbique delectus instituisse, vt obsessæ vrbi
 præsto essent, qui si venirent, erat omnino
 obsidio soluenda; Sed harum lator a Magde-
 burgenſibus, qui tunc forte ex ciuitate erupe-
 rant, captus est, & ciues Regis litteris in spem
 erecti

erecti sunt, acriusque defensionem susceperunt,
 & quanquam multorum animi conciderant,
 ubi cognouerant rem serio agi, & Tyllium
 omnino constituisse ciuitatē expugnare (quod
 antea nunquam putarant futurum, quare ne-
 que militem, neque apparatus sufficientem
 prouiderant, ad tam vastam, & irregularem
 munitionem defendendam) fecerunt tamen ea,
 quæ vires & tempus permisere. Supererāt om-
 nino in ciuitate duo peditum millia, & tercen-
 ti fere equites ex exercitu, quem Christianus
 conflauerat, cæteri aut per acies ceciderant,
 aut fame consumpti erant, multos etiam ægri-
 tudines absumpserant, quas ex male cocta
 Ceruisia contraxerant. Hos reliquos milites
 Falchembergius per mœnium apertiora loca
 distribuit; inde quoniam illorum numerus mi-
 nime suffecerat, editoribus, & munitioribus
 locis ciues imponit, scæminas atque impube-
 res afferendis apparatibus, alijsque necessarijs
 adhibet, ipse nullibi non adesse, omnia lustra-
 re, mœnia, stationes percurrere, hortari, fa-
 cere, milites ciuesque verbis atque exemplo
 monere. Neque Christianus deses tempus te-
 rebat, nam dum Falchembergius ore, præsen-
 tia, opere defensores incitat, ipse in Senatu
 consulebat, quid in supremo rerum discrimi-

ne agendum, omnibusque consulto provide-
 bar, atque hæc quidem in ciuitate; Tyllius ve-
 ro postquam cinctam vndique ciuitatem vi-
 dit, facile putans, vt ciues exterriti deditionem
 facerent, ad eos litteras dedit, atque eodem
 fere tenore ad Christianum & Falchember-
 gium scripsit, vt postquam iam excidium vrbi
 immineret, neque vlla spes auxilij esset, se
 æquis conditionibus dederent, & vltima ex-
 pectare non vellent; se hæc ideo scribere, quia,
 vt Christianum virum decet, a tanta sanguinis
 effusione, quanta erat futura, si ciuitas vi ex-
 pugnaretur, abhorreret; misereri se tot imbel-
 lium mulierum, & puerorum, qui erant peri-
 turi, eaque de causa eos monere, ne sibi po-
 stea crimini, sæuitiæque daretur, si vltimam
 ruinam paterentur. Non respuere omnino
 Magdeburgenses deditionem facere; sed quia
 negotium hoc magni momēti esse dicebant,
 quod non ad se tantum, sed ad omnes Prote-
 stantes pertineret; nec Principem, aut Sena-
 tum, aut ciues de eo aliquid, inconsultis alijs,
 statuere posse, sed rem omnē ad vicinos Ele-
 ctōres, & confederatas maritimas ciuitates
 referendam; rescripserunt itaque quod si suos
 Legatos incolumes, liberosq. ire permetteret,
 se citatis equis ad Electores Saxonem, & Bran-

deimburgicum, atque Lubecam missuros, qui super hoc negotio consulere, & constitui commissarios ad transactionem procurarent: sisterentur interim arma, ut facilius, & conib modius hæc peragerentur. Tyllius ut Legatos mitterent concessit, tubicinesque dedit, qui saluos ducerent, de armistitio non consensit, nam cum ciuitatem in manibus iam haberet, tempus traducere nolebat, quo obsessi, vel Rex, vel Protestantes præsto essent. At decreta, concessaque legatio irrita fuit, neque Legati eo iure, quod missi fuerant, ob mox secutum urbis excidium. Dum de mittendis Legatis ageretur obsessi vna, eademque die ter eruperant, cæsisque Casarianorum fere ducentis in ciuitatem redierant; Casariani vero nihil operibus suis promouendis instabant, breuique temporis spatio iuxta Haydeccum, & nouam urbem, in multis locis, ad labrum usque fossæ peruaferant, unde ignitos globos in ciuitatem iacentes; incendium excitare nitebantur, sed obsessi diligenter extinguendo cadentes globos, periculum auertebant, quoniam vero ex ea parte magno damno afficiebantur, Falchembergius erupit, ut inde Casareus expelleretur, post longum tamen certamen in ciuitatem repulsus est. Porro Tyllius cum

Regem in dies magis accedere intelligeret, acrius oppugnationem vrgens, dispositis vbi- que tormentis mœnia quatiebat. Sextodeci- mo Calendas Iunij sedecim muralibus machi- nis nouam urbem iuxta longa ruina est edita, omniaque ad eam aggrediendam, inuaden- damq. parata erant, & milites solum ducis si- gnum expectabant, sed cum ab vna parte tur- ris supra portam staret, in qua obsessi tormen- ta disposuerant, quibus non parum damni Cæ- sarianis afferebāt, & ab alia prope Albim pro- pugnaculum esset, quod & ruinam aggressu- ros molestabat, Tyllius militem cohibuit, do- nec turris illa, & propugnaculū euerterentur, faciliorque ad diruta mœnia accessus pateret. Dum enim turris, & propugnaculum stabant, si milites accessissent, ab utroque latere infe- stis scloporum, machinarumq. ictibus peca- bantur. Iussit itaque Tyllius turrim, & pro- pugnaculum quat, inter quā viginti fere ex Cæ- sareis per cellas, & fossas ad vallum vrbs pe- netrauerant, iamque illud fodere, atque in eo- se munire inceperant, cum erumpentes ciues illos expulerunt. Erat in ciuitate dum hæc agerentur maximus tumultus, omnesq. in ar- mis stabant censes, Cæsarianos ea die im- petum facturos, neque tamen ideo exterriti

deditionem facere, aut colloquium petere in illorum animum incidit, sed perfracte in sua obstinatione. perseverauere, donec turris, quæ supra portam erat sequenti die xj. Calendas Iunij tercentis ferme tormentorû ictibus corruit; tunc tametsi non ex Cæsarianorum voto ea ruina successerat, qui in fossam cadere illam cupiuerant, vt ruinis fossa impleretur, tamen exterriti, cum iam facilius, & securius ruina adiri posset, emisso tympanista quatuor dierû inducias petierunt, quibus Electores Saxonem, & Brandenburgicum, & maritimas ciuitates de suo statu admonerent. Tyllius lacerata epistola, quam miserant obsessi, respondit, non amplius consulendi esse tempus, sed transigendi, quibus conditionibus possent, se nolle diutius iam partam victoriam differre, ipsi sibi consulerent dum tempus esset, & res adhuc starent; hortari se ne vltimum excidium, quod iam imminebat, expectarent; dimisso cum hoc responso tympanista, tubicinem ipse sub meridiem misit, cum tribus epistolis, ad Christianum, Falchembergium, & ciues scribens, ne inutiliter mori, diripiq. ciuitatē mallent, quam se decoris conditionibus dedere. Acceptis his litteris Magdeburgenses, quosdam ad Tyllium mittere decre-

decreuere, qui conditiones quas proponeret, audirēt, & referrent, vt super ijs deliberaretur. Verum dum isti conditionibus discutiendis intenti sunt, Cæsarei milites opus non intermittebant: Popennaimus enim quietis impatiens, ex noua vrbe prope Albim, vbi fossa aquis carebat, imperum fecit, vt milites aliquot sub vallo occultaret, sed ab obsessis repulsus, cuniculis rem agere instituit, vt partem valli disijceret, quod itidem irritum fuit; nam persentiscentibus id obsessis, vanum contrarijs cuniculis conatum reddidere. Popennaimus demum viua vi in fossam irrumpeus cum ab obsessis parum impediretur, qui sulphureo puluere iam fere destituti, eminus infestare parum poterant, in ea se muniuit, sequentique die pluteis vallum aggressus, lignibus illud effodere cœpit, quamuis obsessi id impedire summa vi niterentur, machinisq. ex propugnaculo, quod fossam spectabat, efflores turbarent; verum cum viderent hæc parum proficere, cœptis insistēte Popennaimo, sequenti die Tyllij tubicinem cum responso remittere, & deditiōem facere constituerūt; interim cum obseruassent Cæsarianos cateruatim huc illuc itare, coniecere eos expugnationem moliri; quamobrem totam noctem in somnes

somnes super vallum perstitere, factoque impetu Popennaimū ex fossa pellere nequicquam conati sunt. At Tyllius ubi ad ruinam patere faciliorem accessum vidit, omnia parari iussit, ut die illucescente vrbs expugnaretur, locaque distribuit, quæ quisque aggredieretur; sic xiiij. Calendas Iunij; quā die obsessi sese dedere constituerant, Cæsariani quiete in suis statoriis se continebant, ut obsessos fallerent, qui cum insomnes noctem traxissent, infidebant dormituriens vallo, atque ubi usque ad tertiam diei horam nihil tentasse hostes videre, dimidia ciuium, & militum pars, permittentibus præfectis, domum ad requiescendum se contulit, ipsique præfecti, qui tunc ab excubijs immunes erant, quieti se dederunt; Atque Falchembergius curiam petijt, ut cum Christiano, & Senatu de dimittendo Tyllij tubicine ageret; At cum Popennaimus, cui primus aggrediendi locus obuenerat, omnia in ciuitate quæta animaduertit, dispositis in acie militibus, Quousque, inquit, rebellis hæc ciuitas vestram virtutem commilitones eludet? Anne huic obsidendæ nostram omnem ætatem impendemus? Impunes nobiscum Magdeburgenses transigent? Seruabunt patriam, domos, aurum, qui tantum nobis negotij facefferunt,

nos qui tot tantosq. labores in hac obsidione;
 exantlauimus sine præmio abibimus? sic erit
 milites; ecce iam tubicinem nostrum dimittunt,
 Tyllio æquis conditionibus se dedunt,
 nos merita, parraq. præda defraudamur, & laceras vestes, vulneratum corpus, defessam animam reportabimus. Quin potius priusquam hæc concludantur, duobus istis agglomeratæ ægillæ cubitis superatis, in inermem illam plebeculam ferro irruimus? ascendere vallum labor erit solum; cætera cædes inertium, vastationes domorum, solatium; supellectiles diuitiæ, quibus Magdeburgenses abundant, præmium erunt; Agite milites, me ducem sequamini, perfidiam sine pœna, iniurias sine ultione, nostros labores sine præmio esse non patiamur. Hinc haud secus, quam alijs persuaserat, faciens, districto gladio fossam ingreditur, superatisq. suis munimentis contra vallum tendit; & milites parialacitate ducem sequuti, inferiorem valli partem occupant, mox superiorem aggressi, ex ea quoque Magdeburgenses deturbant. Falchembergius autem cum suos classicum canere sensisset, egressus curia, quos potuit milites collegit, & contra Popennaimum ciuitatem iam ingredientem duxit; hic renouato prælio acriter dimicatum est, iamq.

iamq. Cæsarei ab ingruente ciuium turba repellabantur, ni interfecto plumbea glande Falchembergio ciues exterriti cessissent; mox omni ex parte Cæsarei irrumpere, necare resistentes, incendere ad terrorem domos, excurrere, deprædari, quique minus discriminis subierant, meliorem partem prædæ referre. Inde, quod vltimum ciuitatis exitium fuit, apertis portis equitatus, & Croatæ introducti sunt, qui per ciuitatem discurrentes miserandam stragem edidere; Sæuitum in viros, fœminasque promiscue, neque imbellis ætas impuberes seruauit; solum incendium, quod afflante vento tota iam ciuitate vagabatur, stragi finem imposuit, superstites ferro, alio sæuiori mortis genere, afflicturnum; nam cum flammæ vbique debaccarentur Cæsarei, exceptis aliquot legionibus, quæ super vallum signa firmauerant, ipsumq. custodiebant, in castra reuersi, quod ex misera ciuitate supererat, igni consumendum reliquere. Christianus plumbea glande sinistrum crus traiectus, cæsimq. caput vulneratus, viuus in Popennaimi potestatem venit, ac deinceps Viennam ad Cæsarem captiuus transmissus est. Superuixere & alij ciuitatis Senatores, & Primates, spe redemptionis a Cæsareis seruati; Cæterum
foli

foli milites aliquot, qui defendebant ciuitatis
 quandam partem, quæ Marschia dicebatur,
 vitę incolumitatem pacti, militari more se de-
 dere. Pauci item milites, & ciues in templum
 maius, quod ab igne intactum fuit, misericor-
 diam victoris experturi, confugere; reliqua
 plebs militesq. partim ferro cecidere, partim
 igne misere consumpti sunt. Mirum est di-
 ctu quam breui temporis spatio flammę ciui-
 tatem illam absorpserint, nam non pluribus,
 quam viginti quattuor, horis tota cōflagrauit.
 Cathedrale templum, Beatę Virginis Cæno-
 bium, & centum quinquaginta fere piscato-
 rum domus, prope Albim sitæ, quæque ab alijs
 separatæ erant, tantum seruata; Inter alia, sex
 egregia templa in cinerem redacta, quorum
 aliqua scctilibus laminis, aliqua plumbo, &
 Diuo Ioanni dicatum cupro, tecta erant; Cæ-
 sorum numerum referre vix quisquam posset,
 certum tamen est, plures flamma, quam ferro
 perijsse, nam apertis cellis, & fornicibus, in-
 plerisque tres, quinque & plures fœminas, ac
 pueros fumo, flammaq. enectos reperire erat;
 neque ex sepultura numerū supputare licuit,
 cum cadauera Tyllius in flumen iusserit proj-
 ci, vt milites sepeliendi labore liberaret. Sunt
 qui ad septē millia ciuium in eo excidio mor-

tem occubuisse dicant; Superstitum quoque numerus incertus est, cum captiui in varia castra distributi fuerint, & profugi in diuersa loca se contulerint, supra tamen quadringentos fuere, quorum aliqui cum vxoribus, & filijs diu a Cæsareis detenti, aut precio persoluto se redimere, aut fuga euasere. Militum promptissimi pugnando ceciderunt, cæteri, qui segnius rem gessere, projectis turpiter armis in deditiōem accepti sunt, ex Cæsareis pauci admodum desiderati, cum tantum primo ingressu Falchembergium resistentem inuenerint, postmodum pugnaverint nusquam. Sic Magdeburgum cecidit, libera Germaniæ ciuitas ad Albim sita, antiquissima, nobilissimaque. cuius excidium ducentis ferme abhinc annis indigena vates elegiaco carmine elegāter defleuerat. Memorant ciuitatem hanc a Druso, filioque ipsius Germanico, Augusti Cæsaris tempore, mœnibus cinctam, cum antea pagus piscatorum esset, extructoque Veneri Partheniæ templo, Parthenopolim appellatam, cuius significationis nomen, mutato secundum proprium idioma vocabulo, vsque ad finem retinuit; nam Magdeburgum Germanice, idem fere est, ac latine puellarum oppidum, cui significationi alludit Græcum, Partheno-

thenopolis. Hanc ciuitatem Magnus Carolus Cæsar bello Saxonico in potestatem redactam, pulsis Ethnicis sacrificulis, Christianam religionem edoci curauit, Episcopumq. præposuit; Otho magnus a Vandalis, Hungaris, & Boëmis destructam restaurauit; inde in Archiepiscopatum erexit, & innumeris priuilegijs decorauit. Lutherus anno a Christo nato MDXXII. a Catholica veritate seduxit; unde deinceps infinitas calamitates, & clades varijs temporibus passa est, quousque in sua perfidia corruerit; Vrbs erat satis ampla, & potens, multis Parochialibus templis, & Cœnobijs insignita; eiq. aliquot alij Germaniæ Episcopi suberant; Misnensis videlicet ad Albim, Zaitzensis ad Salam, Brandenburgensis, & Hauelbergensis. Sita erat in lata planitie; ipsius mœnia propugnaculis, turribus, & fossis probe muniabantur; ædificia elegantia, amœna fora, opera publica insignia habebat, ornatæque; fuit ab vno latere Albis fluuius insignis, inter maiores Germaniæ non minimus, cuius ripas perpulcher sublicius pons coniungebat; iure utebatur Romano, in Saxonica linguam descripto, omniumque adiacentium populorum causæ huc remittebantur; Atque præter præclara tot ornamenta preciosissimum om-

nium habebat Diui Norberti sanctum corpus, quod ab Abbate Cœnobij, in quo iacebat, pia fraude impijs ciuibus ante nonnullos annos surreptum, Pragam in Strahoffense Præmonstratensium Cœnobium allatum vidimus, numero, & qualitate miraculorū clarum, quodque eam ciuitatem ab exitio seruasse, dum in ea fuit, vel ab ipsis hæreticis creditur. At milites postquam deficiente esca flammæ suppressæ sunt, in ciuitatem reuersi, ruinas perquirere, cellasq. rimari cœperunt, vbi copiosam prædam sunt naëti, cum ciues ignitorum globorum, qui a Cæsarianis iaciebantur, metu, vestes, preciosaq. alia in ijs abdidiissent, tantumq. commeatus, & annonæ ibidem repertum est, vt valde miraretur Tyllius, qui obfessos milites vel pane carere rescuerat: Sed hoc ex auaritia ciuium emanauerat, qui nunquam militibus victum voluerant impertiri, cumque paucis ante expugnationem diebus, panem, & lardum tradere cogerentur, seditionem fere excitauerant; ipse Tyllius xj. Calendas Iunij in ciuitatem venit, repertisq. in templo mulieribus, pueris, ciuibusque nonnullis vitam, libertatemq. condonauit; milites, quorum etiam aliquot ibi erant, quod non strenue se defendissent, increpuit, vitam tamen concessit.

concessit, & omnibus, quoniam per triduum sine cibo vixerant, panem dari iussit: Lutheranos prædicantes vinciri, & in captiuitatem duci voluit; nempe Catholicus, piusq. vir, hos populorum seductores odio prosequetur; mox purgando Cathedrali templo ciues applicuit, in quo tandem post centesimum decimum fere annum, Romano, hoc est Catholico, ritu sacrosanctum Missæ sacrificium celebratū est, ac omnia ciuitatis, castrorumq. tormenta in lætitiæ signum explosa. Posthæc dispositis excubijs, mandatum, vt prædæ finis fieret, eaq. quæ supererant, vt superstites ciues sibi quærerent, vsuiq. suo applicarent, concessum. Tales erant vtrunque conatus, hocque modo res inter Cæsareos Suecosque se habebant, dum Cæsar milites vndique colligeret: pulsabantur vbique conscribendis militibus tympana, clangoribusq. tubarum omnia perstrepebant, atque ad belli sumptus in Boëmia, Morauia, Silesia, Austria, Stiria, Carinthia, alijsque hæreditarijs Cæsaris prouincijs, nouæ contributiones, vectigaliaq. imponebantur: neque fœderati Catholici Principes causæ deerant, auxilia quæ poterant subministrantes. Ex parte quoque Regis magni fiebant apparatus, nam Hornius in Marchionatu prope Silesiam

fiam duas peditum, & vnam equitum legiones conſcribebat, & in Anglia pro Goſtauo milites paſſim colligebantur, habebanturque in Suecia, & Boruſſia delectus; Electores item Saxo, & Brandemburgicus, Landgravius Haſſia, cæteriꝑ: Proteſtantes exercitum parabant, tamenſi non aperte contra Cæſarem id facere profiterentur. Conſœderatorum etiam in Belgio ordines, quibus iſti Germaniæ ſuperioris motus vriles erant, partes fouebant, & quoniam milites dare nequibant, quinquaginta florenorum millia ſingulis menſibus ſe Regi numeraturos polliciti ſunt. Ex finitimis vero Principibus Rex Poloniæ, qui ob pactas cum Rege Sueciæ inducias, Cæſari præſto eſſe non poterat, nihil mouere voluit; Cæſari tamen conceſſit, vt in ſuo Regno quot vellet milites conſcriberet. Rex Daniæ quoque, quoniam ſeruare pacem cum Cæſare ambiebat, neutrum partium eſſe ſibi elegit, & quamuis a Sueco ad communia ſacra proferenda inuitaretur, in conſilio perſtitit, & inſtructa viginti nauium claſſe ſuas oras tuebatur, Sueco fortaiſſe minime fidens; nam inter Suecos, Danosque immortales ſemper viguere æmulationes, cū vtrique Septentrionalium regionū Imperium ſibi arrogent, Sueciꝑ. aliquando a Danis moleſtati,

lestati, & subacti fuerint. Verum Danus cum instructam a se classem suspicionem Gostauo dedisse resciret, datis ad eum litteris, otioso animo, quod ad se attineret, esse iussit; cupere se pacem, neque velle nouis bellorum tumultibus immisceri; parasse ea naues, quoniam cum occasione bellorum piratæ quandoque excurrant, suum Regnum ab eorum incurSIONIBUS securum esse volebat; cæterum se ea omnia pro Rege facturum, quæ salua cum Cæsare pace, facere posset. Anseaticæ fœderis ciuitates nulli parti adhærebant, cumque in earum ditioribus milites pro Rege conscriberentur, publicato edicto id prohibuerunt. Lubecenses præsertim, atque Hamburgenses in Cæsarem proniores erant; verum nil audebāt palam, ne bellum in se conuerterent. At Gostauum expugnatio Magdeburgi mirū in modum perculit, videbaturq. sibi datam ciuib. illis fidem fefellisse, atque ideo non parum Saxoni, & Brandenburgico succensebat, qui se, dum obseſſis suppetias iret, remorati erant; & quoniam Germanorum Principum adeo labilem fidem obseruauerat, de reditu in Megapolim, & Pomeraniam cogitabat, in quibus bellum defensuum gereret; sed cum inglorium putaret cedere, vbi necessitas non vrgeret,

ret, cœpta pro virili persequi constituit; Quod si Principes illi, qui se inuitauerant, promissis stare detrectarent, adhibere vim decreuit, vt de ipsis cautiore redderetur. Repetebat post dirutum Magdeburgum Elector Brandemburgicus Spandauiam, quam concesserat Regi, donec obsessæ ciuitati auxilium ferret, & Rex postquam retinendi prætextus euanuerat, datam fidem seruare voluit, diductoq. præsidio, repetenti Electori restituit: At verò dum Spandauia recederent Sueci, totus eorum exercitus circa Berlinum consedit, missusq. a Gostauo tubicen nunciauit, velle Regem vt portæ suis copijs paterent, alioquin adhibiturum vim, & de cædibus ac direptione excusatum fore; atque vt ostenderet minas haud vanas esse, dispositis tormentis, Electoris palatium quati mandauit; ferunt tantam fuisse Regis iram, vt vix post quartum diem ab affinibus fœminis, quæ extra ciuitatem oratum venerant, placaretur, ne ciuitatem illam diriperet. Electorem tamen oportuit Spandauiam denuo absque vlla conditione dare, tricena thalerorum millia singulis mensibus data cautione polliceri, & liberum transitum per totam suam ditionem Suecis concedere. Scilicet docuerat Bogislaus modum, quo quasi coacti Principes Germa-

Germaniæ deficerent; cæterum ego putarem neque adeo iratum Regem, neque adeo placatu difficilem fuisse, sed ficta omnia, ut perfidia deficientium necessitate prætexeretur. Rebus hoc modo cõpositis Gostauus nauem ascendit, secundoq. Viadro Stetinum nauigauit, ut maiores copias cogeret, quibus cum Tyllio congregi posset; Atque dum Stetini moraretur, Moscouiticos Legatos audiuit, qui a suo Duce auxilia ad præsens bellum offerebant: Inde his cum gratiarum actione dimissis, donatisque, ad Grysaldiam expugnandam mouit, ut nihil in Pomerania Cæsari relinqueret; est Grysaldia totius Pomeraniæ munitissima ciuitas, cum natura, tum arte, quam Sabellius immisso numerofo præsidio, præfectoq. Perusio exercitatisimo milite muniuerat; eam Sueci obsederant post occupatum Deminum; durauitq. ea obsidio vsque ad finem Iunij, ac in longius tempus protracta esset, nisi Perusius, dum erumperet, dimicās occubuisset; nam præfecto demortuo præsidiarij cum auxiliij nullam spem haberent, æquis conditionibus deditionem fecere, atque Rostochium secesserunt. Anissa Grysaldia in Pomerania pro Cæsare nullus amplius locus tenebatur, quapropter Rex, qui ad eam expugnandam

gnandam tendens, ipsius deditiōem acceperat, cum ex ea parte sibi non amplius timendum censeret, omnes copias in nouam Marchiam iter facere iussit, vt Cæsarianis resisterent, qui regionem excursionibus infestabant; nam quamuis post captū Magdeburgum Tyllius in Hassiam maiorem militum partem duxisset, Ghettius tamen Cæsarianus tribunus, qui cum multis alijs circa Magdeburgum remanserat, Cobusium occupauerat, vbi Bocchius pro Rege legionem conscribebat, omnesque collectos milites obtruncauerat. Inter felices Suecorum progressus Megapolitani Duces, qui ditione a Cæsare ob perfidiam priuati hæcenus Lubecæ vixerant, collectis sex fere militum millibus, Megapolim inuadere, & sibi recuperare decreuerunt; Gandebusij itaque coactis militibus, circa finē Iunij Suerinum aggressi, expugnatoq. eodem die loco, arcem obsederunt, quæ non diu ipsos remorata est, cum munitionibus defensores carerent: Suerino in potestatem redacto, Suecorum, quos a Rege habuerant, adminiculo, intra paucos dies Megapolim fere totam subegere, cum rara in ea prouincia Cæsarianorum essent præsidia, atque indigenæ lubentes ob sectæ congruentiam priores Dominos exciperent:

Sola

Sola Rostochium, Vismaria & Damitium, in quibus potēs erat præsidium, seruata sunt; Post hæc Duces solenniter, assistente Rege, qui ad solennitatem accurrerat, Gostrouium ingressi, a subditis Domini salutati fuere, quos Rex sacramento liberos pronunciauit, quod Vollestawino tanquam Domino dixerant. Huius solennitatis peractis festiuis ludis, Duces per totam suam ditionem Commissarios ablegarunt, qui exules suis bonis restituerent, omniaque in pristinum statum vindicarent; Inde copiæ missæ, quæ Vismariam, & Rostochium obsiderent, nam his captis Damitium
 12 nullius erat momenti; Rex vero postquam hæc ita disposuit, Brandenburgum & in nouam Marchiam ad exercitum profectus est, vt propius Tyllium accederet. Prima ipsius molimina contra Popennaimum fuere, qui circa Burchum, cum aliquot equitum, & peditum millibus castra habebat; nitebatur Rex ipsum a reliquo exercitu excludere, circumiacentia oppidula statiuorum specie occupans; Popennaimus vero cognito Regis astu, cum suis copijs Magdeburgū se recepit, & Rex Tanghermundam, & Verbenam oppida ad Albim sita occupauit, vtque ad libitum Albim transmitteret, coactis vndique nauibus, pontem apud

Verbenam instruxit, militesque inter eam & Tanghermūdā in vtraque fluminis parte in staliis locauit, inde obseruaturus quid Tyllius moliretur. Nam erat hic situs ad ea obseruanda commodissimus, quæ in Megapoli, ditione Magdeburgica, & veteri Marchia gererentur; vnum restabat incommodum, quod cum Cæsariani superioribus ad Albim regionibus adhuc potirentur, ex ijs com meatus haberi nequibat, vnde aduerso flumine, vel curribus ex veteri Marchia, & Megapoli magna cum difficultate erat quærendus; Quod incommodum vt tolleret Gostauus, misso Bannerō Hauerbergam non sine defensorum clade fur- tiuo aggressu expugnauit; Vnde beneficio Haueli fluminis secunda nauigatione ex veteri Marchia sufficientem com meatum provide-
 13 bat. Tyllius interim contra Guilielmum Hassiæ Landgrauium exercitum duxerat, vt ipsius conatus reprimeret, atque ab ea parte suspi- cionem sibi tolleret, quo Regem intensius postmodum persequeretur. Nolebat Landgrauius copias dimittere, quas conflauerat; & contributiones porrigere, atque hospitia Cæsareis concedere abnuebat; decretoq. Lipsiæ a Protestantibus factō inhærens, arma contra Cæsarem sumpserat, & loca aliquot inuaserat,
 iamque

iamque imminabat ipsi Tyllius, cum eorum, quę a Rege gerebantur fama ipsum reuocauit: maioris enim momenti rebatur Tyllius Regi occurrere, ipsiusque retundere audaciam, ne felici eius fortuna reliqui Principes, qui in fide adhuc perseuerabant, attraherentur, quam perduellem Landgrauium punire, neque defuturum tempus, quo ab isto pœnas exigeret; Volmerstadium itaque versus castra mouit, vt apud Verbenam Regem adoriretur; sed Rex vbi per exploratores consilium Tyllij odoratus est, Cæsareos itinere, æstuq. fatigatos surtiue aggredi constituit: Verbenam itaque cum toto equitatu, & aliquot peditum signis, quibus equos tribuit (Dracones appellantur) Tanghermundam progressus, hostem viginti a se passuum millibus distare cognouit; atq. cœptis insistens noctu Cæsarei equitatus prima statiuā aggressus est; fecerat ea die Tyllius congregiendi cum hoste cupidus, triginta miliarium iter, hæserantq. tribus in pagis tres equitum legiones, quibus exercitus frontem tenere obuenerat, & milites fessi, dispositis excubijs, quieti se dederant, cum Suecus altera ante lucem hora maximo impetu eos adortus est: neque defendere se poterant somnolenti, inermesque, cum præsertim equos ascendere, seq.

impe-

impedimētis explicare tam cito non possent ,
 quin prius a Suecis deprehensi trucidarentur .
 Atrox vbique rerū facies , ac larga strages edi-
 ta , tresque illæ legiones omnino deletæ sunt ;
 Inde exoriente iam sole , reliqua quoque Cæ-
 sarianorū statua inuadere Gostauus parabat ,
 sed iam cognito ipsius aduentu exercitus circa
 Generalis Ducis hospitium conuenerat , quo
 explorato Sueci , cæsarum legionum impedi-
 menta deprædatis, opimaq. præda onusti, Tan-
 ghermundam pedem retulere; & cum viribus
 præstare Tyllium Rex sciret, vnus prælij aleæ
 totam rem committere respuit, atque ideo de-
 ferta Tanghermunda , omnem exercitum in
 castris circa Verbenam disposuit , ibiq. in suis
 munitionibus Cæsareos opperiebatur . Porro
 Tyllius vt acceptam cladem vlcisceretur, Ver-
 benam versus castra mouit, vtq. cum hoste, si
 sui copiam faceret, acie confingeret, si respue-
 ret, ipsius castra impetu aggrederetur . Nonis
 Augusti circa castra Suecica Cæsareus exerci-
 tus confedit , eademq. die acriter velitatum
 est ; tres sequentes velitationibus itidem in-
 sumptæ, quarta demum cum castrorum expu-
 gnationem nimis difficilem Tyllius cogno-
 uisset, cum instructa acie propius accessit , vt
 hostem lacefferet ; sed Rex suis munitionibus
 se con-

se continuit, crebrisque tormentorum ictibus non sine damno Cæsarianorum aciem infestabat. Tyllius itaque cum opere precium non censeret castra adoriri, quæ bene admodum munita erant, neque in eo loco manere, ob annonæ, & pabuli penuriam posset, discedere constituit, aliaq. tentare, quibus Regem in aperta deduceret; conclamatis itaque vasis eadem die Tanghermundam reuertit; hinc post aliquot dies prope Islebium castrametatus est; ac ut suas copias augetet (namque Protestantes multos milites contra se iam collegisse cognouerat) atque aliquid momenti tentaret, Comitum Fyrstembergium, qui in Abbatibus Fuldenfis ditione, cum militibus recens a Catholicis fœderatis conscriptis, statiuam habebat, iamque Hassiam inuadere constituerat, ad se vocauit; & cum ipso xiiij. Calendas Septembris se coniunxit. Erant in Fyrstembergij exercitu quadraginta peditum signa, & triginta equitum turmae, constabatq. iam totus Cæsarianorum exercitus quadraginta fere militum millibus; & propter Tyllius non amplius dissimulandum ratus, Ioannis Georgij Electoris Saxonici animum explorare decreuit; missis ea de causa Legatis ab eo postulauit, ut si Cæsaris esset amicus, copias, quas collegerat,

legerat, ad Suecum repellendum sibi traderet, & hospitium, commeatumque in suis ditionibus Cæsarianis concederet; verum Saxo suam perfidiam vltcrius nō dissimulans, varijs adhibitis excusationibus, omnia rotunde negauit, quamobrem Tyllius lustratum prope Halam exercitum in Electoris ditionem duxit. Putabat Tyllius si Saxoniam ingrederetur fore, vt Electorem non solum affligeret, sed & Regem ex suis munitionibus, quibus prope Verbenam immotus insidebat, eliceret, cogeretq. (quod & euenit) ad prælium; sic expugnatis Merspurgo, Frayberga, Michelna, Vaissefelda, alijsq. Misniæ ciuitatibus nonnullis, quæ apud Salam sunt, Lipsiam castra mouit, petijtq. contributiones a ciuibus, & commeatum, quæ cum ciues se daturos inconsulto Saxonie negarent, postridie Iduum Septembris ciuitatem obsedit, cuius suburbia, quæ ad Boream vergūt ciues, ne sibi damno essent, quasi ad extremum vsque se defensuri, iniectis ignibus destruxerant; Cum vero minaretur Tyllius, se cum ipsis pariter, ac cum Magdeburgensibus acturum, minis exterriti, atque ciuitate non probe munita, secundo ab obsidione die certis conditionibus deditionem facere, & Saxonici præsidarij cum sarcinis, tympanis

panis sonantibus, armis, & accensis funiculis
 15 egressi sunt. Dum hæc in Saxonis ditione fierent, Elector vigintiquattuor militum millia, prope Torgauium collegerat, vt Tyllio resisteret; sed cum se ad hoc imparem cognosceret, Arnemium suorum castrorum præfectum ad Regem ablegauit, qui ipsius auxilium imploraret; Se Rex iratū contra Saxonem fingebat, quod ille excidij Magdeburgici potissima fuisset causa, cum nec transitum quidem exercitui per suam ditionem concedere voluisset; Negabatq. se suum exercitū discrimini obiecturum, eique subsidium allaturum, nisi Elector palam suam fidem obligaret, se fortunas, & vitam pro religione libertateque tuendis impensurum, atque sibi Vittebergam, filiumque primogenitum pignori daret, numeraretq. exercitui trimestre stipendium. Videbantur Electori conditiones admodum duræ, petitaq. stipendium omnino tradere nequibat; at vrgebat necessitas maximum telum, cuique parere tunc temporis omnino oportebat; concessit itaque omnia, quæ Rex petierat; vnum stipēdium trimestre excusauit, quod se nullo modo posse dare asserbat, daturum se ad manum menstruum stipendium, pro reliquo satisfaturum; sic Rex accepto Electoris

filio & Vitteberga, cum menſtruo ſtipendio, ſe ideo hæc feciſſe dixit, vt experiretur, an Elector ſerio ageret, ac ſibi prorsus fideret, quod hæcenus cognoscere non potuerat, in poſterum ſe ipſi totis viribus aſſuturum, quãdo iam de ipſius animo certior eſſet; ita poſtquam omnia, quæ petierat accepit, hominem illudebat; & quoniam ipſius quoque intererat, vt Tyllius proſtigaretur, relicto in caſtris apud Verbenam ſufficienti præſidio, cum ſedecim peditum, & tribus equitum millibus, Vittebergam venit, ductoq. duorum dierum ſpatio per pontem cis Albim exercitu, Tubenam ipſe xvij. Calendas Octobris conceſſit, vbi Electores Saxo, & Brandemburgicus quoque cõuenerant, vt ſuper rerum ſtatu conſuleretur. Ibi iterum inter Regem & Electores fœdus iſtum, diſceptatumque eſt de modo belli gerendi, nam cenſebat Rex vnus prælii aleam non eſſe ſubeundam, ſed traducendũ tempus, & paulatim vires hoſti frangendas, cum ille in hoſtili ſolo moraretur, nullaq. amplius ipſi auxilia ſupereſſent; ſic, addita pabuli, & annonæ penuria, per ſe conſumptum iri, ſine partium diſcrimine; ſe contra in amica regione eſſe, & breui maiora aduentura auxilia, quibus minimo periculo hoſtem opprimerent; Saxo con-

tra, cuius ditio desolabatur, instabat, vt totis viribus confingeretur, quandoquidem hostis alia ratione ex suis finibus expelli non posset, nec prouincia ad duos exercitus alendos sufficeret, maiori parte ab hoste iam occupata. Sibi satis virium esse ad Tyllium profligandum, cum numero, & virtute militum præstarent; auxilia, si tempus traheretur, vtrunque æqualiter affutura, nam & pro Cæsare in Germania militem colligi, & aduentare ex Italia Aldringerum cum veterano exercitu, qui si Tyllio coniungeretur, partes valde erat afflicturus; neque expectandum a fortuna auxilium, vt hostis defectu annonæ, & pabuli consumeretur, vbi industria, & virtus locum haberent; se vicisse simulac aggrederentur: His rationibus Elector Regem in suam sententiam traxit; coniunctis itaque exercitibus xvj. Calendas

16 Octobris Lipsiam versus mouere. Præsidium imponebat ciuitati Tyllius, cum ab exploratoribus venire cum exercitu Saxonem accepit; namque exploratores solum Saxonem esse dixerunt, qui non bene hostem erant scrutati; atque hoc commune est incommodum ijs, qui in hostili solo bellum gerunt; nam cum indigenis exploratoribus adhibere fidem nequeant, suosque non bene regionem callen-

tes habeant, hostium consilia, ut plurimum, penetrare non possunt, cum sua contra passim prodantur, sequiturque hoc incommodum, tot commoda, quæ ex gerendo bello in aliena ditione resultant; ita Tyllius, ut dicebamus, solum Electorem esse putans, qui Lipsensibus auxilium ferret, relicto Lipsiæ mille peditum præsidio, xv. Calendas Octobris exercitum in hostem duxit, progressusque quinque ab vrbe passuum millia, prope Podelbitium pagum, hostium prima agmina in conspectu habuit; Extenditur circa Lipsiam, & per totam fere Misniam lata planicies, neque cum sudum est cælum in toto Horizonte motem, collemue conspiceres; distinguitur crebris nemoribus tantum, atque alicubi humus leniter incuruatur. Erigitur prope Podelbitium situs, in circumiacentes campos paululum despiciens, videbaturque hic possidenti non exiguum in conflictu commodum allaturus, quamobrem Tyllius misso equitatu illum occupare destinavit; idem decreuerat & Rex, eodemque equitatum suum miserat, sed iam locus a Cæsareis tenebatur, neque eos expellere Sueci potuerunt, quamuis facto impetu summa vi institissent; nam accurrente toto Cæsarianorum exercitu repulsi sunt. Hinc Tyllius tormenta opportunis locis

locis distribuit, aciemq. in tumulto instruxit, in vestigio hostem expectaturus; nam cum a leuioris armaturæ equitibus, qui prope hostis aciem excurrerant, vexilla Regis adesse intellexit; Regē quoque venisse coniecit, quod & captiui affirmabant; satius igitur duxit situs beneficio uti, atque in tumulto hostē opperiri, cum insuper ventum, qui ea die vehemens flabat, secundum, solemq. non auersum haberet. Gostauus vbi Tyllium tumulto insedisse vider, periculum cognoscens, cui se, suumq. exercitum obijciebat, si recta contra hostem, aduersumq. ventum, tenderet, ad dexteram ita processit, ut ventum milites ex latere exciperent, puluisq. ab eo actus oculos non infestaret; atque ita dextram ipse partem tenens, Saxo sinistram, Cæsareos propius accedebant. Clangore tubarum, & tympanorum reboatu obstrepebant adiacentes siluæ; militumq. fremitus, dissono linguarum concentu, aures offende-
bat; eratq. non iniucundum spectaculum, cernere tot hominum millia, diuersorum patria, natalibus, religione, per cuneos, per rhombos miro ordine disposita, atque in mutuam necem armata, librato, harmonicoq. gressu quasi vnum corpus moueri. Mox vbi ad tormenti ictum peruentum est, fixo militum gradu, re-

du, reparare acierum ordines omnia discurrés
 Rex cœpit. Medium fere cœli occupabat iam
 sol, cum Tyllius proximum iam hostem vi-
 dens, ante frontem sui exercitus ætate, rebusq.
 gestis venerabilis senex, se stitit; Et, exopta-
 ta tandem, inquit, commilitones dies adue-
 nit; hostem in conspectu habemus, non de-
 trectantem amplius pugnam, aut per fallaces
 assultus nobis illudentem; conatusue nostros
 deinceps fuga declinantem. Iam audet, sibiq.
 temere confusus aggreditur, loci iniquitatem
 spernit, vestram virtutem negligit, delirat,
 furit, ut nobis facilior sit victoria. Neque ego
 aliud aut optassem, aut optare iure merito po-
 tuissem, quam ut hostem fiducia sui, nostri
 contemptus incesceret, utque verum fatear ab
 huius belli initio, nihil tam excupiui, quam ut
 mihi acie cum hoste dimicandi copia daretur;
 ideo ego huc illuc vobiscum peruagatus sum;
 ideo in Saxonis ditionem vos duxi, ut Regem
 istum, qui nisi castris obtegatur, pugnare ne-
 scit, extra suas speluncas, ubi insidijs tantum
 valet, in apertum aërem elicerem; nam hoc
 solum mihi laboris reservavi, cætera vestra
 virtuti credidi. Favit meo desiderio Deus, imo
 plus dedit, quam expeririimus, non enim so-
 lum nobis hostem in aperta deduxit, ubi fru-
 stra

fra suas molietur insidias, sed temerarium, incautum, amentem fecit; en quomodo spreta militari disciplina nobis situ munitissimo in acie dispositis assultat! Atqui nos diuino fauore utamur, patiamur efferi, intumescere, & fessum inordinatumq. accedere permittamus, ut maiori cum impetu in illū irruamus, & vincamus sine nostro sanguine. Et quantulus erit labor imbelles rusticos ligoni, aratroq. assuetos, non ora, non manus solum, sed voces ipsas militum trepidantes, fundere, trucidare? Adest magnus ille Rex quidem, ille fortis, ille inuictus, qui nihil nisi per insidias audet; ast hic stratagemmata erunt irrita, neque Magicæ superstitiones illum seruabunt. Habet secum ex suis militibus, fateor, sed quot, quantosque? Non supra tres, vel quattuor equitum legiones adduxit, ad tumultuariam expeditionē, quos ne militum quidem nomine dignor, cum non militum, sed grassatorum more noctu, ex improviso, per insidias, contra inermes, bellum gerere profiteantur. Credite milites, Rex ad augendam nostram gloriam venit; post victoriam, atque ubi ipsum ceperimus, Regem adfuisse dicemus, nunc quasi nō adesset existimandum est, cum exercitum secum non habeat, suis artibus uti non possit; castrisq.

castrisq. Verbenensibus non defendatur. Pugnamus pares, vel superiores forte numero, milites, cum perduellibus Saxoniarum rusticis, quos vel sola sua perfidia vincet, nos victoriam, prædam, & gloriam reportabimus; & quoniam hodie nobiscum militat pro sua causa, contra perditos hosce hæreticos, Deus, hæc dies bello huic Suecico, laboribusq. nostris, capto, occisive Rege proculdubio finem faciet; nisi vos, qui fortissimas nationes debellare mecum soliti estis, vestrae virtutis oblit, a Saxoniarum rusticis vinci patiamini, Deumq. & vestrum Principem debita opera defraudetis. Interim dum Tyllius hæc edisserit, Popennaimus per aciem discurrens, ordinesq. lustrans, milites item ad strenue se gerendum hortabatur, alijs emerita stipendia, alijs decus familiarum, alijs præmia, & prædam ob oculos ponens; adesse laborum finem; restare solatia, præmia, & prædam, si vincant; si succumbant spem salutis non habendam, positis inter medios hostes procul patria, amicisq. regionibus, neque qua erumpere possent, patere: recordarentur sui, patriæ, Catholicæ religionis, omnia ex hoc vno prælio pendere; reputarent animo qualis, si superaretur, superstitionibus futura esset infamia; præstare ingenuum militem in acie

cade-

cadere, quam victum superuiuere. Neque vero Gostauus silens suam aciem disposuit; sed postquam ordinum generalibus ductoribus mandata dedit, ad primos se transferens, habitu, ore inter cæteros insignis, ita locutus esse fertur. Ecquisnam, cõmiliones, putasset fore; ut postquã profugi isti Ghercio, Francosurto, Lansperga, Demino, alijsque locis, quæ strenue expugnauius, precariam vitam periculo exemere, nunc iterum post inflictas nobis, amicisq. nostris nouas iniurias, vltrices vestras dexteras vellent experiri? Scilicet quæ contra Deum peccata admiscere eos ad iustas, meritasque pœnas luendas trahunt. Multum audet senex iste Tyllius, audaciam laudo; sed ille virtutis vestræ non adhuc periculum fecit, milites; valere pluris se putat, quam cæteros, quos superauimus, duces; arrogantia est hæc, non audacia; præstare illi credidisse, quam expertum esse, ni solita vos virtus deficiat; iamque timens præceps consilium desereret, & retrogrederetur, si posset: nam videtis quo pacto cunctabundus illi tumulo inhæret, nihil mouet, nihil tentat, nihil audet; vestet illum, milites, aspectus exterruit, quos nemo hostium vidit; quem vidisse non pœnituerit. Insidet editiori loco, situ se muniuit, qui de suis viribus,

bus, & fortitudine desperat, quasi nos eo ascendere, & in paucos irumpere non valeamus. De hoc ego summopere lator, quod collectum hic hostem habeamus, quem una die delere possumus, neque opus erit diuersa in loca diffugientem, hac latitantem quærere, & manipulatim profligare. Nos superiores numero sumus, virtute quoque, milites, præcellitis Cæsareos, ni toties facta experientia falsum edocuit; quid necessario ex his debemus conijcere? nonne nostra est victoria? nonne hoc uno prælio totum bellum vincemus? nonne tota deinceps Germania nullo negotio potiemur? sic erit milites; auguror, præsens solus restat labor; iterum vincendi sunt victi isti; cæterum confectum est bellum, nostra est Germania; amicos nostros, nostram religionem in pristinam libertatē asseruimus, & attigimus scopum, propter quem ex cara patria egressi sumus, rurumque ab honesto, gloriosoque in Sueciam reditū prohibemur, quantum ab hisce profugis detinemur. Si igitur, milites, vobis honos, patria, religio curæ sunt, solitam mihi operam præstetis: Hæc Rex, & Saxo cum prædicantibus manipulos suos concionibus ad prælium accendebat; promittebat strenuis terrena, & cœlestia præmia, ignauis

pœnas

pcenas in vtraque vita minabatur; commendabat vxores, patriam, Lutheranam sectam, & in hoc certamine omnia stare asserēbat. Mox iubente Rege acies moueri cœpta lento gressu propius tumulum venit. Hic explosis vtrunque bombardis miserorum magna strages est edita, & Cæsarianorum machinæ, quæ paulo editiore loco erant sitæ, vndique atfligebant hostes, Saxones præsertim, qui ictibus magis erant obnoxij. Sueci item suis machinis, quas opportune Rex disposuerat, Cæsarianos dilacerabant; vixque credibile est, quot in hoc prælio machinarum ictibus discerpti sint. Inde vbi parum supra tumulum Sueci ascendere, Cæsareus peditatus loco se mouit, declinatq. ad suam dexteram hostilibus tormentis, impetu facto in Saxones irrupit. Equitatus, cum Ducis Holsatiæ peditum legione, ad sinistram facto magno circuitu, vt item tormenta effugeret, Suecos inuasit; hinc vbi cominus conferendi manus copia facta est, omnia misceri, turbari ordines, signa euerti, homines, equos, integros manipulos corruere, occisorem sæpius supra occisum vario mortis genere cadere vidisses; hic omnes artes, quas, in hoc detestanda, mortalium industria ad sui generis exitium inuenit, exercebantur, quod-

que durius videbatur, dum occiso hoste victor miles exultat, fortuito vel sclopi, vel bombardæ ictu, ab eo, quem in conspectu non habuit, occumbit; sic pluris fortasse virtute in modernis prælijs fors valet; quid enim fortitudo iuuat, aut astus, vbi a plumbearum glandium portentosa pluuia fortes pariter, atque ignaui opprimuntur? Victoria per duas horas anceps pependit; hinc primi Saxones, quos Tyllius cum peditatu adortus fuerat, sua ignauia, & hostium virtute superati, cedebant: iamq. in apertam fugam se dederant, cum Rex, qui equitatum Cæsareum post leuē pugnam in turpem fugam coniecerat subsidio vacillantibus astitit; tunc reparatis ordinibus, fixoq. pede, victores iam Cæsareos cohibuit, præliumq. renouauit. Acriter vtrinque dimicatum donec vergente ad vespēram die, Cæsariani paulatim retrocedere cœperūt; nam cum pedites ab equitibus fœde destituti, hinc a Suecis, inde a Saxonibus premerētur resistere amplius non poterant; quapropter Lipsiam versus integris ordinibus se recipientes, victoriam hosti relinquere. Sequebantur gnauius Sueci victoriam, & ad internecionem Cæsareos delenuissent, ni a superuenientibus tenebris detenti essent; nam Rex cum obcœcari cœlum vidit, receptui tubas

bas canere iussit, ne sui milites forte in hostium insidias inciderent: vnde se recipiendi Tyllius tempus habuit, resumptisque ea nocte Lipsię viribus, vbi tria millia militum reliquit, qui hostem remorarētur, sequenti die, secunda ante lucem hora, magnis itineribus, per Turingiam in Franconiam, ad restaurandum exercitum, profectus est: Sueci fugato hoste ad locum pugnæ; vt spolia colligerent, redire: Durauit hic conflictus quinque integras horas, cecideruntq. in loco pugnæ ad duodecim millia vtrique; at in fuga ex Cæsareis a persequentibus Suecis, assultantibusque rusticis, plusquam tres mille periere; atque inter alios illustres viros, Adolphus Holsatiæ Dux, quem contra Regem sinistrum agmen duxisse narrauimus, dum equitatus in fugam vertetur, vt ordines restitueret, suosq. ad prælium remitteret, acriter dimicans occubuit. Insignem quoque hanc cladem fecere nonnulli tribuni, Centuriones, nobilesque milites, qui in vestigio mori, quam viuere fugiendo maluerunt; neque Suecis sine sanguine victoria cessit, cæsis promptissimis militum; multisq. Tribunorum, & Centurionum trucidatis; Ac nisi equitatus Cæsareus tam cito in fugam sedidisset, victoriam proculdubio Tyllius fuisset

set consecutus, nam cum Saxones fudisset, quorum iam ordines labefactauerat, atque in fugam verterat, facile etiam Regem oppressisset, qui non potuisset toti exercitui solus resistere. Amissa sunt supra centum vexilla, omnia tormenta, omnes impedimentorum currus: & talis quidem fuit Lipsensis clades, quam
 17 mox tot incommoda secuta sunt. At Rex ubi postera dies illuxit, sequens hostium vestigia, Lipsiam petijt, cumque iam abiuisse Tyllium intellexit, ad expugnandam ciuitatem se vertit, sed quoniam aliquot dierum erat negotium, ne victoriæ fructus marcescere permetteret, relicto ad obsidionem cum suo exercitu Saxone, qui intra paucos dies ciuitatem in deditionem accepit, Merispurgum castra mouit, ubi profugos centenos aliquot Cæsareos deleuit; inde Halam profectus, eam ciuitatem a Cæsarianis desertam in potestatem redegit, arcemque quam Cæsarei adhuc tenebant, vi cepit. Mox occupata Erfordia in Franconiam contendit, vt hostium reliquias deleret. Antequam Lipsense prælium cōmitteretur, Maria Eleonora Sueciæ Regina, cum octo recentium militum millibus Stetinum appulerat, ubi a Bogislao superbe excepta, mediam militum partem ad exercitum misit, reliquos iu
 Mega-

Megapolim, vt ijs Ducibus in recuperatione Rostochij, & Vismariæ opitularentur, ire iussit. Magnam quoque biscocti panis, commeatusque atque apparatusum copiam secum attulerat, ne milites inopia eduliorum laborarent. Sed erant iam hæc superflua, occupante Suecico exercitu fertiliores Germaniæ regiones, incolisque necessaria liberaliter suppeditantibus; & quoniam fortuna suis donis Regem hoc anno cumulare instituerat, ex Anglia, quoque Marchio Hamiltonius, & Lesleus Suecus tribunus, cum quadraginta nauibus, & octo pariter Anglorum militum millibus, Sûdanum portum intrauere. Ferunt Gostauum hoc Anglorum subsidium non libenter vidisse, præsertim cum naues illæ Anglicæ mare Balthicum nauigassent, quas ipse Visurgin petere iusserat. Tantus est Dominiij zelus, vt amicos, eosque a quibus auxilium petimus, habemusque; suspectos habeamus: accedebat Hamiltonij ambitio, qui seorsû ducere exercitum, atque per se bellum quasi aliud gerere flagitabat: quod Rex nullo admittebat pacto, ne gerendo bello æmulum videretur habere, vel confortem, qui solus bellare gloriabatur; sed hæc cito composita sunt, cedente iussu sui Regis Hamiltonio, qui se imperata a Gostauo factu-

facturum spondit, atque cum Suecis se coniunxit. Rex occupata Erfordia in Franconiam tendens, Hennebergensem Principatum inuasit, eoq. subactō, Chinigshouiam Herbipolensis Episcopi munitissimam arcem expugnauit. Ad sistendos hos Regis conatus, Aldringherus, qui ante Lipsensem pugnam Erfordiam vsque progressus, vt Tyllio se iungeret, & post intellectam cladem Herbipolim se receperat, cum Fucchero Catholicorum fœderatorum Duce copias vndique acciuerat: verum nihil omnino proficere potuit, detrectantibus pugnam militibus, qui Lipsensi clade exterriti, manus cum Suecis conferere non audebant. Hac hostium consternationē Rex vsus, Suainfurtum, atque inde Herbipolim recedētibz Aldringero cum Cæsareis, & Episcopo, occupauit; & Herbipolensem arcem ausam resistere, cæsis ad vnum defensoribus expugnauit, vbi non spernenda præda potitus est. Hinc Bambergensis Episcopus cum suæ ditioni imminere periculum videret, essentq. Cæsarianorum auxilia procul, cū Rege quamuis inuitus, transiit, & magno auri pondere incolumitatem mercatus est; Pari facilitate, Gostauus admittentibus, imo vltro inuitatibus incolis, qui Lutheranā factionem sectabantur,

Hano-

Hanouia, Francofurto, Hæchsta, alijsq. oppidis, & ciuitatibus, ad Mœnum, & Rhenum sitis potitus est; magna alacritate, & lætitia excipiebatur Rex ab incolis Lutheranis, qua superstitione magna pars eius tractus erat infecta, neque poterant Catholici hostem arcere, pauci numero, & inermes, improviso insuper deprehensi; multique ex illis mutationem domini flocci faciebant, Cæsareos milites ob petulantiam exosi, cumque religionis vsus a Rege libere cōcederetur. Liberæ item ciuitates nonnullæ, Spira, Argentoratum, Norimberga, aliæq. deficientes suppressum diu venenum euomuerunt; Francofurti Landgrauius Hassiæ suas copias, quæ ad decem millia militum ascendebant, regijs addidit; accingebatq. se Rex ad ferēdum Norimbergensibus auxilium, quos Tyllius infestabat, & præmisso cum suo exercitu Landgrauio, ipse post illum pergere statuerat, cum nuncium accepit, ex Norimbergensi tractu Cæsareos discessisse. Norimbergā Tyllius, collectis sui exercitus reliquijs, iunctusq. Aldringhero circumfederat, quod pedem ex Lipsensi conflictu referenti sibi hospitia negauisset. At cum venire Regem subsidio audiuit, viresq. pares minime haberet, receptui cecinit, & in Bauariam se recepit.

Rex ubi Tyllium Norimberga discessisse intellexit, expugnandæ Moguntiaë animum applicuit, occupatis itaque Chernshemio, Lademburgo, Benshemio, alijsque tractus strataë montanaë oppidis, Rhenum traiecit, expugnatoq. Oppenheimio, Moguntiam obsedit. Erant Moguntiaë tria Hispanorum militum millia, quos Archiepiscopus, Coloniam se recipiens, ciuitati præsidio reliquerat; ij cum aliquot dies se se strenue defendissent, multis difficultatibus tandem pressi, decoris cõditionibus, saluis armis, vexillis, omnibus impedimentis, atque duabus machinis, deditiõnem fecere; Capta Moguntia facile ipsius ditio in Regis manus peruenit, neque remorati sunt incolæ victricia Suecorum arma, ne illorum

19 sãuitiam experirentur. Atque hæc quidem cum suo exercitu Rex; Elector vero Saxoniaë, post receptam Lipsiam, recuperatamq. suam omnem ditionem, cum non adhuc tempus distribuendorum in hyberna militum esset, Boëmiã præsidijs vacuam inuadere constituit; factò igitur per Misniam itinere Regnum illud adortus est. Excepere venientem læto animo Boëmici rustici, qui præterquam quod Cæsareos oderant, scintillas Lutheranæ superstitionis adhuc in pectore alebant, sumptis

itaque

itaque armis, iunctique Electori, Cæsarianos
 vbique opprimere cœpere. Rara erant, & tenuia in Boëmia Cæsaris præsidia, quamobrem
 facili negotio Elector Laitmeritum, Pissechium, Valnicchium, Coslinum, aliaque loca occupauit, & rustici Postelbergium, Ferithum, Brustbaldiam, & Auguditium diripuerunt. Castris deinceps Pragam, regni caput, admotis, Elector mense Nouembri illâ a Balthassare Maradio, qui cum paucos haberet milites tam vastam ciuitatem defendere non poterat, desertam, in deditionem accepit. Est Praga in vmbilico Boëmiæ ad fluuium Moldauam sita, amœnissima latissimaque: in tres ciuitates distinguitur, veterem, nouam & paruam, quarum vltima trans fluuium posita, cæteris pulcherrimo, longissimoq. lapideo ponte annectitur, leues vndiquaque supereminet colles, vnde est, quod minus muniri possit. Urbem ingressus Saxo perduellium capita, quæ turri apud pontem affixa tempore Boëmici belli fuerant, auferri, terręq. mandari iussit; inde omnia comiter agere, blandiri ciuibus, priuilegia concedere, relinquere libertatem religionis, omniaque facere, quibus non Pragenſes solum, sed cæteros etiam facilitatis specie pelliceret. Sola quattuor templa Augu-

stanæ confessioni applicuit, solosq. ex Eccle-
 siasticis Gesuitas, (quos & Rex ex Catholicor-
 um ciuitatibus eijciebat) exulare iussit, data
 ipsorum Ecclesia ijs monachis, qui regulam
 Diui Francisci de Paula venerantur; cæterû ci-
 ues a militibus male excipi minime passus est,
 sed pro vniuscuiusque facultate, Pragensi Se-
 natu dictante, statua distribuit, contributio-
 nesque taxauit. Senatores item, & nobiles a
 statiuorum onere immunes præstitit, neque
 domum aliquam diripi, aut incendi permisit;
 mox vltioribus intentus Egram, eius regni
 præcipuam ciuitatem occupauit, & Comitem
 Turrium cum valida manu misit, qui Budoui-
 tium egregiam munitissimamq. arcem expu-
 gnaret. Verum Balthasar Maradius, qui Pra-
 ga eo cum suo milite se receperat, egregieq. se
 munierat, Turrij conatus repulit, atque obsi-
 dentem, post tentatam in cassum expugnatio-
 20 nem, laudabili constantia frustratus est. In
 Megapoli interim, atque inferiori Saxonia;
 Megapolitani Duces Rostochium obsederat,
 gnauius repugnâtibz Cæsareis, qui auxilium
 a Tyllio expectabant; neque Duces tam cito
 ea vrbe potiti essent, nisi intellecta Lipsensi
 clade obsessi subsidium desperantes deditio-
 nē fecissent. Fuere dedititij ad ter mille, equi-
 tes,

tes, peditesque pari numero, atque in Silesiam cum suis impedimentis deducti sunt; quo facto Duces suas copias Vismariam duxere, ut eam quoque ciuitatem expugnarent, quod intra paucos dies consequuti sunt, cedentibus ob numeri angustiam Cæsareis, qui itidem in Silesiam abducti, inde Damitium aggressi Duces, facile in potestatem receperunt. Iamque ex tota Megapoli Cæsarianos eiecerant, quapropter Suecos milites, donatos congiario, in subsidium Bremensis Episcopi misere, cuius ditionem Popennaimus vastabat, suamq. prouinciam militū onere subleuauere. Secesserat Popennaimus ita Tyllio mandante, in Brunswicensem Ducatum, ut ibi exercitum cogeret, quo inferioris Saxoniae ordines, atque Anseaticas ciuitates, quæ iam deficere inceperant, in officio contineret, atque si posset Rostochio, Vismariæq. auxilium ferret; conscripseratq. iam iustum exercitum, quo Bremensis Episcopi (seruant hæretici Ecclesiasticarum dignitatum nomina) ditionem infestabat, ut ea in Megapolim negatum sibi aditum aperiret. Neque Bremensis defendere se poterat, ni exercitus partem Popennaimus ad succurrendum prædialijs Magdeburgensibus deduxisset; nam Magdeburgicis ruinis præsidium im-

impofuerat, vt cum Albis tranfitum fibi ferua-
ret; verum poftquam Bannerum obfidionem
foluere coegit, cū maximi negotij eſſet illum
tueri, incenſis, quæ superfuerant, vltimam
manum illius ciuitatis excidio adhibuit,
vt ſola veſtigia magnæ quondam
ciuitatis inter cineres appa-
reant; inde in Brunſui-
cenſem Ducatum
rediit, vt Bre-
menſi,
& alijs rebellibus immine-
ret; atque inter tales
tumultus hic an-
nus expira-
uit.

COMMENTARIORVM

DE BELLO SVECICO

LIBER TERTIVS.

Breuiarium Libri .

- 1 Apparatus ad bellum post Lipsensem confectum .
- 2 Caesar Volleſtainum Generalem ſuum Ducem eligit , oratores ad amicos Principes mittit , & Viennam munit .
- 3 Catholici ſœderis Principes Caſari aſſiſtere conſtituunt , Tyllius exercitum reſcit .
- 4 Sueci Norimbergam muniunt , in Alſatiam irrumpunt . Suecia Regina Francofurtum venit , item & Comes Palatinus Rheni . Princeps Dania ad Electorem Saxonie pergit .
- 5 Popennaimus in inferiori Saxonie Proteſtantes aſſigit , Hiſpani Spiram nequicquam tentant , Rex Francofurtum , occupato Cruſenaco , regreditur .
- 6 Rerum in Boëmia ſtatus , in quam Gaſſius Volleſtains iuſſu cum parte Caſarei exercitus ingreditur .
- 7 Hornius Bambergæ potitur , ubi a Tyllio funditur .
- 8 Rex ad ulciſcendam Hornij cladem mouet , cum Tyllio apud Lyciam conſigit ; Caſarei exercitus clades ; Tyllij mors . & elogium .
- 9 Proteſtantes Torgauj corunt , & continuare bellum decernunt .
- 10 Volleſtains Boëmiam ingreditur , Pragam expugnat , & Saxones ex Boëmia expellit .
- 11 Popennaimus inferiorem Saxoniam deuafat , Gaſſiarum Rex Lotharingæ Ducem impedit , qua minus Caſari opem ferat , & Treuirenſem Archiepiſcopum in ſuam tutelam recipit .
- 12 Goſtauus ſiſo Tyllio , Sueuia ſere tota potitur , inde Bauariam depopulatur .
- 13 Ratiſbonenſis Senatus ſuam ciuitatem Regi prodera fruſtra molitur , quam Dux Bauariæ in poteſtatem redigit . Goſtauus Italie inſiat .
- 14 Volleſtains ex Boëmia ad obſidendam Norimbergam venit .

venit, ad quam defendendam Gostaus prior properauerat. Norimbergensis ciuitatis, & tractus descriptio.

15 Popennaimus Brunsvicensem Ducatum expilat, & Bannerum opprimere frustra nititur, in Belgium discedit, & Bannerus Norimbergam.

16 Bauaria Duce suam ditionem recuperat, ad Vollesta-num Norimbergam pergit; exercituum ad Norimbergam status.

17 Arnemius cum Saxonis exercitu Silesiam intrat. Holca cum Casarei copijs Misniam deuastat; Austria rustici rebellionem ceptant, ac opprimuntur.

18 Vollestaenus nouas copias ad Holcam mittit; institutus pacis tractatus dirimitur. Gostaus Vollestaenum ad praelium laceffit, qui suis munitionibus continetur.

19 Gostaus nostra castra noctu aggreditur, a quibus magna cum clade repellitur; ac inde in Franconiam recedit.

20 Vollestaenus Gostaum sequitur, quem cum secedere in Wirtembergam intelligit, deserit, atque in Misniam exercitum ducit. Norimbergenses Snaueobium recuperant. Rex ad restaurandum exercitum in Wirtembergam diuertit; & Banne-rum ad infestandam Bauariam mittit.

21 Bauarus ad tutandam suam ditionem a Vollestaeno discedit, qui in Misniam ulterius progreditur, & nonnullas ciuitates occupat.

22 Saxo Regem in Misniam vocat, qui confestim adest, Vollestaenus Popennaimo se iungit, & contra Regem tendit.

23 Varij utriusque Ducis apud Vaisensfeldam conatus, tandem Vollestaenus detrectante pugnam Rege, Popennaimum cum magna exercitus parte Coloniam Agrippinam in subsidium mittit. ipse in hyberna exercitum ducit.

24 Gostaus Vollestaenum apud Lutzen aggreditur, cui subsidio adest Popennaimus cum sui exercitus parte, committitur atrox praelium, in quo Popennaimus, & Gostaus occumbunt. Casarei amissis tormentis Lipsiam se recipiunt.

25 Quid usque ad finem anni gestum; exercituum in hyberna secessus.

Gesta hæc anno M DC XXXII.



Vas post Lipsensem cladem
prouincias Gostauus bre-
uissimo temporis spatio,
nulloq. negotio, in pote-
statem redegerit, conside-
ranti mihi in mentem ve-
nit, quanti aduersa fortu-
na sit roboris in detegendis mortalium ani-
mis. Conspirauerant quidem Protestantes,
& liberæ ciuitates in Cæsarem, neque suam
causam promouenti Regi studijs clandestinis
decrant; verum dum Tyllius stetit, atque æqua
lance fors pependit, quotusquisque eorum,
qui Regem acciuerant, arma sumpsit, palamue
id profiteri est ausus, quod intimis præcordijs
agitabat? Bogislaus, qui primus Regi occur-
rit, quamuis hos motus percupiuerat, necessi-
tate tamen defectionem prætexuit; nonne &
idem Brandenburgicus fecit, & Saxo tandem,
desperato fallendi modo, in arenam descēdit?
At fuso Tyllio, profligatoque Cæsareo exerci-
tu, omnes passim in seruitium ruere, arma ca-
pere, sponte & sine prætextu ad Regem defi-
cere, auxilia, milites, pecuniam ipsi porrigere,
Cæsaremq. innumeris iniurijs onerare. Hæc

me in eam sententiam fere deducunt, ut rears, præstare Principi timeri, quam amari, postquam hominum amor officijs inaccessibilem se reddit. Quid enim unquam omisit Ferdinandus pius, iustus, liberalis, affabilis Princeps, ut a subditis amari mereretur? aut quid omnino commisit propter quod ita deseri debuerit? memini ego cum mihi sermo esset cum præcipuis Cæsaris hostibus, inter Protestantes maximæ authoritatis viris, atque splendore familiæ nemini secundis, cum inquam in Cæsarem inueherentur, ipsiusque vitia ostentare studerent, nihil aliud prorsus obiecisse, quam quod Gesuitis nimium credens, promouendæ Catholicæ fidei prætermodum inuigilaret; Cæterum vel scrutantes vitia, inuicique in ipsius virtutes incidebant, acceptaque beneficia memorabant, neque suam excusabant defectiōnem alio titulo, quam quod religionem, vel cōtra proprium patrem defendere oporteret, ideoque pati ipsi non poterant, ut ex Austriaca familia, Catholicæ religionis acerrima propugnatrice, nouus Cæsar eligeretur. Hinc manifeste conijcitur, quantum hereses Reipublicæ obsint, mirarique satis non possum impios, quosdam Politicos eas admississe; namque mihi videtur illi probauisse seditiones, discordiasque.

Reipu-

Reipublicæ conferre, dum hereses, earum potissimas causas, introducunt; hæreses enim dissidiorum esse originem, vel hoc testatur, quod si mortales omnes vnum Deum, vno cultu (ut par est) venerarentur, eiusdemque essent religionis omnes, cuius præcepta seruarent, nusquam discordiæ, nusquam bella reperirentur. Nam qua de causa hæretici Catholicis, vtriusque aliquando Turca, huic Persa bellum inferrent, nisi ad opprimendam diuersam sectam zelo quodam traherentur? Quo pacto dissentire inter se possent Christiani, qui legis a Christo traditæ præcepta adamussim obseruarent? Ergo dissidiorum duæ potissimæ, primæque sunt causæ, religionis diuersitas, præceptorumque ipsius transgressio; neque omnino fieri potest, ut carentem dissensionibus orbem videamus, nisi duo illa concurrant, sit nempe vna religio omnium mortalium, ipsiusque præcepta exacte ubique obseruentur; atque hoc vtrique fieri & deberet, & præstaret saltem inter eiusdem religionis viros; scilicet inconcinnum est religionem aliquam profiteri, cuius deinceps præcepta, mandataque spernantur. Verum postquam adeo exacta legis, religionisque obseruantia ab humana fragilitate desiderari potius, quam sperari potest, Principibus saltem nitendum

tendum esset, ut in suis ditionibus vnitas religionis seruaretur, si tranquillam Rempubli-
cā incolumemq. desiderant, namq. si hæreses irrepant, religioq. in partes dehiscat, aut earum vnā sectari Principem oportet, aut omnes, aut nullam: Sequi omnes, aut nullam, eiusdem est generis, ad Atheismum spectat, a qua impietate vel animus ipse noster sponte abhorret, qui suam immortalitatem ab ea negari dedignatur; neque ego vllum adeo ignauum Principem viuere existimo, qui saltem a sui conditione, suiq. super alios eminentia, Deum esse non agnoscat, qui hæc sibi tribuerit, seq. sit maior. Quod si vsquam tale monstrum inuenire esset, quo loco a suis subditis haberetur, qui sine religione, soluto animorum vinculo, despectoq. Deo, sui ipsius latria cum nemine consentiret? Adhærebit itaque Princeps alicui hæresum, atque ita qui eandem tenent partem, ipsi fortasse obedient, amiciq. erunt, reliqui infesti, tanquam suæ religionis hostem oderunt, & pro subditis inimicos in sua Republica alet, discordesque ad inuicem; in quo enim consentiente, qui discrepant in Deo rerum omnium summa? Sed de his fortasse alias, digressiq. paulo vterius sumus, quam par esset, ad rem redeamus. Fa-

ma Lipsensis cladis non parum eorum animos affecit, qui quietem pacemque cupiebant, & Germaniæ incommoda, vastationesque auersabantur; magisq. mox perculit deficientium ciuitatum perfidia, atque Regis haud intermissi conatus; iamque considerabant sub hac mole casuram Germaniam, neque immunes futuras hæreditarias Cæsaris prouincias, cum Saxo Boëmiæ regno manus iniecisset; sentiebantq. iam Morauia, Austriaq. belli incommoda, quamuis hostis abesset, militum tamen petulantia propter statiuam obnoxia, sed multo magis Boëmia, Misnia, Franconia, ceteræque, in quibus bellum aut gestum fuerat, aut gerebatur, premebantur, incensis ciuitatibus non paucis, pagisque innumeris, quos milites, cum in ijs pernoctauerint, nō comburere, piaculum ducunt, quasi ex more militiæ non sit aliquid illesum relinquere; coloni item, incerto adhuc rerum exitu, & ne se excurrentium militum libidini exponerēt, ad ciuitates, munitaue loca, aut nemorum auia confugientes, incultos agros iacere patiebantur; Quamobrem, consumptis insuper prodige a militibus, aut combustis, ne hosti vsui essent, terræ fructibus, sæua annonæ caritas imminebat. Hæc mirum in modum Cæsarem pientissimum

mum Principem affligebant, qui a Deo sibi
 creditos populos ita molestari ferre non po-
 terat; neque gliscentibus vndique rebellionibus,
 securum iam Viennæ se esse rebatur; nam
 propinqua nimis hostibus videbatur ciuitas,
 suspectiq. erant Austriæ rustici seditionum
 auidi, quique recenti odio Cæsarem prosequen-
 bantur, quoniam conscientiae licentiam suis
 in ditionibus interdixerat, & non erat dubium
 quin auide Regem, aut Saxonem expecta-
 rent, atque ab illis ad rebellionem sollicita-
 rentur, premerentq. impotentem animum,
 donec ducem haberent, quem sequerentur.
 Erant ergo qui hortarentur Cæsarem, vt Græ-
 cium in Stiriam secederet, periculoq. se exi-
 meret, donec hæ turbæ sedarentur, hostisque
 procul arceretur: sed censebatur indignum
 Cæsareo nomine facinus, non viso hoste, pro-
 pter solas suspiciones caput suarum ditionum
 deferere. Esse Regem & Saxonem procul ad-
 huc satis; illum a Tyllio detineri, huic occur-
 ri posse; neque omnino Cæsarem in tanto pe-
 riculo versari, dum Viennam, natura, & arte
 munitissimam ciuitatem, teneret: eam esse
 talem, tantasque adesse vires, vt etiam si om-
 nia corruerent, quod tamen timendum adhuc
 non erat, Cæsar obsidionem tolerare posset,
 donec

donec auxilium a Catholicis Principibus haberet; Quin potius decora magis admittebantur consilia, nouusque conscribatur exercitus, quem Cæsar ipse, aut filius in hostem duceret? cessuras maiestati Principis prouincias, quæ non aliam ob causam descuerant, quam quia auaritiam præfectorum, Ducumque ulterius tolerare non poterant; Quod si suarum rerum curam gerere tandem Principem vidissent, neque imminere amplius periculum, ut sua bona militibus prodigerentur, arma erant deposituræ, quæ ad hoc incommodum tollendum sumpserant. Principes item, qui Sueco militabant, ubi exercitum vidissent, in quo Cæsar aut filius dux esset, acceptorum beneficiorum memoria, aut detestatione infamiae, quæ ex rebellionem resultat, partes deserturos, Cæsariq. accessuros; nunc non videri bellum contra Cæsarem geri, sed contra petulantiam, contra auaritiam, seuitiamq. ipsius exercitus; ac testari hoc vel ipsæ transactiones a Protestantibus cum Sueco factæ, in quibus debitam erga Cæsaream maiestatem reuerentiam reseruabant; imo, neque Regem ipsum, qui hæc arma mouerat, contra Romanum Imperatorem bellum profiteri: detegeretur hoc modo vulnus, fieretq. palam eorum perfidia, destruc-

cto omni prætextu, cum contra ipsius Principis caput euaginassent ferrum, palamq. Imperatoriam maiestatem violassent. Secuturum inde vt tantam nequitiam vel gregarij milites abominarentur, deferrentq. desertores homines, qui proprio Principi manus intentassent; Imo & ipsum Regem auersaturum tantam perfidiam, qui eam sibi quoque metuendam esset existimaturus. Cæsari consiliorum alterum videbatur indecorum nimis, neque animum adeo desponderat, vt vita potius defungi non mallet, quam illud amplecti; alterum incommodum, & temerarium; nempe committere se filiumue eorum fidei, quam adeo fluxam experiebatur: Quid si ab hoste vinceretur? quo refugeret? quidue faciendum, aut tentandum, frustrata sui expectatione restaret? Verum melior speraretur euentus, nempe se victurū simulac in hostem prodijisset; at vbi exercitus, vbi vires Imperatoria maiestate dignæ? exiret ne cum aulicis, prætorianisque militibus, rectaq. in hostem tenderet, quasi seditionem in vrbe inter ciues obortam sedaturus? parum tutam esse sine viribus maiestatem sciebat, etiam inter ciuiles tumultus; quid inter armatos, furentesq. milites? Quid inter Suecos, Gothosque, qui Cæsarem,

farem, nisi obliqua fama, non agnoscebant? Quid inter perfidos, & perduelles, qui debitum obsequium iam exuerāt, & maiestatis reuerentiam in odium conuerterant? ergo armis opus erat, & potentia, non inani pompa aut fastu; frustra q. maiestatem iactari credebat, vbi vi vti oporteret. Alia præterea, & diuersa animum angebant, Regem in Francia, Saxonem in Boëmia esse; contra quem primum moueret, aut quos potissimum defenderet, ne postpositi contumelia incenderentur? Boëmia proprium erat Regnum, igitur anteferendum; sed alia ex parte nutabat Bauarus, qui si se indefensum Regi obijci vidisset, ne suæ ditionis ruinam pateretur, cum hoste fortasse erat pacturus. At per Duces pariter agi, salua maiestate, cui maior e longinquo reuerentia, simulque ducibus excusatum fore, si qua cum amicis Principibus ob statiuam, aut contributiones; aliamue ob causam oriretur controuersia, ad se reijcere, interim pergere, armisque vti; ac si repellerentur, se superesse, renouariq. bellum posse. Hæc aliaq. prudenter Cæsar perpédens, se aut filium belli discriminibus obijcere vtile non duxit, decreuitq. bellum per Duces gerere. Duo erant in diuersis prouincijs hostes, quibus per solum

Ducem occurri non poterat; placuit itaque, relicto in Bauaria Tyllio, qui eam prouinciam contra Regem cum suis copijs tueretur, Generalem sui exercitus Ducem Volleſtainum, quem in Ratisbonēſibus comitijs eodem magiſtratu depoſuerat, conſtituere, ſtrenuum, egregiumq. virum, & militibus carum, qui ſibi alias vtilem fidamq. operam nauauerat. Albertus Volleſtainus Pragæ ex nobili, ſed priuata familia natus, Cæſari in Foroiulij contra Venetos prima ſtipendia meruit, duarum equitum turmarum ductor, quas ipſe proprijs ſumptibus conſcripſerat, inde promotus ad maiores militiæ gradus, in bello Boëmico, præſertim in Pragenſi conſlictu, ita ſtrenue ſe geſſit, vt paucis poſt annis ad ſupremum militiæ faſtigium a Cæſare eueheretur, factuſque Cæſaris Dux Generalis, contra Danum eo ſucceſſu bellauit, vt præter Ducatum Fridlandiæ, Ieci-num, aliaq. in Boëmia loca, Ducatum etiam Megapolitanum, Cæſareo fiſco addictum, ſuæ virtutis præmium habuerit. Mox Electorum, Germanorumque Principum opera depoſitus, Pragam, & poſt eam amiſſam Cēnaimum in Morauiam ſeceſſerat; vir ſagax, magnanimus, liberalis, ſeuerus militaris diſciplinæ obſeruator, qui debitam Cæſari fidem nunquam viola-

violauerit, cuiusq. virtuti fortuna semper arri-
ferit; At abstrusum consilij, intractabilem
animo, impotentem iræ, æstimatorem sui, alio-
rum contemptorem æmuli faciunt. Sed ne-
minem ex omni numero mortalium crimine
carere video, & plures, plurisque æstimanda
sunt huius viri virtutes; quam vituperanda ea
vitia, quæ a maleuolis memorantur; ideoque
fortuna virtutes secuta famam, præmiumque
quale vidimus dedit. Cæterum nostrorum
temporum Dux nemo hunc officio erga mili-
tes superauit, qui nihil vnquam aut sine præ-
mio, aut sine pœna præterijt; eaque fuit ipsius
semper in Cæsarem fides, vt maximis pollici-
tationibus ad defectionem ab hostibus inui-
tatus, neque carens prætextu, quo excusari po-
tuisset, fixus tamen semper, immotusque per-
stiterit. Degebat Vollestainus priuate Cenai-
mi, cum se electum Cæsaris Generalem Du-
cem accepit. Perculerat militare animum
priuatio magistratus, & decreuerat quiete re-
liquum vitæ ducere, atque adeo non ita facile
oblatis assensit; excusabatq. ætatem suam iam
ad senectam vergentem, & podagræ cruciati-
bus obnoxiam; se item Germaniæ Principibus
inuisum, quos in se pro Cæsare irritauerat; im-
portunumq. esse hoc tempore eos sponte de-

ficientes, additis nouis suspicionibus, impellere. Et, vbi erat exercitus, cuius ducem Cæsar se eligebat? viuere adhuc Tyllium, strenueq. exercitum curare, qui supererat; se non cupere aliena iniuria sibi gloriam quærere: Quod si nouus exercitus colligendus esset, vnde accersendi milites? vbi pecunia? Verum cum Cæsaris mandatum vrgere vidit, optatum fortasse onus suscepit. Neque tamen ad hoc temere descendit, sed certis conditionibus cum Cæsare pactus est, ne iterum aut eundem depositionis casum subiret, aut sibi bellum ex aliorum nutu gerendum esset. Namque verabatur antea Cæsarei duces quidpiam momenti aggredi, quin prius bellicum concilium Vienne consultum mitterent, atque inde ex præscripto agerent, vnde aliquando lapsu temporis bene gerendæ rei occasio amittebatur. Sic voluit Vollestinus, huius belli curam sibi soli incumbere, ipseque ad libitum omnia facere, statua militibus distribuere, contributiones, commeatus exigere, Tribunos, Centuriones creare, gnarus eam esse imperandi rationem, vt non aliter constet, quam si vni reddatur. Quod si aliquando Cæsari hæc reuocare, seq. ea cura remouere placuisset, ante semestrem admoneret, nec deinceps ipse ad reddend-

reddendam administratę provincię rationem
 cogeretur. Postquam hæc omnia a Cæsare
 obtinuit, mandata Tribunis dare ad conscri-
 bendas legiones incepit, haud facta inter Ca-
 tholicos, hæreticosue differentia; namque
 cum sine mora conscribi exercitum oportere-
 ret, importunum sane fuisset in Germania me-
 ros Catholicos quærere, vbi plurimi, præser-
 tim vero rustici, si non palam, saltem secreto
 Caluini, aut Lutheri hæresim sectantur: vt igi-
 tur & cito milites colligeret, fidosq. haberet,
 diffeminari in vulgus passus est, non pro reli-
 gione bellum fieri, sed pro recuperandis Cæ-
 saris ditionibus, quæ a rebellibus fuerant oc-
 cupatæ. Inde aulæ suæ munera æque in Ca-
 tholicos, hæreticosque partiri, cum vtrisque
 pariter se gerere, quamuis Catholicæ religio-
 nis semper commodum quærens; sic hæretici
 arma sumere contra rebelles non abnuebant,
 qui pro religione Catholica aduersus suæ su-
 perstitutionis viros militiam detrectassent. Ad
 Vollesteinii famam Tribuni, veteraniq. mili-
 tes Catholici pariter, ac hæretici confluebant,
 & quoniam non erat in promptu pecunia,
 Tribuni ultro ex sua erogabant, quam postea
 ex statorum contributionibus erant recu-
 peraturi. Statura in ea parte Boëmiae, quæ ad-
 huc

auxilia, vbi cœleste deficiat non ignarus, publicato edictò in suis ditionibus, subditos ad placandum iratum Deum, eiusque adiutricem manum implorandam hortatus est. Ipse aliorum exemplo, intecto capite, pedes, pia maiestate supplicationibus adesse, templa visitare, sacris concionibus, ecclesiasticisque omnibus functionibus interesse. Inde humana resumens remediâ ad omnem casum urbem muniri, atque debilioribus in locis nouum excitari vallum imperavit. Vrbs est Vienna superioris Pannoniæ Metropolis, omniumque, quæ ad Danubium sunt, & ædificiorum splendore, & facili rerum copia clarissima; totiusque Germaniæ, atque adeo totius Christiani orbis in ea regione aduersus Turcarum irruptiones propugnaculum. Iacet in patula planitie, atque qua ad Septétrionem spectat, Danubium habet maximum totius Europæ fluuium, qui in quinque partes dissectus, ligneisq. totidem pontibus stratus, ab ea parte inexpugnabilem reddit: circumquaque regia, vt vocant, mœnium munitione cingitur, amplissimaque, ac profundissima fossa, eaque omnino est, vt inter munitissimas totius orbis arces referatur. Sed in eâ parte, vbi flumine caret, ciuiû amœnissimis viridarijs, ad ictum sclopi distantibus, circun-

circundatur, quæ, si casus daret, hosti vsui esse possent, atque cōtra munitiones ciuitatis muniri, qua de causa Cēsar ea solo æquari iussit, vt ex vr̄bis mœnibus in subiectam planitiem liber esset prospectus, destinariq. scloporum, & bombardarum ictus certo possent. Præterea bina opera cornuta totidem in partibus trans fossam designauit, in quibus milites locarētur, qui extra ciuitatem hostem etiam infestarent. Cardinalis vero Pazmannus Vienna cum decoro comitatu Romam profectus; a Summo Pontifice benigne, comiterque exceptus est; & dum sacris cæremonijs inter suscipiendum Cardinalitium galerum ille detinetur, simplici sinceraq. præsentis necessitatis narratione audita Summus Pontifex, quæ sui muneris iudicabat vltro præcurrens, numeratæ pecuniæ haud exiguum subsidium dicitur transmisisse, neque hoc solum pro Cæsare præstitit, sed indictis in toto orbe Catholico supplicationibus, præter publicas preces, ipse singulis Dominicis diebus per aliquod tempus ad Sanctæ Mariæ Maioris sacris operatus, Deum placare conatus est, suæque autoritate Catholicos Principes est hortatus, vt Cæsari ferrent suppetias; atque ita Pazmannus ad Cæsarem reuersus est. Et Rabatta parem quidem hospitalita-

talitatem, comitatemq. ubique inuenit, sed haud parem suę legationis effectum retulit, varijs diuersa respondentibus; nam Veneti, quos primos adiit, suum cū Rege Christianissimo fœdus causati, se neque aliud inire fœdus, neque alicui opitulari posse dixerunt. Dux Mantuę desolatam suam urbem ostendit, spoliatamq. domum, in qua sine principali apparatu, ac splendore, ob accepta a Cæsareo exercitu damna, viuere cogebatur; Quod si Cæsar miseras eas reliquias cuperet, se vltro porrecturum professus est. Parmensis, vt subditum Apostolicę Sedis decebat, facturum se quid Pontifex mandaret respondit. Genuenses, implicitos se bello cum Sabaudia Duce, dixere, adesseq. in Narbonensi prouincia, apud Ligurię confinia, Gallicum exercitum, cuius adhuc ignorabantur futuri conatus. Quod si Cæsar secum fœdus habere vellet, defenderet prius discrimini obiectos, arceretque a confinibus hostem, se inde petita facturos; At dum ipsius vires tam procul abessent, nescirentq. an Gallus hoc fœdere irritaretur, nolle se viribus impares hunc armatum, potentem, paratumque laceßere. Neque negaturos fuisse saltem pecuniaria auxilia, qui se innumera Austriacę familię debere beneficia profiteantur, sed ef-

se exhaustos pecunia, cū propter bellum, tum propter nouorum mœnium fabricam, quibus vrbein muniebant, ac diminutas ciuium facultates, quibus Hispaniarum Rex, multarum auri myriadum debitor, neque mutui prouentus soluebat. Sabaudia Dux fœdus iniit, sed neque militem, neque pecuniam dare posse se dixit, excusans suæ regionis vastitatē, quam bello, fame ac peste desolatam, vel legatus ipse viderat; soli Florentiæ, & Mutinæ Duces, cum Lucensi Republica omnia sua officia Cæsari promissere; Cæterum Rabatta donatus ab omnibus, fere sine legationis fructu Viennam rediit. Atque hæc quidem apud Cæsarem fiebāt, dum Catholici fœderati celebrato Landshuti, ac deinceps Ingolstadij cōuentu, de rerum statu, belloq. gerendo consulerent. Ibi quamuis a Regis Sueciæ, aliorumque Legatis, a bello dehortarentur, decreuere tamen Cæsarem, & Catholicam religionem non deferere, quæ non parum detrimenti a Sueco pati videbatur; atque ita constitutum est, vt Bauariæ Dux, cæteri q. pro viribus milites conscriberent; interim ne a pace abhorreere viderentur, Herbipolensis Episcopus Colonia ad Galliarum Regem missus est oratum, vt se interponeret, pacemq. æquis conditionibus procuraret.

ret. Hæc agitabantur consilia, talesque fie-
 bant apparatus cum Tyllius postquã Norim-
 berga discessit, Milzburgum expugnauit, im-
 positoq. præsidio, Donauerdam cum Aldrin-
 ghero secessit, ac mox in statiuâ exercitum di-
 stribuit, vt vacuas legiones suppleret: ipse
 Donauerdæ commoratus est, Aldringherus
 Norlingam petijt, militesque in Augustana
 ditione, Lichtenauj, Nouofori, Amberge, Sulz-
 baci, Velsburgi, alijsque circumuicinis in lo-
 cis stationes habuere, & breui temporis spatio
 legiones suppletæ sunt; ac Maximilianus Ba-
 uariæ Dux, habito in sua regione delectu, ad
 decem nouorum militum millia collegit; &
 quia aliquot dierum erant in ea parte inducię,
 4 nihil mouebatur. Dum hæc a Cæsareis age-
 rentur, Protestantes festiuis ignibus, omni-
 busque lætitiæ signis Lipsensem victoriam ce-
 lebrabant, iactabantq. Germaniam Regis Sue-
 ciæ auspicijs in antiquam libertatem vindica-
 tam excusso Austriacorum iugo; & Euangeli-
 cam, quam iactant, religionem tandem ex-
 pulsus Catholicis Ecclesiasticis, qui eam euer-
 tere conabantur, aut diminuta eorum autho-
 ritate, debito splendore decoratam; atque ita
 omnes certare in Regem officijs, eiq. omnia
 quæ petebat porrigere. At ipse vasto animo

immensa gerens, voluensque ea, quæ præter
 expeditionis scopum iam erant, atque Imper-
 ratoriam dignitatem spe deuorans, militaria
 munia inter has festiuitates minime omisit,
 sed repleti militibus veteres legiones; conscri-
 biq. nouas mandauit, vt vltius progredere-
 tur; & quoniam omnium maxime Norimber-
 ga hosti obijciebatur, Tribunum Slammer-
 dorfium, cum quinque legionibus immisit,
 qui illam præsidio teneret; atque Solmensibus
 comitibus Guilielmo, Henrico, & Io. Geo-
 rgio, qui in ea ciuitate diuersabatur, conscribē-
 darum legionum mandata dedit. Norimber-
 genes pariter certatim accurrentes, suæ vr-
 bis mœnia reparare, nouumq. vallum inducere,
 ac fossas excauare cœpere, vt hostilem impe-
 rum ferre possent. Prima huius anni arma ex
 parte Suecorum in Alsatia mota sunt; nam-
 circa Ianuarij finē Rex Gostauum Hornium
 in eā prouinciam misit, vt Lotharingos inde
 expelleret qui ea tota fere potiti, Argentora-
 tenses molestabant. Venerat in Alsatiam Dux
 Lotharingiæ cum suo exercitu, vt eam prouin-
 ciam a Suecis pro Cæsare defenderet, tene-
 batque præsidio ciuitates nonnullas, atque in-
 ter alias Hailprunnam urbem Imperialem, ad
 quam expugnandam Hornius primum mo-
 uit,

uit, ac intra paucos dies in deditionem accepit, dimissis decoris cum conditionibus, atque bene affectis præfidiarijs, namque præceperat Rex, ne Lotharingos irritaret, cum non desperasset omnino futurum, ut illum Ducem in suas partes traheret. Mox Hornius Fridburgum, Vezflariam, Diburgum, aliaq. ad Rhenum loca itidem expugnauit, & Argentoratenses conscriptis militibus, ut cum Hornio se coniungerent quoque exiuerant. Sed Lotharingus a Galliarum Rege reuocare suas copias coactus est, atque ita Alsatia fere tota in Suecorum manus deuenit. Inde Hornius inferiorem Palatinatum ingressus, Hispanos Ayfenstallo, Chermeshemio, Landania, atque Laissemburgo eiecit, & demum Braunfeldiam munitissimum oppidum obsedit, quod post viginti dierum obsidionem Hispani decoris conditionibus dedidere; Inde cum in Francônia expirarent iudiciæ, quæ cum Tyllio habebantur, a Rege iussus est Suainfurtum suas copias ducere, ut ibi cum Vinariensi Duce se iungeret, atque Episcopatum Bambergensem inuaderet; nam quamuis ille Episcopus, ut diximus, suæ ditionis incolumitatem pæuro redemisset, neque adhuc quippiam tentasset, quo Suecos offendisset, Regi tamen haud securum

vide-

videbatur, regionem illam Cæsareis expositam, præsidioq. Catholici, atque Ecclesiastici Principis munitam, sine suo præsidio relinquere; sumpto itaque a Bambergensibus rusticis prætextu, qui Suecos aliquot oppresserant, præsidium se velle immittere Episcopo significauit; quod cum ille respueret, vim adhibere Hornium iussit. Venerat inter hæc Sueciæ Regina Stetino Francofurtum, & Rex ea hilariter excepta aliquot dies quieti impedit. Interim Fridericus quoque Comes Palatinus Rheni, qui bello Boëmico ditione, ac Electorali dignitate ob rebellionem, dum Boëmiæ Regnum ambiret, spoliatus fuerat, atque hæcenus in Belgio vixerat, Francofurtum, cum honesto comitatu, ad Regem venit, a quo benigne exceptus promissum retulit, se in pristinam dignitatem restitutum iri, vbi hostem ex Palatinatu atque Boëmia eiecissent. Namque Angliæ Rex enixe flagitabat, vt affini viro ditione restitueretur. Fuit hic Fridericus fortunæ ludibrium, exemplumq. humanæ instabilitatis, nam dum Comes Palatinus Rheni, & Elector Archidapifer pacifice sua ditione frueretur, nouis periculosisque rebus animum applicuit, Regniq. Boëmici ambitione æmulum. Ferdinandum iam Cæsarem & Regē Boëmiæ

in se

in se concitavit, a cuius exercitu acie fusus, ex propria ditione, totaque Germania pulsus est, & quamvis semper quondam sua varijs conatibus repetisset, nihil tamen vnquam profecerat, Palatinatum strenue defendentibus Hispanis, quem a Cæsare acceperant. Nunc illius magna ex parte potito Rege, videbatur fortasse restitutum iri, cum huic negotio importuna mors eodem mense, & Regem & Electorem abstulit. Hoc quoque tempore Ulricus Regis Daniæ filius ad Ducem Saxoniae venit, militaris disciplinæ addiscendæ gratia, atque ab ipso comiter superbeq. receptus, vni legioni præfectus est. In inferiori vero Saxonia Poppenaimus ex Brunsvicensi Ducatu ad Vilsingiam cum Catholicorum fœderatorum exercitu progressus, mira celeritate Hammelam, Hecsteram, Verdam, Goslariam, Ghettingam, aliaq. loca expugnauerat: neque sese opponere ausi sunt Dux Lunenburgicus, & Bremensis Pseudoepiscopus, donec inuocato Todio Suecicorum Castrorum præfecto, qui prope Lunenburgum pro Rege milites colligebat, nouem millibus militum exercitum augerent, mox additis insuper Ducis Vinariensis, & Banneri copijs in hostem duxere; sed Poppenaimus distributo in præsidia exercitu, pedem

pedem retulit, ac Todius, & Vinariensis relicto in inferiori Saxonia cum suis copijs Bannero qui Lunenburgico & Bremensi afflisteret, in obsidione Niemburgi implicatis, Suainfirtum versus castra mouere, quo a Rege vocabatur, atque occupatis in itinere Verda, Goslaria, Ghettinga, multisque alijs oppidis, misereq. vastata Fuldenſi ditione, & Brunſuicenſi Ducatu afflicto, Suainfurti cum Hornio ſe coniunxerunt. Hiſpani vero in Palatinatu Rheni, qui Philippiburgum, Francothaliū, & Haidelbergam tenebant, proſecto Hornio, Spiram recuperare tentarunt. Erant Spiræ Catholici, monachiſque, quos, vt diximus, ſua religione vti Goſtauus permittebat, atque hi religionis zelo adducti cum Hiſpanis egerunt, promiſeruntq. iſtis præbere in urbem ingreſſum; at detecta proditione, Hiſpani repulſi; & ex ciuibus nonnulli in furcam acti. inde Goſtauus immiſſis ſeptingentis Suecis in monachorum cœnobijs ſtatiua diſtribuit; Hiſpaniq. verſo in Alſatiam impetu, Viſſtattium, & Loram expugnarunt, atque quotidianis excuſſionibus Suecos moleſtantes; Spiram uſque excurrebant; Rex tandem quinto Calendas Martij Francofurto Moguntiam petijt, inde copias Crucenaco, quod Hiſpani tenebant, admouit,
ac poſt

ac post sex dierum obsidionem illud expugnauit, in arcem refugientibus Hispanis, qui quoque cū cuniculum agi sub arce vidissent, deditiōem fecerunt, atque cum sarcinis, impedimentis, & armis Haganoam dimissi sunt. ac quoniam Rex aduersa valetudine detinebatur, Francofurtum redire placuit, ibiq. morari, donec pristinam sanitatem recuperaret.

- 6 Atque hæc in Franconia, ijsq. regionibus, vbi Rex cum suo exercitu erat; in Boëmia vero Saxones post occupatam Pragam, maioremq. eius prouinciæ partem, felicitate fortunæ sensim insolenter se efferre, mox ebrietati crapulæq. se dedere, ac postmodum militaria munera negligere, & deserere, hinc vexare ciues, extorquere pecuniam, expilare domos, atque ex nimia crapula ipsi infirmari, inde quasi cōtagione infecti, vbique cadere; quapropter ciues, tum petulantia militum, tum metu morborum, qui passim grassabantur, deserere ciuitatem, & in loca, quæ a Cæsarianis tenebantur, secedere cœperunt; Atque breui Pragæ bis mille fere ædes habitatoribus vacuæ repertæ sunt. His de rebus admonitus Vollestinus, qui Cenaimi adhuc colligendo militi intentus hærebat, circa idus Februarij Galassium castrorum præfectum, & Sulzensem

Comitem, qui in Boëmia cum collectis militibus statua habebant, vltius Pragam versus pergere, & Maradio se iungere iussit, secuturus ipse cum copias coëgisset, quas ad finem Martij paratas vbique esse mandauerat. Gallasius, & Sulzensis Pilsnam progressi, nūnita probe hac ciuitate, recuperatisq. aliquot oppidis, Slacchembaldiam, inde Pragam aggredi animo conceperant, cum Saxo coactis circa Egram suis copijs, Pilsnam versus mouit, vt Cæsareos ad pugnam lacefferet, sed Gallasius suis se munitionibus continuit, & Saxo vastata regione Pragam iter intendit, eaque probe munita, & Hofchirchio præposito, Torgauum ad Protestantium comitia se contulit. Gallasius vero iunctis cū Maradio, qui Satium expugnauerat, viribus, facto quīdecim mille militum exercitu, intercipere vias, quibus Saxones in Boëmiam descendere possent; constituit: castris itaque motis Cadam ad Misniæ fines ciuitatem expugnauit, impositoq. præsidio, vt hosti impedimento esset, milites misit, qui cæsis, prostratisq. in Boëmica silua arboribus, vias impedirent, corrumpereq. ipse deinceps Pragam versus milites duxit, atque post expugnata nonnulla oppida Solsciam in oppido triginta quinque milliaribus ab ea vrbe di-

be distante confedit, nam ad aggrediendam Pragā vastā ciuitatem, munitamq. a Saxo-
nibus vires sibi sufficere non rebatur; videba-
turq. honestū opperiri Vollesteinum, vt ipsius
esset captæ vr̄bis gloria, patriæq. in pristinum
statum restitutæ, & iam hic ex Morauia cum
exercitu discessisse ferebatur; verum ne inte-
rim tempus inaniter amitteret, expugnandis
oppidis se applicuit, quæ in eo tractu iacent,
quæue Pragā versus iter remorari poterant.

7 Inter hæc Hornius auctus Vinariensis Ducis
copijs quinto idus Februarij Bambergensem
Episcopatum intrauit, expugnatoq. Hecstat-
tio, ciuitatem ipsam Bambergam præsidio va-
cuam (nam præsidium desperata defensione,
ante aduentum hostis se Forchaimum rece-
perat) occupauit. Perrexerat Crattius Ducis
Bauariæ Tribunus Forchaimum vsque cū tri-
bus militum millibus, vt Bambergam ingre-
deretur antequam hostis illam inuaderet; nam
Tyllius ad eam hostem iturum coniecerat,
miseratq. Crattium, qui ciuitatem defenderet,
donec ipse cum reliquo exercitu aduentaret,
sed Crattius Forchaimi Bambergensem Epi-
scopum obuium habuit, qui viso hoste, cum
ciuitatem defendere nequiret, eo se receperat,
atque relicto inde Forchaimi potenti præsidio

ambo in Bauariam secesserunt; Hornius occupata Bambergâ, quoniam pluuium tēpus, cœnoq. corruptæ viæ vltiorē progressum prohibebât, dimisso Vinariensi, se ad muniendam ciuitatem conuertit; & tantum leuioris armaturæ equitatū excurrere prope Forchaimum, & Cronacum ad ea loca infestanda permittebat, quorum ciues & præsidarij milites se munierant, & promissum auxilium a Tyllio expectabant; atque ita per integrum fere mensem nihil momenti actum est. Sexto demum nonas Martij Tyllius ex Bauaria, & superiori Palatinatu exercitum duodeuiginti mille militum cum viginti duobus tormentis deduxit; factoque per Noricū itinere, Altdorsum, Laufsam, aliaq. loca expugnauit, quibus præsidio munitis, Forchaimum progressus est. Audito Tyllij aduētū Hornius, qui ad duodecim milia militum secum habebat, vrbis mœnibus se continere decreuit; & quoniam Bambergâ, aperta est ciuitas, munitionesq. ob continuas pluuias ad perfectionem adhuc perducere non poterant, diligentius opus vrgebat, vt antequam hostis veniret ad iustam defensionem perduceretur: verum Tyllius resarciendæ Lipsensis cladis cupidus, tempus non dedit, namque Forchaimo discedens ipsis Martij nonis ad ciuitatem

uitatem accessit. Nemus apud Bambergam
 sedet satis vastum, per quod nostri iter fa-
 cientes non prius ab hoste visi sunt, quam ad
 machine ictum prope ciuitatem fuerint. Erat
 ad exitum nemoris equitum Suecicorum le-
 gio, in quam noster equitatus inuectus, caesa
 maiori parte, reliquos in suburbia compulit;
 inde eam ciuitatis regionem aggressus cum
 sua legione Ferensbacchius; quæ adhuc im-
 perfectis munitionibus aperta erat, Suecos
 munitionibus deturbauit, sibiq. aditum pate-
 fecit. At Hornius collecta suorum valida ma-
 nu, Ferensbacchium mœnibus repulit. Pu-
 gnatum est acriter per integram fere horam,
 sed cum nostri strenue insisterent, Hornius
 pulsato tympano colloquium petijt, quasi de-
 ditionem facturum; ac dum transigendo deti-
 nemur, præciosiora nauibus imponens, trans
 Mœnum, & extra ciuitatem instructa acie se
 contulit; Quod ubi Tyllius animaduertit, mi-
 lites irrumpere præcepit; sic nostri ciuitatem
 ingressi vltimum Suecorum agmen assecuti
 sunt. Hic quamuis Sueci se strenue defende-
 rent, eorum magna strages est edita; Cæsa sunt
 ad duo Suecorum millia, fuissetq. totus Hor-
 nij exercitus ea die deletus, nisi rupto ab ho-
 stibus Hastattiano ponte, nostri in eo resi-
 ciendo

ciendo derenti essent. Nam interim Hornius cum reliquijs Hasfurtum se recepit, & sequenti die cum nostri victoriam sequerentur, deserto Hasfurto, munitoq. præsidio Suainfurto, Gheltershemium vsque pedem retulit, vnde Francofurtum misso citatis equis nuncio Regem de casu admonuit. Tyllius vero vbi Bambergam intrauit, cohibita militum licentia, qui Suecorum impedimenta deprædatis, iam ciuium domos expilare inceperant, nihil a ciuibus extorqueri permisit; Et postera die, ne rei bene gerendæ occasionem amitteret, hostiue reparandi vires tempus daret, post ipsum mouit, & recuperatis Hecstattio, Hasfurto, alijsque eius regionis oppidis, Suainfurtum iter intendit, cumque Sueci se dedere negarent, illud obsedit. At vero Rex de suorum clade certior factus, Francofurto Moguntiam se contulit, ad cogendas copias, & accurrentibus eo Vinariensi Duce, & Bannerio, qui cum suis copijs ad Regem quoque venerat, exercitum viginti mille militum conflauit, atque inde mouens prope Gheltershemium Hornium affecutus, eius copias suis addidit, & Suainfurtum versus contra Tyllium castra mouit; Tyllius intellectis Regis viribus, illum expectare opportunum non duxit, sed se cis

Mœnum recipere, obiectoq. flumine ripam tueri, atque inde ipsius conatus obseruare cōstituit, donec Bauariæ Dux cum suo exercitu opem ferret. Soluta igitur Suauifurti obsidione, vastatisq. transmœnanis agris, cis fluuium venit, ibique circa Bambergam castra posuit. Verum cū instare hostem intellexit, magnisq. itineribus ad se venire, & nondum adesset cū suis copijs Bauarus, haud consultum duxit in apertis locis tam inæqualibus viribus commorari; motis itaque castris Donauerdam, atque inde in Bauariam secessit, vbi Duci Bauariæ iunctus cis Lyciam posuit castra; destructoq. ponte eius fluminis transitu Regem prohibere constituit. Rex contra iratus, ob acceptam a suis cladem, sollicitusque occasionem prælij quærebat, dum Germanorum Principum integra fides foret, ipsorumque auxilijs vti posset, nec iniuriæ, nam ducenti per alienam patriam exercitum, magnasq. res molienti, vnus modus non victoriæ solum, sed salutis omnino erat, socios in fide retinere, ac dum in fide viuerent, progredi, viresque firmare. Addebatur quod si gloriari parta victoria Tyllium pateretur, ij fortasse, qui ad se descuerant post Lipsensem victoriam, cum fortunam inclinare vidissent, Cæsaris clementiam, quam arma expe-

experiri mallent, atque iterum ad eius partes
 redirent. Postquam ergo Tyllium apud Suain-
 furtum assequi non potuit; anxius, atque con-
 grediendi cupidus recta Bambergam petijt, il-
 laq. occupata, Forchaimum etiam nullo firma-
 tum præsidio (nam Tyllius illud secum abdu-
 xerat) in potestatem redegit, atque haud inter-
 misso cursu Donauerdam versus exercitum
 duxit, ut Tyllium assequeretur, eaque occu-
 pata, cum ultra Lyciam castra posuisse Tyllium
 intellexit, haud cunctatus ad eum fluuium
 transfretandum deduxit milites, præmisso ad oc-
 cupandum pontem equitatu. Sed Tyllius, qui
 hoc præcauerat, rupto ponte in citeriori ripæ
 parte milites in statuiis collocauerat, qui eo
 transitu hostem prohiberent, ac pontem re-
 staurari vetarent, & ubi aduenisse Regem
 cum exercitu cognouit, ipse accito ex omni-
 bus statuiis milite, eo quoque se contulit. Rex
 tentato fluuij transitu, cum a Tyllio repellere-
 tur, consilium dimisit, ac quasi ab ea parte
 nihil tentaturus, exercitum in circumiacentes
 pagos distribuit, inde post dies nonnullos cir-
 ca Aprilis Calendas Cæsareos incuriosius age-
 re, & negligentius custodire ripam conspicat-
 us, obscuram nactus noctem, pluuiaque fœ-
 dam, supra Tylliana castra ad quinque millia-
 ria

ria nauibus iniecto ponte, antequam sol ori-
retur, aut Cæsarei id sentirent, exercitus par-
tem fluuium transmisit. Quod vt Tyllius ac-
cepit, coacto celerrime exercitu, ad hostem
ripa prohibendum mouit; sed maior Sueco-
rum pars iam cis fluuium erat, instructaq. an-
te pontem acie transitum cæteris defendebat,
quando Tyllius cum suo exercitu comparuit;
atque vbi hostem cis fluuium vidit, periculo-
sum ratus si pedem referret, fesso ex itinere
milite, præsentique hoste, impetum face-
re decreuit, antequam reliquus exercitus cis
pontem veniret; misso itaque leuioris arma-
turæ equitatu, qui factò circuitu tentaret, an
hostis terga aggredi, & pontem excindere
posset, atque ita qui trans pontem erant a ci-
teriori ripa, & a cæteris excluderentur, ipse
cum grauioris armaturæ equitibus, & peditatu
instructa acie recta contra hostem mouit; at-
que vbi ad sclopi ictum est ventum; Tempus
est, inquit, milites, quo Lipsensem cladem vl-
ciscamur, deileamusque passam ignominiam.
Non duplo maiorem numero habemus ho-
stem, vt tunc, sed minorem, ac diuisum, neque
qui trans fluuium restant, istis, qui ante no-
stros oculos sunt, præsto esse poterunt, cum
iam rupto ponte hac ripa prohibeantur; laue-

mus istorum sanguine inductam anno superiori maculam, qua expectationem nostram foedauimus; pugnemusque acriter ut maius sit huius victoriae decus, quam dedecus passae cladis; atque omnino in eo constituti sumus, ut hic aut vincere, aut mori oporteat; namque quomodo seruabimur, si (quod Deus auertat) vincamur? Vidistis quam interruptae sint viae, caenoque impeditae, quae neque pedem figere permittunt; & praeterea procul nimis sunt loca, si de fuga (ad quod suspicandum adduci non possum) cogitatis, quo refugere possietis. Ego vero haec non dico, quasi verear ut mihi eam operam praestetis, quae strenuos milites vosque decet, sed ut ostendam in quo omnes discrimine simus, nisi vestra virtute nitamini, atque omnino hos Sueculos fundatis. Ceterum futurum spero, ut minimo negotio his, qui cis fluuium sunt, trucidatis, ad alteram quoque pergamus ripam, atque ad internecionem hanc pestem deleamus. Haec fatus iubet equites irrumpere, ac mox lento gressu, integraque acie pedites sequi. Contra Rex viso hoste confestim cis fluuium venit, palantesque & discurrentes suos mira diligentia, celeritateque in ordinem redegit. Erat iuxta pontis frontem collis leuiter insurgens, densis virgultis refer-

refertus, vt ad fluuiorum ripas solet. Huc immis-
 missis sclopetariorum aliquot manipulis lo-
 cum contra hostem muniuit, reliquos dein-
 cept milites, qui cis fluuium erant, in duas di-
 stribuit partes, quarum vnā maioremq. ex
 peditibus fere totā, infra pontem, qua ho-
 stis veniebat, disposuit: Alterā supra cum
 maiori equitatus parte, quasi id, quod euenit,
 suspicaretur; relictoq. inter has acies ponte,
 ac spatio, quo venientes milites reciperentur,
 locusq. ipsis a duabus aciebus daretur, vetuit
 eos, qui ad hostem spectabant, collis, quem
 ad sinistram habebant, frontem transcendere,
 atque hoc vt hostem ad fluminis ripam dedu-
 ceret; nam disposuerat antea trans fluuium
 tormenta, quibus hostium latus in conflictu
 infestaret. His ita dispositis, præstat, inquit, ex-
 pectare hunc senem, milites, quem aggredi
 properabamus; atque equidem verebar, ne
 nos fugiendo defatigaret, essetq. nobis per
 iniquas hasce vias continuis pluuijs disruptas
 persequendus, cum præter omnem spem il-
 lum contra nos tendere vidi, qui eo nobis fa-
 ciliorem victoriam reddere voluit, quo ipse
 expectare non potuit, nam si nos in suis stati-
 uis expectasset, eo ire maximo cum incom-
 modo oportuisset, quo fessi tandem viribus

peruenissemus . Atiam hostis hæc eadem patitur , quæ nos passuri eramus , longum confecit iter ; fessus , madidus , aqua cœnoq. obrutus aduenit ; victoriam nobis obuiam , commilitones , offert ; accipiamus oblatam , debitasq. hosti grates referamus ; plura dicturum aggredientes Cæsarei interturbarunt ; nam Tyllianus equitatus , equites Suecos vehementi cum impetu adortus , in fugam coniecit , inde pedites aggressus ipsorum ordines non parum labefactauit , vnde succedentibus Cæsareis pedibus aditum aperuit , iamq. inclinabat acies , cum Rex accurrens , præsentia , verbis , manu ignauos increpans , confirmans strenuos , atque hostes repellens , ordines restituit . Mox ancipiti successu certatū vtrinque , atque hinc inde plures cadebant , cum Cæsareus leuioris armaturæ equitatus , aciem Suecorum , quæ supra pontem sita erat , aggressus est ; sed facili negotio ab equitibus hostis , qui superiores erant numero repulsus , ad cæteros rediit , vbi Tyllius versabatur ; Inde cum totus fere Suecicus exercitus cis fluuium venisset , æquatis viribus concursum . Madidum erat solum , atque aqua liquatum , neque miles lubrica vestigia sistere poterat ; quapropter Cæsarei , qui aggrediebantur itinere præterea fessi , quamuis

uis maxima virtute niterentur inique certabant, neque poterant integris ordinibus ad hostem peruenire, cum a tormentis trans fluuium positis, quæ haud intermissee explodebantur, dilaniarētur, & a sclopettarijs in colle dispositis, destinatis ictibus peterentur. Atque ideo postquam tres horas acriter pugnauerunt, cum iam totus exercitus Suecus cis fluuium esset, gnaviterq. instaret, cedere cœperunt. Inter hæc Tyllius vexilla, lora, manus militum apprehendere, precari ne se desererent, neue turpiter fugiendo mori, quam decore certando mallent; nullum adesse omnino refugium, si in fugam se darent, increpare, adhortari, demum fugientes cedere, & nihil prætermittere, ut milites siseret, ordinesque restitueret. Sed cum inter hæc facienda propius ripam fluminis accessisset, ictu sesquibralis machinæ femore comminuto deficiens, ab assedis ex prælio in castra deductus est, cum ab accepto vulnere integram fere horam adhuc in acie perstitisset. Haud segnius Aldringherus faciens grauioris sclopi glâde percussus, ex pugna quoque secessit: Inde Cæsarei aperte cedere, cumque iniquitate viarum detinerentur, a Suecis passim trucidari. Sed opportune adfuit cū suis copijs Bauariæ Dux, qui

qui serius veniebat ad prælium; nam Tyllius simulac venire cis flumen hostem intellexit, admonito ut sequeretur Duce, contra Regem duxit: Bauarus vero cunctatius collectis militibus, instructaq. acie, post illum perrexit, atque vbi cedentes Cæsareos vidit, suos milites cohortatus, in Suecos impetum fecit: tum Cæsarei ad prælium quoque redeuntes, iunctiq. Bauaris, Suecos ad collem usque pepulere. Verum Bauarus cognita situs iniquitate, ulterius persequi haud consultum duxit, cum præterea impari fessorum militum numero sibi certandum esset, neque cis fluuium iam positum hostem transitu posset prohibere; sic restauratis ordinibus, receptui cecinit, & in sua castra se recepit. Desiderata sunt in eo prælio utrinque ad tria militum millia, quorum maior pars ex Cæsareis fuit. Et Bauariæ Dux postquam aliquot dies in castris militem continuit, cum se imparem viribus cognosceret, satius duxit in munita loca exercitum distribuere, donec plures cogeret copias, quibus in aperto Regi valeret resistere; conclamatis itaque vasis Ingolstadiū, quo paucis ante diebus Tyllius, & Aldringherus deuecti ad curandum fuerant, se contulit. Hic post tot præclaras res gestas, post assertam tot prælijs,

ac victorijs Catholicam religionem, post paratum sibi optimi Ducis nomen, Io: Tyllius diem obiit, integritate morum, rerumq. gestarũ magnitudine æterna vita dignus, ni cœlum fortasse illum nostro orbi inuidisset; atque ad fruendum iam feliciori aura (vt pium est de tali viro credere) ad se Deus non reuocasset; & Aldringherus post longam, diuturnamque curam, vulnus suum tandem ad cicatricem, 9 perduxit. Ita ad Lyciam confectus se habuit, dum Protestantes Torgauij circa præsens bellum comitia haberent; namque fama Volleştaini exciti, exercitũ quoque prouidere operæprecium ducebant, ne dum a Tyllio Gostauus in Franconia distineretur, Misnia, Saxonia, aliæq. adiacentes prouinciæ, Suecorum præsidio vacuæ, Volleştaino præda essent, cui vt resisterent milites sufficientes non habebant. Erant qui censerent præstare, omnes cum suis copijs Regem adire, atque iunctis viribus Tyllium opprimere, antequam Volleştainus exercitum educeret, inde hunc aggredi, atque ita futurum, vt facili negotio vtrumque delerent, bellumq. conficerent; sed alia præualuit opinio, quæ non esse e Republica differebat, omnes totius Germaniæ vires soli Regi credere, seq. ac suas ditiones in manus

nus tradere quodammodo; quippe esse insatiabiles Regum animos, & quo ulterius dilatant confinia, eo ardentius cupere, ut eadem tollant, careantq. confinibus. Innatum esse privatis hominibus regnandi desiderium, regnantibus æqualem non habendi; esse Gostauum immenso animo, iamque non adhuc devictis Germanijs, inhiare Italiæ, Hispaniæq. non illum mero religionis zelo, aut vlciscendarum affinium iniuriarum venisse, spernere decora consilia Reges, quādo vtilia non sunt. Et quamvis timenda hæc non forent, esse tale suapte natura dominium, ut creditum alicui, in ipsius, cui creditum est, proprietatem transeat, atque adeo quandiu suppeteret spiritus retinendum, non modo hoc tempore, quo ipsi exercitum scribere, & per se ducere valerēt; quod decorum futurum erat magis & utile; seque securos ita fore, cum a Cæsare, tum a Rege; cum libera restaret optio alterutri ad libitum adhærendi, plurisque ab utroque se estimatum iri, cum victoria illius partis futura esset, quam ipsi sequerentur; atque hoc pacto se vere libertatem Germanicam defensuros, cum eam periculo subducerent, ne cum Cæsaris, Austriacorumq. iugum excutere intendunt, in Regis Sueciæ servitutem cadat; quod omnino

ninò effectum iri videbatur, atque Germania tota manifesto seruitio obijciebatur, si suum exercitum cum Rege coniungerent, atque in eo solo suas spes, viresque collocarent. Non deerant qui tutiora, melioraq. proponerent; fieret cum Cæsare pax, ac postea se inter ipsum, & Regem interponerent, curareturq. ut bellum ex Germania exularet, quod in ea tot annos sæuierat: sed erant, qui sumptus belli, aliaq. Cæsari indecora repeterent; & plus potuit odium in Cæsarem, religionemq. Catholicam, & Suecici Legati, qui ijs comitijs assistebat, impulsus, quam pium quietis desiderium; Concludere itaque exercitum conscribere, quem sub ductu ipsius Saxonis in Boëmiam mitterent, occupataq. in eo regno loca tuerentur, ac progredierentur vltcrius, si occasio pateretur. At consiliū præuenit Vollesteinus, qui tandem ineunte Aprili, collectis viginti militū millibus, Cenainio in Boëmiam mouit, factoque per Morauiam itinere prope Solsciamum Gallasium conuenit; inde occupatis in itinere Lauño, Slano, alijsq. oppidis nonnullis, Pragā circa idus Aprilis peruenit. Erant Pragæ quinque Saxonum millia, qui se gnauiter defendere decreuerant, ideoq. ductis fossis nouam ciuitatem separauerant a veteri,

vt si Volleſtainus noua potiretur (namque illum ab ea parte opperiebantur) in veterem haberent refugium ; verum munitam partem aggredi Volleſtainus inopportunum duxit ; atque adeo factò circuitu, tranſmiſſaque Moldaua, parua ciuitatem adortus eſt. Summo mane Cæſareus exercitus in vrbiſ conſpectum venit, quem erumpentes Saxones, velitationibus exceperunt ; ſed hiſ facile repulſis Volleſtainus ciuitatē corona circundari iuſſit ; mox diſpoſitis in ſancti Laurentij monte quatuor tormentis, murum ictibus ſterni mandauit ; ipſe ante Racinenſem portam, quæ ad album montem ſpectat, conſtitit ; miſiſq. qui portam ſecuribus perrumperēt, Marchionem de Grana hortulum Hoſpitalis Præmonſtratenſium, qui annexus eſt mœnibus occupatum miſit, vnde Saxones ſclopōrū exploſione portam ſubeuntes noſtros infeſtabant ; exequutus eſt Marchio mandatum ; atque protinus Saxones impetu factò in Hoſpitale pepulit ; verum ij nihil ſecius ex Hoſpitali, palatioq. quodam, quod mœnibus imminet, ſtrenue ſe defendebant, occiſiſq. eorum nonnullis, qui ad ſternendam portam acceſſerant, ab ea parte Volleſtainum prohibebant ; cū perrupto in monte ſancti Laurentij a tormentis muro, Cæſarei

in ciuitatem impetum fecerunt; tunc Volle-
 stainus quoque deturbatis machinarum icti-
 bus e palatio Saxonibus, strataq. porta in ciui-
 tatem ingressus est; & Marchio de Grana Ca-
 puccinorum adminiculo, qui ab interiori par-
 te auxiliatum accurrerant, perforato Hospita-
 lis muro in urbem penetrauit; sic per tres pa-
 refactos aditus ingressi Cæsarei obuios Saxo-
 nes vbique cædunt, quamuis ij in domos, du-
 ctasq. fossas se recipientes gnauiter resisteret;
 distinxerant Saxones fossis, muniuerantq. li-
 gneis cancellis veterem, & nouam ciuitatem,
 in parua parte non adeo diligentes, cum inde
 hostem non metuerent; inceperant tamen
 munitiones, quarum nonnullæ ad iustam iam
 defensionem erant perductæ, præbebantq. Sa-
 xonibus refugium, quamobrem multis in lo-
 cis renouatum est prælium, ac præsertim apud
 forum acriter pugnatum est. Sed grauitè in-
 sistentibus Cæsareis, Saxones ad arcem se rece-
 pere. Tunc Vollestown missio Gallasio pon-
 tem versus, qui hosti resisteret, si forte suis sup-
 petias veniret, contra arcem tendit. Erat in ar-
 ce Hofchirchius a Saxone Pragæ præfectus,
 qui cum aduentare Vollestown obseruasset,
 protinus cū omni equitatu per arenosam por-
 tam arci proximam Laitmeritum versus in-

fugam se dedit. Circa arcem per sesquihoram velitatum est; interim Saxones, qui in veteri nouaq. ciuitate trans Moldauam erant, auxiliatum suis signa mouere, superatoq. ponte, qui adhuc pro se tenebatur, in paruam partem irrumpere tentarunt, sed Gallasius imperum retudit, ac strenue resistit, ideoq. illi re infecta pedem retulere; & qui in arce erant, cum subsidium desperassent, deditionem fecerunt. Potitus arce Vollestinus ad pontem venit, atque imperatam deditionem facere respuentes hostes, qui reliquum ciuitatis tenebant, aggressus, portā pontis perfregit; inde super ponte cœptæ velitationes, pulsiq. Saxones vsque ad medium pontis, vbi extructis cancellis muniebantur; tum pulsato tympano Saxones deditionem fecere; atque sine armis, & vexillis dimissi sunt: capta sunt viginti & vnum hostium vexilla, poteratq. diutius ciuitas defendi, ac Vollestinus detineri, cum egregijs munitionibus tam in veteri, quam in noua ciuitate Saxones abundarent; sed ignauia Ducis, & militum hanc victoriam Vollestinus faciliorem fecit, qui Pragēsis iratus, quod adiuuisset Saxones, atque e fenestris in parua parte eiaculari esse in Cæsareos dicerentur, eam partem a militibus diripi passus est, eratq. etiam
permis-

permissurus, ut cæteræ quoque vetus, & noua ciuitates expilarentur, ne deprecantes Senatores, ne patriam euerteret, oblata graui contributione, ira feruidum animum placassent. Diues fuit parua partis præda, in qua totius Prægæ ditissimi habitare solent, atque Itali, Gallici. potissimum, qui negotiationis causa in ea ciuitate commorantur; militesque. mirum in modum erga Ducem beneuolos reddidit. Capta Praga Vollesteinus restaurari dirutum murum præcepit, reficiq. munitiones; Inde aliquot dies domi suæ (quam Saxones. illasam. seruauerant) commoratus, relictoq. in vrbe præsidio, ad recuperanda reliqua Boemæ loca, quæ a Saxone occupata fuerant, exercitum duxit; atque breui tempore, faciliq. negotio, vix repugnantibus hostibus Laitmeritum, Egram aliasque ciuitates, & oppida expugnauit, ac Saxones ex tota Boemâ eiecit. Pari felicitate in inferiori Saxonia fruebatur Popenaimus, qui recedentibus Banneris, ac Todio cum Sueco milite, deductum iterum ex præfidijs exercitum in ditionem Bremensis duxit, & oppida a Suecis occupata recuperauit. Neque audebant Bremensis, & Lunemburgicus, qui ab obsidione Niemburgi recesserant, in aperta prodire, quamuis haberent numerosum

sum militem; namque virtuti suorum diffidebant, qui ex rusticis casis tumultuarie euocati, cum veteranis Popennaimi militibus minime erant conferendi: timebantq. eius Ducis virtutem, qui inuictus animo; promptus ingenio, indefessus corporis robore, strenuus manu, prudenti in militaribus rebus, feliciq. celeritate insignis, hosti semper terribilis omnibus artibus imminebat. Vfus itaq. hac opportunitate Popennaimus, apertam eorum regionem depopulatus est, retulitq. opimam prædam, & contributiones copiosas exegit; Inde quoniam Coloniensis Archiepiscopi ditio a Suecis, qui Brunswicensem Ducatum inuaseraut, infestabatur, in eum Ducatum exercitum duxit, vt Suecos a Coloniensi ditione, ad hunc defendendum eliceret; occupatisq. ciuitatibus aliquot, nō parum Suecorum partes afflixit: nam Bannerus, ac Todius, qui resistere poterant, cum Rex ex Palatinatu Rhēni Francofurtum secessit, in eam prouinciam copias ducere iussi fuerant, vt Hispanos eijcerent, sic relictis Bremensi, & Lunemburgico eo se contulerant, occupauerantq. Haidelbergam ab Hispanis desertam, & post plurimum dierum obsidionem expugnauerant Francothaliū, ac deinceps ad Regem exercitū duxerant,

xerant, vnde cum debiles Popennaimus Suecorū vires inuenisset, facile in eam regionem excurrerat. Dum hæc agerentur in Germania, Galliarum Rex. cū exercitu Lotharingiam ingressus, Ducem illū impedit, ne paratum auxilium Cæsari ferret, atque in suas partes armis deduxit, acceptis loco pignoris oppidis nōnullis. Treuirensē quoque Archiepiscopū, cuius ditionem Suēci deuastabant, amice ab ijs defendit, atque sub suam tutelā recepit, namque ita Treuirensis petierat fieri, cum imminere hostes, & se sine militibus esse videret.

- 12 At Gostauus regresso in castra Bauariæ Duce commode cis Lyciā impedimenta exercitus tulit; & cum Bauarum in suas partes trahere speraret, in ipsius ditionem ducere noluit, donec tractatus, qui cum illo habebatur ad finem perduceretur: Interim cum a cohæreticis in Sueuiam vocaretur, Augustam Vindelicorum castra mouit, eaque in deditionem accepta, imperfecto adhuc cum Bauaro tractatu, cum exercitu Bauariam ingressus est. Detinuerat tractando Dux Bauariæ Regem, quasi illius partibus certis conditionibus accessurus, vt colligendi vires lucraretur tempus, quibus Bauariam tueretur. Verum hoc ipsum suspicatus Rex, postquam aliquot dies expectauit, ferui-

feruidus ira exercitum in Bauariam duxit, occupatisque, ac incensis aliquot oppidulis, Monachium Ducis sedem expugnauit, atque se adhibiturum facēs minabatur, nisi ter centena thalerorum millia a ciuibus sibi numerarētur; quam ingentem auri summam cum ciues in prōptu non haberent, a suo Duce duas tertias partes mutuo acceperūt, reliquum ipsi dedere. Hinc prācipua in Bauarum iracundia inuectus Gostauus, quem sui delusorem appellitabat, vltius pergens, totam fere Bauariam misere deuastauit, ac demum ante Ingolstadium posuit castra. Vrbs est Ingolstadium in Norico munitissima, ad Danubium sita, quā ciues prāter veteres munitiones, terrore Regis impulsī, excitatis extra ciuitatem nouis munimentis, inexpugnabilem fere reddiderant: Inerat prāpotens prāsidium, eamque Dux necessarijs omnibus rebus impleuerat, cum obsessurum Regem censeret, speraretque dum is in obsidione distineretur, sibi futuram commoditatem colligendi in superiori Palatinatu, in quē se receperat, milites, quibus sua ditione Regē expelleret; verum Gostauus ubi tentata expugnatione, nihil se proficere obseruauit, neque speraret fore, vt ciues deditionem facerent, post nonnullos dies obsidionem

dionem soluit, vastatisq. circum agris, exercitum in Sueuiam reduxit; infecta est Sueuia, maiori ex parte Lutheri veneno, & quamuis etiam Catholici inhabitent, numero tamen ab hæreticis superantur; quamobrem nemine fere resistente ea regione Gostauus potitus est: namque Ulmam, Memmingam, aliasq. eius circuli liberas ciuitates, haud euaginato gladio in deditionem habuit, contributionesque
 13 opulentas, ac spontaneas accepit. Eadem alacritate Ratisbonensis Senatus, qui ex meris Lutheranis constabat, suam ciuitatem Regi proderet tentauit; missis enim litteris illum admonebāt Senatores, vt certa noctis hora cum data tessera veniret, mitteretue equitum aliquot turmas, quibus se consignaturos ciuitatem pollicebantur; inesse ciuitati debile præsidium, neque munitiones, quas extra ciuitatem Bauarici inceperant, ad defensionem esse perductas, vnde vsque ad portam indefensus incustoditusq. patebat accessus, se vero aperturos portam Suecis, qua in dormientes Bauaros impetum facerent, atque ita nullo negotio liberaturum Regem propensam in se ciuitatem a Cæsarianorum Catholicorumq. seruitio. Sed euentus impium conatum elusit, nam litterarum lator dum Donauerdam ad Regem
 Ec tendit,

tendit, a Bauaricis aliquot militibus capitur, & reperta epistola ad Ducem adducitur; qui oblata occasione valde lætatus est; namq.angebatur eius ciuitatis cūra, non ignarus Senatum superstitionis impulsu Regi adharere; neque habebat prætextum, quo præsidium ad libitum imponeret, & cum sufficientes copias ad ciuitatem tuendam se impositurum, ciuibus obtulisset, respuerant illi, tantumque peditum aliquot signa ad ostentationem admiserant, cæterum se suam ciuitatem strenue contra regem defensuros asserentes. Ratisbona totius Bauariæ Metropolis ad Danubium sedet, pulcherrimo ponte lapideo, splendidisque ædificijs, ac ornatissimis templis ornata; Imperialis est ciuitas, fruiturq. libertatis priuilegio, sed cum in medio Bauarici dominiij posita sit, sub tutela illius Ducis viuit; cingitur præaltis mœnibus antiqua architectura constructis, & Bauarus cum eam ad inuadendum superiorem Palatinatum cōmodissimam censeret, desperaretq. se posse illum retinere hac amissa, postquam firmo præsidio, renitentibus ciuibus, eam munire non poterat, in suis agris, qui fere ad mœnia accedunt, munitiones inceperat, quibus ciuitatem cingeret, atque ita vel inuitam defenderet; sed libentius im-

imposuisset præsidium, vt diximus, si aut ciues voluissent, aut ipse aliquo prætextu potuisset, nunc oblata honesta opportunitate, quoniam litteræ responsum a Rege non exigebant, sed citum ipsius aduentum, & quam scribebant tesseram, hora cōstituta cum equitatu ad ciuitatem accessit, iusso peditatu mox sequi, ne fortasse ab ijs ciuibus, qui illis litteris Regi se prodidissent, hoc stratagemmate in insidias deduceretur: ac cum in conspectum mœnium venit, missa equitum manu, qui destinatam portam a ciuibus acciperent, ipse ad bombardæ ictum cū reliquis substitit: & missi milites data ciuibus tessera, qui auide Regem opperiebantur, apertam portam præsidio firmare; quo cognito Dux cum reliquo equitatu adfuit, & ciuitatem ingressus est; Et ciues vbi milites in ciuitate videre, Regē, Suecosq. esse rati, elata voce in lætitiæ signum, terroremq. Bauarici præsidij, viuat Rex Sueciæ proclamauerunt; tunc Bauari diductis gladijs perduelles ciues, Senatoresque promiscue cedere, & iuncti præsidio domos expilare. Verum Dux ciuitatem diripi non est passus, sed cum dies illuxit, vocatis ad signa militibus, militari licentiæ finem imposuit, paucorum cæde contentus, & aliquorum ex ijs, qui Senatum

ad defectionem impulerant, supplicio. Mox imposito numeroſo præſidio, ciues ad munitiones promouendas coegit, pecuniaq. multauit; Inde ad milites colligendos in ſuperiorem Palatinatnm reuerſus eſt, nam rediturum ex Sueuia in Bauariam Regē metuebat, qui potiffimarum Sueuiæ ciuitatum potitus, quæ Popennaimus in Brunſuicēſi Ducatu gereret, accepit; atque eapropter dimiſſo cum valida manu Bannero, qui illi reſiſteret, ipſe Italiæ inhiare videbatur; namque Lindauienſes tentauerat, vt ſuos itidem, ſicut aliæ Sueuiæ ciuitates, admitterent, aditumque in Mediolanenſem Ducatum præberent: ſed & Lindauienſes, quorum ciuitas Cæſareo præſidio erat firmata, hoc facere reſutarunt, & Rex a Volleſtainsi progreſſibus reuocatus eſt. Non tamen ſine metu his diebus vixit Italia, quæ imminere præpotentē, victoriſq. elatum hoſtem tam prope videbat, variaq. agitabantur conſilia, prout diuerſis quiſque affectibus traheretur, & erant, qui Regis arma in Italia cuperent, odio præſentium vel maniſeſte deteriora ambientes; ſed purioris mentis viri rependebant animo antiquas harum gentium inuaſiones, iamque patriæ deuagationem deplorabant. Verum enimvero Dux de Feriali

Hispa-

Hispanus , penes quem erat Mediolanensis Ducatus cura , collectos duodecim mille milites Marchione Spinula , inuicti illius Ambrosij filio , duce in vallem Tellinam misit, vt si hostis inuaderet , illum remoraretur, donec ipse maiorem instrueret apparatus ; atque omnino verebatur , ne Rothomagensis Dux , quem Grifones (ita hodie superioris Rhætiæ populi appellatur) Generalem suorum armorum Ducem elegerant, copias suas cum Suecis coniungeret ; atque inde & Sueci, & Grifones in Mediolanensem Ducatum irrumperēt, improuisumq. adorirentur : Quamobrem in eo Ducatu & Neapolitano regno delectus imperauit ; cæteri q. Italiæ Principes suas ditiones cæperunt munire , ac præsertim Genuenses , interdictis alijs fabricis , cæmentarios omnes fabros ad nouorum mœnium fabricam conuocarunt , vt eo citius ciuitas muniretur . Sed hæc mea quidem sententia parum suffecissent contra veteranos, exercitatoq. milites, assuetos vincere , ac spe insuper prædæ accensos , quamuis in Italia aliter bellum geri dicatur , sintq. arces plures numero , & fortasse munitiores quam in Germania , atque regio angustior, ac sterilior, quæ magnum exercitum diu alere non potuisset . Verum Deus misertus infelicitis

felicis Italiæ, minatus flagellū, deinceps auertit, & Regem ad alias affligendas prouincias
 14 deduxit. Detinebatur inter hæc ab Arnemio in Boëmia Volleſtainus; namque ille tractatum pro Duce Saxonie venerat, qui ad pacem se inclinare simulabat: huic transactioni plures dies inſumpti, ſumma ſpe concludendæ pacis, iamque aliquando pro concluſa habebatur, cum Volleſtainus tandem cognita arte, Arnemium re infecta dimiſit, & cum exercitu latum Bauaro ſupperias mouit; hic enim continue ipſum in Bauariam vocabat, vt ſuam ditionem recuperaret, quod flagitabant & Hiſpani, vt Suecus a limitibus Italiæ reuocaretur, ſuſpicantes fortasſe, ne vicinitate Regis populi ad rebellionem inuitarentur. Menſe itaque Iunio, relictis in Boëmia cum Holca Generali ordinum ductore aliquot militum millibus, qui Saxonibus, ſi forte ingruerent, reſiſterent, ipſiq. Miſniam infeſtarent, Volleſtainus cum triginta militum millibus, magna. tormentorum copia, in ſuperiorem Palatinatum venit; atque vt Suecum e Bauaria, Sueuiæ. eliceret, cœpit deuaſtare Norimbergensẽ tractum; nam ire ipſe in Bauariam noluit, tum quod regio illa ſuapte natura ſterilis, deſtructa eſſet, neque militibus victum ſuppe-

suppeditare posset, tum ne sedē belli in ami-
 ca prouincia constitueret: Sueuia quoque ge-
 rendo bello erat inepta, montibus, locisque
 iniquis plena. Ducto itaque in Norimbergen-
 sium ditionem exercitu, Suauochium, quod
 primum se obtulit eorum oppidum, adiit, &
 cum oppidani annonam pecuniamq. contri-
 buere denegarent, locum expugnauit, & di-
 ripuit, inde motis Norimbergam castris duo-
 bus ab vrbe passuum millibus tentoria fixit,
 atque vallo & fossa se muniuit, dum equites
 totum illum tractum, qui cis Pegnesum flu-
 uium iacet depopularentur. Admonuerant
 de Vollesthaini aduentu Norimbergenses Re-
 gem, cum illum intellexere in superiorem Pa-
 latinatum copias duxisse, nam imminere sibi
 hanc procellam suspicabantur; & Rex ne ami-
 cam ciuitatem, quam maximi pendebat, inde-
 fensam relinqueret, claudereturq. in Sueuia,
 si eam amitteret, ex Sueuia diducto exercitu,
 factoq. mira celeritate per Bauariam itinere,
 ac ea prouincia iterum deuastata, cum viginti
 militū millibus Norimbergam peruenit, an-
 tequam Vollesthainus Suauochium expugna-
 set; cumque illum maiorem suo habere exer-
 citum sciret; trans Pegnesum fluuium positis
 castris, vallo fossisq. itidem se muniuit; atque

ita vterque exercitus circa Norimbergam cō-
 fedit. Sedit Norimberga inter Bauariam &
 Franconiam, in eo agro, qui peculiari nomi-
 ne Noricum dicitur; dubium autem est Fran-
 conia, an Bauaria cedat, ipsiq. Norimbergen-
 ses neque Bauari dici volunt, neque Franco-
 nes, sed separatum quoddam genus tertium,
 nempe Norici. Est ea regio in Hercinia silua
 quasi secessus horridis circumquaque nemo-
 ribus cinctus, atque defensus; cumque Hunni
 latissima populatione vastarent Europam, ex
 Bauaria, & Boemia, alijsq. proximis prouin-
 cijs profugi huc confluxere, atque prope Pe-
 gnesi, & Regnesi fluuiorum confluentem ædi-
 ficarunt Norimbergam; inde accurrentibus
 agricolis, Herciniaq. pastoribus est aucta; sed
 cum latrocinij nullius dicto parētes Norim-
 bergenses viciniam infestarent, Henricus Ba-
 uarus immissa veteranorum colonia eos com-
 pescuit, legesque iuxta quas viuerent dedit;
 addiditq. religionē, & primum sancti Ægidij
 templum erexit, ac muro ciuitatem cinxit.
 Mox Conradus secundus Imperio coniunxit:
 & Democratica politia vsa est, donec Carolo
 quarto imperante optimates plebem subege-
 re, designatisq. octo & viginti familijs, ex qui-
 bus Senatores eligerentur, Aristocratiam fun-
 dauere.

dauere. Catholicam fidem vsque ad Lutheri tempus excoluit, cuius inter primas ciuitates deinceps veneno infecta est. Ipsius porro Norimbergæ ambitus octo passuum millibus patet, cingiturq: duplici muro, antiqua arte munito; interfluit fluuius Pegnesus, cuius ripas multi lapidei pontes iungunt; Vrbs nobilis est, & præclara, magnifice operibus ædificijsq. publicis, ac priuatis ornata; at in agro sterili, & arenoso, vitibusque carente sita, cum adiacentes Boemia, & Franconia feracissimæ sint regiones, atque ob soli sterilitatē industrium populum habet; omnes enim ciues, aut opifices sunt mechanicis in artibus excellentes, aut negotiatores, qui mercimonijs causa varias adeunt regiones; vnde multæ illis diuitiæ, & magnum in Germania nomen; fertur in medio ferme Germaniæ esse, atque adeo aptissima Imperatoribus sedes; Arcē habet regiam in colle vrbi imminēte sitam, vetustissimam, ex qua in urbem, & adiacentes agros patet prospectus: Cæterum infelix ager vmbrosis saltibus regitur, atque scædis paludibus interrumpitur, vnde aër insalubritatem quoque contrahit, & ciuitas ipsa hoc incommodo vexaretur, nisi paulo editiori loco posita apertiori cælo frueretur. Munificio vero, qua ipsa ciui-

gebatur, non erat talis, vt Cæsarianorum impetum ferre potuisset, ni ciues extructis munimentis totam ciuitatem circumdedissent. Expirate Iunio Vollestinus duobus passuum millibus vrbe procul cis Pegnesum, vt dicebamus, confedit; concisisq. nemusculis; quæ delectum situm tegebant, vallum extruxit, ductaq. circum fossa se muniuit, cum prius explorasset vrbis statum, & adesse Regem ex ipsius munitionibus cognouisset. Extructo nonnullorum dierum spatio, hostibus conuiuentibus, vallo, milites per regionem discurrere, incendere pagos, expilare domos, tigna, asseres aliaque ad struendum necessaria asportare, quibus intra vallum tabernacula extruerent, atque breui altera fere ciuitas prope Norimbergam iacere videbatur; neque interrompebat hostis militum opus, ipse quoque castrametando intentus, quique se facturum satis re-
batur, si tantum exercitum distineret, atque, in ea obsidione implicaret, qui plus fortasse, nocere potuisset; leuioris armaturæ equites solum, ijque quibus excurrendi cura obuenerat, & Croatia singulis diebus exiguis velitationibus exercebantur; neque contra ciuitatem aliquid mouebatur, quæ nostris castris satis procul incommodum asserre, aut pati nequibat;

rantumque intuentium prospectui patebat.
 1, Atqui dum res ita apud Norimbergam se habent, Popennaimus in Brunsvicensi Ducatu male Suecos exceperat, ipsumq. Brunsvicum a Suecis occupatum antea, tentatumq. a se frustra, obsidione cinxerat, cum suis laborantibus Bannerus a Rege missus præsto adfuit; tunc Popennaimus soluta ciuitatis obsidione, inferior militum numero, astu tamen, & militarium rerum peritia superior, exercitum contra hostem duxit, non eo tamen animo, ut conflingeret, sed ut Suecorum progressus obseruaret, ac si opportunitas daretur, distractos opprimeret. Sed Bannerus egregius quoque Dux unitis viribus incedens, ipsumq. ad pugnam laceffens, Popennaimi conatus effugit; neque quidquam aliquot hebdomadarum spatium momenti actum est, utroque opportunitatem quærente, donec Popennaimus deludere Bannerum posse diffidens, inuitatusq. a Consaluo Cordubensi, ac Marchione de sancta Cruce Hispanorum in Belgio Ducibus, qui Traiecto ad Mosam ab Hollandis obfesso opem ferre parabant, ut suas quoque copias ad subsidium ferendum coniungeret, in Belgium discessit; ne ciuitas illa, magni ad rerum summam momenti in hostium manus caderet; &

Bannerus liberatis a Cæsarianorum inuasionibus Brunswicensi Ducatu, atque inferiori Saxonia, relictoque præsidio, ad Regem, a quo
 16 vocabatur, Norimbergam venit. Sed Bauariæ Dux Maximilianus, profecto Norimbergam Rege, extenuatisq. in Bauaria Suecorum viribus, cum exercitu, quem collegerat, recuperare amissa loca instituit, quod facili negotio consecutus est, cum Rex in ea prouincia nullum fere præsidium reliquisset, & incolæ Catholicæ fidei addictissimi, ægre Suecorum dominium ferentes, aduenientem priorem dominum lætis animis exciperent: recuperato itaque Monachio Maximilianus, alijq. locis nonnullis, in quibus exigendarum contributionum gratia Sueci remanserant, præsidium imposuit, quo regionē tueretur, si quid hostis ex Sueuia moueret; ipse deinceps cum Aldringhero, ac Tylliani exercitus reliquijs, quas collectis proprijs militibus ad numerum viginti millium auxerat, Norimbergam ad Vollestaunum iter intendit, vt iunctis viribus Regem obsiderent, opprimerentque, atque ineunte Augusto Cæsareis sua quoque castra coniungere ducto vallo incepit. Ante Bauari aduentum nihil Vollestaunus tentauerat, quise opere præcium facturum arbitrabatur, si Go-
 staunum

stauum remoraretur, atque impediret, ne vltius discurreret; sperabat enim interim, vt interrupta victoriarum ipsius fama, ipsoque quasi obfesso, illius minueretur authoritas, atque aliqui ab ipso deficerent, vnde sibi contra solum, distantemq. a patriæ auxilijs faciliior, & cum minori sanguine futura esset victoria; neque omnino secus facere Vollestaius poterat, cum detrectaret Gostauus acie decernere, nec adoriri præstaret situ ac vallo egregie munitum veteranū victoremq. antea exercitum. Tendebāt itaque vtriusque Ducis ad eundem finem conatus, atque vterque temporis sibi profuturam iacturam censebat; interim ægro-
 tare nostri ob aëris intemperiem cœpere, cum castrorum humilis situs, nemoribus obfessus, atris vaporibus esset obnoxius; atque aqua, quæ potui seruebat, impura, sanitati non parum officiebat: quoniam a Pegneso in tota castra vix aqua distribui poterat, cum aliquæ legiones nimis procul abessent, & hostis semper circa ipsum versaretur, atque eos, qui aquatum ad fluuium ibant, cū hoste velitari oportebat; qua de causâ milites effossis humi puteis limosam aquam haurientes, bibentesq. facillime in ægritudines incidebant; accesserat pabuli penuria, nā deuastatis circum agris, consumptisq.

sumptisq. prodige frugibus, quæ adiacentibus in pagis fuerant, ad quinquaginta passuum millia aliquando Norimberga procul pabularum ire erat necesse. Neque mirari quis debet tantam circum regionē adeo breui temporis spatio fuisse deuastatā, quia magna mortalium multitudo id effecerat, cum in nostris castris solum præter milites, quindecim saltem fœminarum millia, quæ semper Germanos milites sequuntur, totidem fere calorum, famulorumq. & rhedariorum, ac supra triginta equorum millia fuerint, tantū impedimentorum moderni exercitus trahunt. Adde quod ea, quæ colonis ad annum sufficerent, militibus totidem prodige abutentibus ad mensem non sunt satis. Aduentu Bauari hæ difficultates auctæ, auctis qui eduliorum egerent, & quamuis trāsmissō Regneso, ea quoque pabulum iretur, erat tamen id consequi ita difficile & periculosum, propter hostis incursiones, ut præstaret prætermitti, atque adeo minime subleuata est penuria, sed in dies succrescebat; si vero vinum, aut quippiam delicatius cupiebatur, ex Boëmia, & Austria, longissimo itinere, curribus quærendum erat; Sueci contra præter opulentam, omnibusque necessarijs rebus antea prouisam ciuitatem, Franconiam

propin-

propinquam habebant, abundantem frugibus, vinique feracissimam regionem, atque inde Hassiam, & Virtembergam, ex quibus necessaria abunde, libenter inferuientibus rusticis, suggerebantur. Hic erat exercituum status, quando Bauarus cum suis copijs Vollesthaino se coniunxit; ac Vollesthainus tentare instituit, an vltra Regnesum validam militum manum mittere, atque Suecos ex Franconia posset eijcere: sed Rex hoc animaduerso omni conatu restitit, missisq. nuncijs Bannerum ex Brunswicensi Ducatu ad se venire iussit, ne spoliatus Franconia apud Norimbergam obsideretur. Interim detinēdo Vollesthaino Galliarum, & Angliæ Regum Legatos specie pacis tractandæ ad eum misit, atque occasione transactionis aliquot dierum induciæ factæ. Ferunt Gostauum aduentu Bauari valde perculsum; quem minime crediderat Vollesthaino accessurum, cū inter eos vigeret æmulatio, dicereturq. Bauarus potissima fuisse causa, cur in Ratisbonensibus comitijs ille fuisset exauctoratus; neque videbatur censendū, fore vt Dux Bauariæ sub auspicijs Vollesthaini militaret. Sed illum necessitas suæ regionis tuendæ ad officium deduxit, atque hic ob debitum erga Cæsarem obsequium iniuriæ oblitus est, & vtrosque

17 ut ad inuicem. Inter hæc Saxo amissa Boë-
 mia non consultum duxit cōscriptum ex Tor-
 gauenſi decreto exercitum, in eam prouin-
 ciam mittere, cui ſciebat adeſſe Holcam præ-
 ſidio, & expilatis priori anno pluribus ciuita-
 tibus, tenuem in ea futuram prædam coniicie-
 bat; atque adeo Arnemium ſuorum caſtro-
 rum præfectum Sileſiam cum exercitu inua-
 dere iuſſit, in quam a Lutherana factione in-
 uitabatur. Ingreſſus Arnemius, Glogouium
 maius, aliaque loca expugnauit, ac Catholi-
 cōs miſere afflixit, & Vratiſlauiam, quæ Cæſaris
 præſidium reſpuerat, quæque ſe deſenſuram
 proprijs viribus iactauerat, ſponte deditionem
 fecit; inde ulterius progreſſus Arnemius, Niſ-
 ſam, aliaſque ciuitates occupauit, deuasta-
 uitq. eam prouinciam fere totam. Holca ve-
 ro, qui Boëmiæ regnum defendere, hoſtemq.
 propulſare debuerat, ſe non habere ſufficien-
 tem militem cauſatus, Arnemio non occur-
 rit, ſed quaſi ad ſua defendenda hoſtem reuo-
 caturus, in Miſniam duxit, & Suichauiam, Pla-
 gam, Hoffium, aliaq. eius prouinciæ oppida
 expugnauit, miſſoq. nuncio Volleſtainum de
 Arnemij irruptione admonuit, ut ſibi ſubſi-
 dium mitteret, quo auctis viribus, in aper-

to valeret resistere . Nouus , dum hæc fierent , excitatus tumultus vehementi , sed inani , assultu Cæsareos afflixit , nam superioris Austriæ rustici exercitum Cæsaris apud Norimbergam detineri conspicati , atque Arne-
mum deuastata Silesia , in Morauiam fere peruenisse , huius stimulis excitati , sumptis quæ in promptu erant armis , trucidatisq. Cæsarianorum aliquot , qui apud Linzium diuersabantur , rebellionem cœptauere & ad viginti ipsorum millia coiuere , eratq. vltius progressurum incendium , & fortasse inferioris quoque Austriæ rustici manus dedissent , ni immissæ Vienna duæ peditum , & vna equitum legiones facili negotio initia seditionis compressissent ; nam cum rustici venire in prouinciā , milites sensere , vt viles sunt , & pusillanimi , pars abiectis armis , quasi nihil fecissent , ad sua rura rediere , pars in Boëmiā , atque inde in Silesiam per nemora ad hostem habuere refugium , & resistere ausi , fugati , trucidatique , atque procerum nonnulli , qui cæteros ad rebellionē instigauerant , iniectis catenis Viennam deducti , vbi struendo vallo , mœnibusq. instaurandis mancipati sunt , quamuis post semestre liberatos Cæsaris indefessa miseratio
18 ad suas sedes remiserit . At vero apud Norim-
G g bergam

bergam Volleſtainus accepto ab Holca nuntio de Saxonum in Sileſiam irruptione ad ipſum aliquot legiones miſit, quibuſcum capta in Miſnia loca retineret, & ad Sileſiæ conſinia accederet, diſtineretq. ſuſpicionem hoſtem, donec maiores copias ipſe ſubmitteret, quibus ille ex ea provincia pelleretur; Interim Legati Gallus, & Angluſ, poſt varias, inaneſq. tractationes, Norimbergam rediere, neque pro captiuis redimendis ſaltem concludi potuit, ut eo modo, quo in Belgio cum ipſis ageretur; Namque negabat Volleſtainus hanc facilitatem perduellibus Germanis concedere, ex quibus iam totus fere Regis exercitus conſtabat, cum Suecorum maior pars, aut in præſidijs diſtributa, aut ferro, alijsq. incommodis enecta, aut domum reuerſa eſſet. Legati igitur ut diximus re infecta abiire, & poſt paucos dies induciæ expirarunt; inde ad militaria munia reditum, & quotidianis velitationibus res agebatur. inter quæ Bannerus ex Brunſuicenſi Ducatu factus per Haſſiam, Fræconiamq. itinere cum ſuo exercitu Regi ſe coniunxit; neque potuit Gallafius, qui ad hoc a Volleſtano cum valida manu miſſus fuerat, prohibere; cum iam cis Mœnum Bannerus veniſſet, & per loca Cæſarianis iniqua, militari ordine
ince-

incedens, iter faceret. Ac ubi Gostauus Banneri copias suis addidit, tempus vltius tere-
re inuile duxit, cum iam annus senesceret,
atque ingruente Autumno pluuijs vię disrum-
perentur, militesq. contraherent ex humidita-
te morbos ac ægitudines; decreuit itaque ho-
stem laceßere, cum suorum virtuti plurimum
confideret, & prælio decertare, aut inde rece-
dere, & in amœniorem regionē ducere exer-
citum, vt fessi milites resumerent vires. Data
itaque Banneri militibus, qui nuper venerant,
quattuor dierum requie, postridie nonas Sep-
tembris e castris in Cæsarianorum conspe-
ctum instructa acie prodijt, hinc explosis cam-
pestribus, quas secū attulerat, machinis, clan-
gentibusq. tubis Volleßtainum ad conflictum
prouocauit. Decretum Volleßtaino fuit, totius
rei summam vni prælio minime committere,
quamuis quibusdam indecorū videretur, tan-
to cum exercitu pugnā detrectare, atque ob-
futurum expectationi de Volleßtaino partæ, si
cum Rex sui copiam in aperto faceret, ipse
munitionibus otiosus insideret, & fore, vt ipsi
amissa bene gerendæ rei occasio imputaretur;
nam considerato exercituum statu Cæsariani
superiores viribus apparebant, quorum exer-
citus ad triginta militum millia ascenderet,

Sueci contra vix viginti quinque millium numerum attingerent. Esse insuper Cæsarianos corporis robore integros; qui iam sesquitercium mensem quieti dederant, Suecos Banneri, qui hostilis exercitus erant pars potissima, itinere defatigatos, ac viribus destitutos; atque adeo moueri potius desperatione Regem ad prælium, quam bellica aliqua ratione. Verum enimvero Vollestinus opinionem hanc, quanquam decoram, & non omnino inutile reiecit; differebat porro duobus exercitibus Bauari, & suo, non Cæsarem solum, sed Catholicos omnes Germaniæ niti; neque si isti amitterentur, sperandum, ut bellum posset renouari; nempe exhausto pecunia arario, militibusque, imo incolis carente tota, Cæsaris ditione; vnde nouus exercitus conscriberetur? & tametsi in promptu illa essent, non daturum tempus Regem, si vinceret, ut nouæ cogerentur copiæ, sed recta Viennam versus directurum cursum, ut Cæsarem opprimeret, suoq. voto fieret compos; ac daturus manus Bœmiæ, & superioris Austriæ rusticos, qui nihil aliud præter Ducem expectarent, atque ita illum, quod peteret, assecuturum; & omnino ex minima quaque aduersitate casuras res; scilicet si pares ex prælio discederent,

plus

plus expectationis de se partæ amissurum, qui superior militum numero hostem vincere nesciisset: Quid si vel minimū inclinaret acies, & cedere oporteret? quo petendum? nempe in Bauariam, aut Boëmiā, amicas quidem regiones, sed ob hoc ipsum non exponendas belli incommodis, quando id in hostili regione geri posset; esseq. iam eas ita afflictas, vt exercitum alere nequirent: Et non adeo certam esse victoriam, vt credebatur, quia quamuis Cæsareus, iunctus Bauarico maior esset exercitus; Bauari tamen milites, maior iam totius exercitus pars, nuper tumultuarie collecti, belloq. erant inassueti; ac ij, qui antiqua numerabant stipendia, Regis fortuna terriū, vt superstitiosa & credula militaris gens est, ægre, & inique erant congressuri: tutius esse igitur, imo iuxta militaris, politicæq. disciplinæ regulas necessarium quodammodo, nunc tēporis prælium effugere; hoc insuper addito, quod si prælium amitteretur, saltem Boëmiā, & Bauaria in hostis potestatē veniebant, quarum defensionī accurrerat; hostis contra in propinquā, munitissimāq. ciuitatem habebat refugium præsentaneum, quo recedere integris rebus poterat, simul ac inclinante sua acie placuisset, atque ibi alia auxilia e proximis,

mis, amicisq. prouincijs opperiri. neque carere sua vtilitate, & decore hoc cōsiliū, nam satis actum esse videbatur, si continuum victoriarū Regis cursum stitisset, docuissetq. exemplo ipsi posse resisti: præterea peregisse se ea, propter quæ venerat; scilicet exhæreditarijs Cæsaris regionibus hostem pepulerat, atque insuper amicum Bauarum ab ipso liberauerat; ac liberaturum se Catholicos breui, vbi tutior opportunitas daretur: perduelles reliquos, hæreticosque, qui sponte Regi se dederant, & sponte satiātum iri, foreq. vt Suecos pariter odissent, vt Cæsarem erant exosi; atque omnino esse ad officium redituros, alioqui non defuturum tempus, quo debitas luerent pœnas. Persuadebat hoc idem & Bauarus, qui similibus fere rationibus mouebatur, ac liberata sua ditione, haud libenter exercitum discrimini obijciebat. Cæsarei itaque acie pro more militiæ in castris instructa, dispositisq. pro vallo excubitoribus, intra castra se cōtinuere; pars equitatus solum, Croatæq. ac Poloni velitatum egressi; & Rex vbi vsque ad tertiam ante Vesperam horam in acie milites habuit, victoriam canentibus tubis, in castra reduxit, ac
 19 sequentibus quattuor diebus nihil actum. At non quiescebat Gostauus, qui apud Norimbergam

bergam diutius morari inutile iam censebat; cum nihil ageretur, milesq. interim ægritudinibus deficeret; qua de causa omnino abire decrevit: sed antequam discederet, tentare voluit an nostrâ castra furtiuo aggressu valeret expugnare, & incautos Cæsareos delere; Quinto igitur idus Septembris ductum præcedenti nocte. prope urbem, ne ab hoste obseruaretur, cis Pegnesum, exercitum, vltima vigilia in varias distributum acies. Cæsarianis castris admouit; ac prius dispositis tribus eminentibus in locis tormentis aliquot, quibus tabernacula intra castra euerteret, militesq. infestaret, ac deterreret, vbi cuncta ad præscriptum parata vidit, breuibus hortatus milites ad rem bene gerendam, sopitosq. ac inermes Cæsareos opprimendos, manipulos aliquot ad superandum vallum submisit, signumq. illis, qui tormentis præerant dedit; ipse in propinquo nemusculo delituit cū reliquis copijs, ne murmure militū Cæsareos excitaret, obseruaturus inde exitum rei, & opportune suis affuturus. Eodem ferme temporis momento ascēdi vallum, & tormenta explodi cœpere. Ferijt Suecorum impetus eam castrorū partem, in qua Bauarus cum suo exercitu diuersabatur, atque vbi præcipue tentoria habebant magnus Hierosoly-

rosolymitani ordinis Prior Aldobrandinus Aldobrandinus, & Ferrandus Carraffa, atque Comes Coloredus iunior equitum tribuni, ac primum Sueci deturbatis, qui classicū cecinerāt, excubitoribus, vallum ingressi sunt, nonnullosq. milites trucidarunt; neque sistere impetum Aldobrandinus potuit quāquam strenue accurrens cum paucis militibus impigre remgeret, resisteretque; donec hunc repulsum hostium numero, adueniens cum Carraffa, Coloredus, militesq. tumultuarie collecti exceperunt; atque resisti cœptum est. Horridus interea nostra castra peruagabatur strepitus ad signa festinātium militum, impediēbatq. nox adhuc obscura ordines disponi, & stridentes bombardarum globi, qui incessantibus ictibus passim peruolabant, tabernacula ipsosque milites misere sternerant, prouoluebantq. affligēbat quoque aures mulierū lixarūmq. clamor, qui periculum effugientes huc illuc discursitabant, ipsiq. milites neque arma arripere, neque superiores audire tanto in tumultu poterant, ut eiusmodi in casibus euenit: nec bene liquebat quam potissimum partem tuerentur, an eo accurrerent, qua iam hostis in castra peruaferat, an suas quisque defenderet munitiones, ne ex pluribus partibus hostis perrum-

perrumperet. Duces quoque & Tribuni nihil omnino audebant mouere, postquam suas legiones in aciem maxima cum difficultate digresserant, sine generalis Ducis, quem consultum miserant, iussu. Primi tormentorum ictus Vollestinum haud profunde somno immersum, qui vix cū in expeditione moratur somnum capere soleat, excitauere; qui strato protinus desiliens, & quid esset coniiciens, classicum canere suos tubicines iussit; ascensoque equo, cū ijs qui accurrerant militibus, aulicisque, eam partem versus in qua hostem esse, & pugnari videbat, gressum direxit; cū adesse Gallasium, & Aldringherum laborantibus Aldobrandino, & cæteris accepit, atque hostem iam extra vallum pepulisse: tunc verso cursu firmandis militum animis tota obequitauit castra, totumque equitatum cum aliquibus peditum legionibus exire, & hostis terga aggredi præcepit, reliquos suis stationibus instructa acie insidere, ac hostium conatus obseruare mandauit: ipse iterum, his ita dispositis, ad locum pugnae perrexit cum aulicis, ut propior si quæ occurrerent, adesset, prouideretque. Non cessabant inter hæc Suecorum tormenta nostra tentoria euerrere, sine tamen militum damno, qui sub vallum integris ordinibus

dinibus progressi, a bombardarum globis tuti
 erant; at vbi pugnabatur breui temporis lapsu
 solum cadaueribus stratum, trucidantibus pri-
 mum Cæsareos Suecis, mox vbi hi somnū ex-
 cusserant, vetantibus noctis tenebris æqua, aut
 iniqua discerni, mutæ sine delectu cædes,
 raroq. occisor sine morte, aut graui vulnere,
 ab occiso auellebatur; atque erat eo maior
 pernicies, quo ob tentoriorum impedimenta
 scloporum interdicebatur vsus, atque adeo in-
 certo missilium iactu haud res agebatur, sed
 gladijs miscebantur manipuli, manusq. con-
 ferebant cominus, vt vnicuique industria, aut
 fors fauebat, vnde latior ex certis vulneribus
 strages; Iamque Cæsarei, quamuis vltra vires
 nitentibus contra tribunis, pedem referebant,
 cum prior Aldringherus, cuius diuersorium
 proprius erat, ac inde Gallasius cum valida
 equitum, peditumq. manu astitere; tunc lo-
 cum dantibus fessis Cæsareis, qui hætenus ho-
 stem distinuerant, hi viribus integri Suecos
 adorti sunt, & quanquam gnauiter repugnan-
 tes, occiso pugnacissimo quoque, vallo detur-
 bauere; neque hoc contenti exeuntes castris
 expulsos Suecos persequuti, ad internecionē
 deleuissent, ni noui integriq. adfuissent ma-
 nipuli, qui depulso locum subirent. Hic

extra castra magno ardore concursum, sed ubi albicante horizonte advertere, qui ad nostra castra accesserant, Sueci, Cæsareos equites, cum peditatu tendere, ad sibi intercipiendum regressum, nemusculum versus, ubi reliquæ copiæ cum Rege opperiebantur, integris ordinibus Cæsareos sustinentes, lento gressu se recepere; sequuti sunt retrogrados nostri, neque amiserere rei bene gerendæ occasionem, trucidatis non paucis hostium; sed ubi ad nemoris limites ventum, versâ prælij est facies: Porro cōspicatus suorum periculum Rex subsidia misit, quæ non modo suos subleuarunt, sed etiam nostros non parum afflixerunt: verum aduenientibus Cæsareis, qui ad intercipiendos Suecos castris exiuerant, in nemoris limite restauratum est prælium, acriterque vtrinque dimicatum. Demum cedētibus Suecis in nemus pugna deducta est; nam Rex qui sustinere fortasse poterat, si ea die acie decernere voluisset, cum toto exercitu cōfigere detrectauit, veritus fortasse, ne milites calamitate commilitonum, qui nostro vallo deiecti fuerant, animis concidissent: in nemore tamen acriter supra duas horas tumultuarie dimicatum, non permittentibus arboribus, ut integris ordinibus concurreretur. Hic Ferran-

dus Carraffa audacter hosti insistens, perfora-
 to grauioris sclopi globulo ventre, mortem
 appetijt, magnæ spei adolescens, qui ante
 paucos dies legionis equitum præfecturam
 suæ virtutis præmium a Vollesthaino habuerat:
 Io: Baptista quoque Chiesæ peditum Tribu-
 nus, dum suam legionem in hostem ducit,
 crure plumbea glande leuiter percussio, Salz-
 burgi deinceps, quo ad curam deuectus fue-
 rat, occubuit. Melior Aldobrandino fors ce-
 cidit, qui dum indefesse, strenueq. pariter ho-
 stes persequitur, occiso equo, pedes inter me-
 dios Suecos solus remansit, atque illis viuum
 capere nitentibus, quem nobilem esse virum
 cognouerant, ipsoq. eos gladio gnauiter ar-
 cente, ac flagitante, vt aliquis accederet ex su-
 perioribus, cui se dederet. Petrus Magalot-
 tus Hierosolymitanus eques ipsius cõmilito,
 ac spectatæ virtutis adolescens, cum aliquot
 equitibus viua vi irruens, e medijs hostibus il-
 lum strenue sustulit, datoque suo equo libe-
 rum imposuit, quamuis cæsim ictu hastatæ
 spathæ, eius generis, quam parthesanam vo-
 cant, capite saucio. Sed cecidere in hoc qua-
 si iusto generalique prælio multi egregij mi-
 lites, virique, & passim adhuc cadebant, cum
 Rex reductis prius intra castra tormentis, re-
 ceptui

ceptui cecinit, & prope Norimbergam exercitum in castra reuocauit; neque nostri ultra nemus illum sunt sequuti, reprimente militum ardorem Vollesthaino, qui defessos iam præliando milites, nouo labori, discriminiq. exponere noluit, insidias quoque fortasse metuens, si propius Norimbergam accessisset; atque adeo collectis hostium spolijs, in castra copias redire iussit. Durauit hoc prælium ultra quinque horas, & tria Suecorum millia cecidisse dicuntur, non sine nostrorum sanguine, quorum supra mille desiderati sunt; splenduitq. Italorum virtus, ex quibus Carraffa, Coloredus, Chiesia præcipue contra hostes strenue se gesserunt; ac in primis Aldobrandinus gentilem in militia virtutem ostendit, quem ob egregie hac die nauatam operam Vollesthainus præter suæ seueritatis morem faucium inuisit. Cæterum non bene liquet, cur hostis prælium detrectarit, cuius antea se valde cupidum ostentauerat, ni forsan esset veritus, vt diximus, ne territi fuissent sui milites ea clade, quam commilitones aggrediendo Cæsarianorum castra acceperant. Sunt qui dicant non totum Regis exercitum cis Pegnesum venisse, ideoq. noluisse Regem prælij aleam minori numero militum subire. Verum quomodo-

cumque

cumque hoc fuerit res ita se habuit, & sequentes aliquot dies medēdis vulneribus insumpti. Gostauus tandē xij. Calendas Octobris exercitum castris eduxit, & postquam vltra Pegnesum aliquot horas instructa acie constitit, relicto Norimbergæ eodem Slammerdorfio, qui antea eius ciuitatis habuerat curam, Franconiam versus discessit. Croatæ nostri, ac Poloni, qui ad scrutandos hostis motus ierant, leues velitationes habuere; Cæterum Vollestinus nihil moueri passus est, hoc contentus, quod hostem loco patientia pepulisset, reportassetq. quodammodo victoriam. Ac quoniam Gostauus intacta sua castra reliquerat, suspicatus ne aliquid ille per insidias moliretur, intra sua castra quattuor sequētes dies se continuit, Norimbergenſes interea tentans, an deditio-
nem facere, & in gratiam Cæsaris vellent redire; Illi vero præsidio confisi perfide in fide,
20 erga Regem perſtitere. Quamobrem Vollestinus octauo Calendas Octobris, combustis suis, Regisq. castris, vastatoq. ac incenso Norimbergenſi tractu, cum Bauaro profectus est, haud tentata ciuitatis expugnatione, quam bene munitam esse, & præpotenti firmatam præsidio sciebat; ac secundis castris in Forchaimi vallem vnde Sueci recesserāt Norimberga

berga viginti millibus passuum procul peruenit. Et quoniam milites equiq. extenuati rerum necessariarum penuria, ægre itineris laborem tolerabant, exercitum in ea valle distribuit, quæ necessarijs omnibus rebus affatim abundabat; argumentum non exiguum, non laborasse Suecos pabuli inopia, dum apud Norimbergam fuere, cum adeo propinquam vallem intactam reliquissent, quam alias vel ob hoc solum deuastassent, quod Catholicorum essent prædia, ipsiq. rustici Catholicam religionem sequerentur. Hic octo dierum spatio refectus exercitus, atque interim missus in Silesiam cum aliquot legionibus Gallasius, qui Arnemij illâ prouinciam deuastantis progressus sisteret. Marchio quoque de Grana cum delectis militibus Vollesteinii iussu profectus, Porraite prope Norimbergam ciuitate potitus est, retulitq. opulentam prædam. Verum postquam Vollesteinio visum est satis requiei datû, quarto nonas Octobris Forchaimo Bambergam desertam a Suecis discessit, obseruandis hostium conatibus, qui apud Herbipolim posuisse castra dicebantur, sed ubi illos in Wirtembergam secedere animaduertit, importunum duxit sequi, atque ita suos milites defatigare, nihilque proficere; flexo igitur ad dexteram

ram itinere , Generalem ordinum ductorem Cronemburgium, cum quattuor militum milibus præmisit, qui Coburgum Franconix itidem ciuitatē adoriretur, ipseq. mox sequutus, facili negotio ciuitate potitus est . Nam quingenti sclopetarij , qui in ea erant , post leuem velitationem in arcem receptum habuerunt . Hic nonnulli dies quieti dati , & arx tentata , sed cum situ, & munitione egregie firmata esset , vanus fuit labor . Interim Norimbergenses sua vrbe erumpentes post Cæsarianorum discessum , Suauochium, vbi ægroti remanserant , expugnarunt , atque in semianimes sæuientes vlcisci iniurias ab hostibus passas sibi sunt visi ; Rex vero postquam apud Herbipolim resumendis viribus aliquot dies commoratus est , in Virtembergensem Ducatum copias duxit , vt ibi quoque exercitum restauraret, atque vt Bauarum a Vollestawino diuideret, Bannerum cū valida manu in Bauariam submisit , qui in regionē excurreret, deuastaretq.

- 21 Quod vbi Bauaro apud Coburgum nūtiatum est, habito cum Vollestawino super rerum statu colloquio , acceptisq. ab illo aliquot legionibus cum Aldringhero , Aldobrandino , & alijs ad defendendam suam ditionem pridie idus Octobris discessit , Vollestawinus quoque postera

postera die , cum nihil contra Coburgensem arcem proficeret , expilata ciuitate , Misniam versus cum reliquo exercitu, qui decem militum millia non excedebat , profectus est , ductoque per opulenta loca milite , ut præda sibi conciliaret , apud Suichauiam Holcam cum ijs militibus, quos in præsidium occupatarum ciuitatum retinuerat (namque Gallasius in Silesiam cæteros abduxerat) assecutus est, inde capto ex itinere Aldemburgo , Lipsiam castra mouit, cumque imperatam deditionem facere ciues abnuerent, subire mœnia legiones iussit, tormentaque admoueri, sed ciues suæ debilitatis gnari, altera die ciuitatē dedidere, in arcem dilapsis nonnullis Saxonibus, qui vrbi præsidio inerant, & postera deinceps die deditionem quoque fecerunt. Acta hæc sunt circa Nouembris Calendas, cum iam rigescente cœlo miles in aperto ægre commorari valeret, quare Vollesteinus, qui hyemem in expeditione traducere non consultum ducebat, hyberna providere constituit. Videbatur Misnia aptissima regio, si ita muniri posset, ut hostis improviso inuadere nequiret, quod secuturum videbatur, si Torgauium expugnaretur, atque adeo ad illud expugnandum Holcam cum maiori exercitus parte ire iussit, dum

ipse podagræ valetudine, Burfili apud Lipsiam detineretur. Est Torgauū Misniæ munita satis ciuitas trans Albim sita, ad quam super Albim pons constructus est. Distat Lipsia viginti passuum millia, retuleratq. Coloredus, qui cum Croatis ad illam scrutandam perrexerat, haud præpotenti præsidio firmatam esse; quare Holca pridie nonas Nouembris, deducto ex statiuis quæ prope Lipsiam erant exercitu, ad eā iter direxit, occupato in itinere Ailemburgo, sed vbi ad milliare prope Albim ventum est, egressus cum valida equitum, peditumque manu hostis, Cæsareos quibus præcurrere obuenerat aggressus fudit; atque cum in ciuitatis conspectū venimus, munita vrbs, extructis extra mœnia munimentis, atque ante pontem opus cornutum firmo præsidio custoditum apparuit. Holca itaque dum hostem velitādo detinet, ad Vollestaïnum citato cursu nuncium mittit de ciuitatis statu, interrogatq. an esset expugnatio sibi tentanda, sed antequam nuncius hic ad Vollestaïnum peruenisset, ab eodem missus alius Holcam Lipsiam versus reuocauit, namque volebat Vollestaïnus suis copijs Popennāimi exercitum addere, quem iam prope esse rescuerat, vt cum Rege manus posset conferere, qui ex Virtemberg

berga magnis itineribus in Misniam tendere,
 22 dicebatur. Saxo enim ut primum Cæsareum
 exercitum Misniam ingredi sensit, veritus ne
 transmissio Albi in Saxoniam Vollestinus duceret,
 & se tota ditione spoliaret, Regem de
 suo statu admonuit, atque enixe postulavit, ut
 coacto quamprimum exercitu in subsidium
 properaret: accitis interim tumultuarie mili-
 tibus ex Saxoniae delectibus Torgauium sex
 mille militum præsidio firmavit, reuocavitq.
 ex Silesia Arnemium, ut pluribus ex partibus
 sibi consuleret. Rex vero simulac Saxonis pe-
 riculum audiuit, collectis copijs ex Virtem-
 berga discessit, iussitq. ex Bauaria Bannerum
 quoque sequi, atque facto per Franconiam, ac
 Turingiam magna cum celeritate itinere, in
 Misniam Erfordiam usque progressus est. Se-
 rius Arnemius relictis in Silesia præsidijs, Tor-
 gauium in Saxonis subsidium venit. At Po-
 pennaimus ex Belgio redux, postquam cum
 Hispanis subsidium ferre obfesso ad Mosam
 Traiecto frustra tentauerat, relicta in inferio-
 ri Saxoniam suorum militum parte, Misniam ver-
 sus iter intendit, ac postridie nonas Nouem-
 bris cum Vollestaino apud Merspurgum se con-
 iunxit. Constabant Popennaimi copiae duo-
 decim veteranorum militum millibus; atque

adeo cum ijs, quos Holca habuerat, Cæsareus exercitus omnino ad viginti quinque millia ascendebat: quibus viribus confusus Vollestaïnus, contra Regem tendere decreuit, & certaminis fortunam experiri, cum ille supra viginti millia militum non habere diceretur. Collectis itaque vasis quarto idus Nouembris Lutzen vsque progressus est, ciuitatem decem Lipsia passuum millibus procul; postera die, Vaïssensfeldam, ad fluuium Salam positam, totidem a Lutzen milliaribus, venit; atque inde Comitem de Suisse cum sua peditum legione, & cū sua equitum Tribunum Bredauium misit, ad occupandum Namburgum ciuitatem ad eundē trans Salam valde opportunam; sed iam Suecorum prima agmina, trucidatis aliquot Cæsareis, qui in ea erant, illam occupauerant; quod conspicati Bredauius, & de Suisse, Vaïssensfeldam ad Vollestaïnum perdem retulere. Porro Rex Namburgi opportunitatem cognoscens, cum ad se venire Vollestaïnum intellexit, illo potiri voluit, ne Cæsarei Salam transirent, atque eo cum toto suo exercitu processit, missisque in nostrum conspectum quattuor equitum millibus, ipse a nobis quattuor milliaribus distans in acie constitit. Quod vbi Vollestaïno nuntiatum est,

ante

ante Vaissenfeldam & ipse suam aciem instruxit, opinatus non refutaturum Gostauum pugnam, missisq. equitum aliquot legionibus, quæ hostem distincerent, prælij signum dedit; sed Rex, qui operæprecium non ducebat, iniquis viribus, & ex hostis optione configere, post leues velitationes nonnullas, suos equites reuocauit, & circa Namburgum statiuâ disposuit, ac vallum excitare incepit; & Vollesteinus hoc intellecto suum quoque exercitum circa Vaissenfeldam distribuit, obseruaturus quid Rex moliretur; sed cum ille suis munitionibus contineretur, neque sui copiam faceret, bellicum concilium cogi iussit, consuliq. an ad Regem aggrediendum ire præstaret, quidue faciendum esset omnino. Retulerat castrametationis præfectus Deodatus, qui cum Croatis ad scrutandas Namburgum vias missus fuerat, esse collibus præpeditum iter Regemq. præter situs munitionem, arte quoque se muniuisse: Quapropter Poppennaimo, & reliquis, quos Vollesteinus consuluerat, visum est haud vtile hostem adeo iniqua situs positione aggredi, sed præstare opperiri, donec locum illum desereret, & in apertiora prodiret. Sic duos dies circa eandem ciuitatem Vaissenfeldam commoratum, cumque

itidem

itidem Rex suis munitionibus non exiret, sequereturque iam hyems, & vix militaria munia præ frigore obiri possent, allatumque esset Coloniæ Agrippinæ ab Henrico Berghensi Comite obsideri, decreuit Vollesteinus suos in hyberna milites reducere, mittereq. Popennaimum, qui obsessæ vrbi opem ferret, ne Catholicis opportunissima, & maximi momenti in Germania ciuitas, amitteretur. Datis itaque duabus Croatarum legionibus illum ad suas reliquas copias, quas prope Visurgim sub ductu Cronsfeldensis Comitis reliquerat, ire, & obsessæ vrbi suppetias ferre mandauit, colligereque si opus esset nouos in Vestphalia milites; tradidit insuper sex peditum, & quattuor equitum legiones, quas occupata in itinere Halensi arce, quam ducenti Sueci milites tenebant, in ea ciuitate, & circuitu in statiuam distribueret, pergeretque inde ad destinatam expeditionem. Scilicet ideo occupare Halam Vollesteinus elegerat, militesque imponere, quia toti exercitui ita in Misnia statiuam distribuere decreuerat, ut si aliqua pars a Rege tentaretur, obstare Cæsarei possent, donec a vicinis statiuis subsidium haberent, qua de causa, & multos simul milites collocare oportebat, & designare ad inuicem propinqua statiuam,

eratq.

eratq. Hala designatis alijs admodum proxima: His ita dispositis Popennaimus cum suo milite Vaissenfelda Halam versus profectus est: qua die & Vollestaïnus Lipsiam versus movit; & quoniam interruptæ viæ impedimenta detinebant, non ultra Lutzen progressum, ubi etiam sequenti die ob hæc eadem impedimenta commoratum est; Hinc Vollestaïnus Comitem de Suisse, & Tribunum Crontreram cum suis legionibus Suichauiam, & Aldemburgum misit; qui illa loca ad omnem euentum præsidio tenerent, ne ab ea parte hostis sibi regressum in Boëmiam præcluderet; Gostauus vero ubi discessisse Popennaïmum a Vollestaïno cognouit, relictis Namburgi impedimentis, post Vollestaïnum movit, ut inferiorem militum numero opprimeret, atque xvij. Calendas Decembris Vaissenfeldam usque processit: Reliquerat Vaissenfeldæ Vollestaïnus cum centū militibus Centurionē ad ultimi agminis cautionem, quem ut reciperet Generalis ordinum ductor Coloredus maior, cum Croatis Vaissenfeldam usque perrexerat: Hic recepto cum militibus Centurione aduenientes Suecorum manipulos vidit, qui ad occupandam Vaissenfeldam properabant; quo viso Coloredus Croatas aliquot

quot scrutatum misit, qui totum aduentare Regis exercitum nuntiarunt. Tunc suis Croatis in acie dispositis ad Vollestaïnum cū nuntio de Regis aduentu Coloredus reuersus est, insequente hoste, qui vnā Croatarum turmam capto vexillo deleuit; Vergebat ad vespēram dies, cum Vollestaïnus venire Regem a Colorado accepit; non excedebat duodecim millium numerum Cæsareus exercitus, ideoque haud consultum quibusdam videbatur, expectare Regem, quem maiores habere copias certum erat; sed sperabat Vollestaïnus fore, vt Popennaïmus, qui viginti tantum miliaribus distabat, ante Regem adesset, atque ita æquis viribus confingeretur; misso itaque Halam ad illum nuntio, hostem opperiri constituit, ac dato prælij signo, legiones Lutzen, vbi principale erant diuersorium, conuocauit, eodemq. vespere sub diō aciem disposuit. Ipse mira diligentia cuncta percurrens, lustranq. eam noctem insomnem transegit. Interim Popennaïmus postquam Vaissefelda discesserat, Halam progressus, eam ciuitatem expugnauerat, subibatq. arcem, cum nuncium a Vollestaïno accepit, oportere se Lutzen suas copias ducere, & periclitantibus subsidium ferre. Tum per tympanistas ad signa

gnā milites acciri iubet; sed illi in ciuitate disperſi, prædæq. intenti tarde nimis coibant, quamobrem Popennaimus iuſſo reliquo exercitu conſeſtim ſequi, cum tribus equitum, & vna Draconum legionibus, in viam ſe dedit, impatiens moræ, metuensq. ne ſero nimis ad
24 pugnam accederet. At Rex xvj. Calendas Decembris vltima vigilia acie inſtructa Lutzen verſus ad aggreſſiendū Volleſtainum mouit: eſt Lutzen ignobilis ciuitas, decem paſſuum millibus Lipſia præcul, diſtanſq. ab eo agro, vbi ſuperiori anno Tyllius fuſus fuerat non ſupra quinque milliaria; patet lata circumquaque planities, & qua ad Eurū ſpectat præcul Lutzen mille fere paſſibus pagus iacet, a quo nemus obiecto ciuitati latere Corum verſus extenditur; ad meridiem Vaiſſenfelda ſita eſt. Inter nemus & Lutzen, prope viam, quæ Lipſiam ducit & ab ea ciuitatis parte, quæ eodem ſpectat, ne ab hoſte ordinum diſpoſitio obſeruetur, Volleſtainus ſuam aciem verſa ad Eurum facie diſpoſuerat, in varios pro more militiæ diſtinctam manipulos; & quoniam militum anguſtus erat numerus, in ſiniſtro latere, quod ad nemus ſpectabat, proſpectuiq. hoſtis obijciebatur, impedimenta, & circa ipſa calones equis inſidentes collocauerat, vt

hosti appareret copiosior exercitus; videbaturq. a longe cernentibus equitum magna acies, quæ terga firmaret; namque in vltima parte posuerat, cum ne ab hoste dignoscerentur, tum ne in fugam versi calones reliquos ordines turbarent; distabat sinistrum hoc latus a nemore ad machinæ ictum, dextrum pneumaticis molis, quæ apud ciuitatem erant, hærebat; iacebatq. Lutzen ad Africum, atque omnino nostra acies posito ad Africum dextro latere, ad Aquilonem sinistro, ad Eurum, vt diximus, spectabat. Porro ante peditum aciem fossa ad alia opera a rusticis ducta obuenerat, quam Vollesteinus sclopétarijs impleuit; Cæterum vniversus situs paulo adiacentibus depressior, totum tegebat exercitum, vt nemo accedere posset, quin destinatis ictibus obijceretur, atque erat omnino talis, qualem Ducis prudentia eligere potuisset: nam quamuis aliquibus satius videbatur occupare nemus, ac ad ipsius initium positum pagum, ciuitatemq. Lutzen firmo sclopetariorum præsidio munire, inde aciem propius hostem constituere, non aderant tamen tot milites, quot ad id exequendum requirebantur. Accedebat, differri certamen, si eo in situ moraretur acies, vbi fuerat disposita, cum longius ab hoste di-

ste distaret, atque ita tempus dari Popennaimo, quo cū suo exercitu adesset; Itaque Vollesteinus instructa vt diximus acie, collocatisq. opportune tormentis, hostem præstolabatur; interim ordines, manipulosque circumequitans, quamuis haud interrupta silentij seueritate, sola tamen præsentia, aspectuq. ac blāda maiestate beneuolos milites ad strenue rem gerendam accendebat; qui læto fremitu victoriam augurātes, circumeuntem excipiebant Ducem, quem strenuos, ac ignauos pariter debitis nō defraudare præmijs, aut pœnis sciebant. Atqui Rex vbi in nostræ aciei conspectum venit, cognouitq. æquiores pro nobis situm, veritus, ne si inter nemus, & Lutzen ad nos accederet, infestis vtrunque scloporum ictibus infestaretur, missis militibus, pagum, qui ad principium nemoris iacet, scrutatur, equitatusq. partem ad tentandum Lutzen pergere iubet: cumque indefensum, qui ad nemoris principium est, pagum nancisceretur, illum occupat, ac mox soluta acie in nemore iter carpit. Hoc Vollesteinum in eam opinionem adduxit, vt crederet, nihil moliturum Regem, velleq. illum Torgauium tendere, vt Arnemio, qui eo cum suo exercitu ex Silesia venerat, se iungeret. Inter hæc excur-

rentes Sueci equites Lutzen tentarunt, & Cafarei incensis suburbijis, cum illud tenere non curarent, ad suos in aciem iuere: Popennaimus quoque cum ijs, quos diximus, equitibus, & Draconibus aduenit, cui recedete calonum turba, cum impedimentis, quæ Vollestaïnus, Lipsiam versus tendere iussit, vt Popennaimo locum darent, in sinistro latere locus assignatus est, in ea parte, in quam verisimile erat hostem impetum non facturum, vt fessi ex itinere milites, equique vires resumerent. Gostaus vero, ubi dimidiæ horæ suis requiem dedit, restauratis ordinibus, instructaq. iterum acie, milites ita affatus esse dicitur. En superioris anni eundem locum milites, atque Tyllium alium, qui non secus ac ille in nostras manus incidit incaute. Et quamuis iniquo paululum loco pugnaturi simus, de victoria tamen non dubito, quam mihi vestra virtus, & numerus, quibus hostes præfratis, certo promittunt. Nobis audacia solum, factoque opus est milites, nihil aliud ad victoriam consequendam requiritur: Nam quamuis æquiori pro se situ dispositis ordinibus nos hostis opperiat, Popennaimus tamen abest, cum maiori, meliorique exercitus parte; ibi calones, lixæque ac ægroti, vix sustinentes arma, & mox auolaturam

ram animam, in acie consistunt. Aggrediemur nos illos, fugient primum aggredientium impetum scio, & vos ijs suis ea præda potiemini, quam ex Franconia Misniaque, ex suis pariter ac nostris amicis prædatores isti, nemini parcentes retulerunt: sepelieturque illos in propinquo cum ijs tumulo, quos superiori anno in hoc eodem tractu trucidauimus. Hæc fatys bipartito irrumpere milites iubet; predites quidē, ac sinistrum equitum agmen frontem nostræ aciei adoriri, dextrum vero equitum cornu in nostrum sinistrum ex nemore impetum facere. Sesequi hora ante meridiem coepta a machinis pugna, quibus accedens hostis, haud segnus suis utens, exceptus, cadebantque plurimi hinc inde, ac Cæsareus miles occupato loco insistens, in vestigio Suecos expectabat, quibus cominus rem agere properantibus, intermedius campus euauit, deturbatisque ijs sclopetarijs, qui in fouea ante aciem positi fuerant, Sueci nostræ aciei frontem aggressi, facto vehementi impetu sex machinis sunt potiti, quibus in nostros versis damnum non spernendum attulere, inclinabatque iam acies, ni subsidio accurrens cum valida manu Vollestainus, hostem repulisset, qui cum occupatas machinas defendere non

valebant.

valeret, asportatis duabus, reliquas immixtis in alterum foramen clavis inutiles reddidit, & nostri virgētes trans fossam iterum Suecos pepulerunt. Sic in hac parte præliabatur, cum dextrum Suecorum equitum agmen, Croatas, Polonosque, qui ante sinistrum nostrum cornu stabāt, inuadens, nequeuntes ob equorum humilitatem impetum sustinere, in fugam vertit; atque hi in ceteros incidentes, ruptis ordinibus totum sinistrum agmen in fugam secum abstraxere; quod conspiciatus Gostauus, qui hæcenus in hac moratus fuerat parte, iussu Hornio hostem persequi, ad frontem nostræ aciei se transtulit, vnde Suecos fuisse repullos intellexerat, scrutaturus debiliore partem, atque in eam impetum facturus, sed cum obseruandi gratia propius nostros accessisset, grauioris sclopi glande sinistro brachio comminuto delapsus, in deliquium, ab aulicis flexo ad suorum dextrum latus itinere, ne per manipulos transiens milites terreret, ad curandum deducebatur, cum in quandam nostrorum equitum legionem, redeuntem ad prælium, incidens, dilapsis aulicis, trucidatus ab ignaris, quem occiderent, militibus, atque spoliatus est. Ferunt cum imminens vidisset periculum, neque salutis spem esse, orasse

Franci-

Franciscum Albertum Lauuemburgicū, e Saxoniæ Ducum familia, qui solus sustinendo Regi remanserat, vt postquam perierat, ipse sibi consuleret; vulgataque sunt ipsius ad Lauuemburgicum verba Gallico idiomate prolata, quæ latine sonant; perij, tibi consulas frater, noluisse tamen illum deserere Regem, atque aciem suam versus asportare nisum, donec ab assultantibus quattuor Cæsareis, qui ante legionem ad se cucurrerant, interceptus, dum breuioris sclopi ictum vitat, Regem, quem amplexu sustentabat, dimittit, atque ambusta sulphureo puluere facie, elabitur. Sic periit Gostauus derelictus ab omnibus, qui iuuare alios profitebatur. Interim Popennaimus nostrorum sinistri agminis fuga principio a prælio quoque auulsus est; sed restauratis mox cum Holca ordinibus, inter primos dimicans insequentem Hornium stitit, repulitque, & prælium iam in priorem locum sua virtute restituerat, cum selibrali tormenti pilarenibus traiectus, ad suos commilitones versus interrogauit, an vera Regis mors esset, quâ fama iam per nostrum exercitum vulgauerat, cumque ita esse rescuisset; Ite, inquit, nuntiate Megapolitano Duçi me ita saucium esse, vt viuendi spem amiserim; lato animo tamen mori,

mori, cum implacabilem illum Catholicæ religionis hostem ante me diem obiisse sciam, inde dum ab affeclis Lipsiam versus rhedæ deueheretur, post dimidiam ab accepro viduere horam, sancto poenitentiae sacramento refectus, vir eximius moriens immortale sui desiderium reliquit. Amisso Popennaimo noster ab ea parte equitatus manifeste in turpem fugâ se vertere; neque secius qui ad dexteram positus fuerat fecit, exceptis comites Terzca, Ghettio, nonnullisque alijs tribunis, qui cum suis legionibus diutius resistere, sed cum hostilem imperum tolerare non possent, ipsi quoque Lipsiam versus se recipere. Solus Octavius Piccolomineus cum sua legione inter medios hostes intrepide vsque ad prælij finem stetit; factaq. septies irruptione, ac edita late strage; amissis quinque equis, qui sub se fuerant confossi; & supra ducentis militibus, ipse sex sclopi ictibus faucibus adhuc pugnans, optimi fortissimique militis, ac Ducis nomen promeruit. Cæterum ea fuit nostri equitatus fuga, vt demissis, prouolutisq. in cæno signis, citatissimo cursu aliquæ turmæ Lipsiam vsque perfugerint, cum insequentem neminem post terga haberent; admissosq. nouo flagitio, maiorem effecerunt culpam, namque Lipsiam prope cum

pe, cum in nostra impedimenta, quæ eo deducebantur, incidissent, maiorem eorum partem expilarunt; strenui quidem milites, qui sine præda omnino a certamine discedere noluerunt. Dilapsis nostris equitibus totus hostium impetus in pedites incubuit; iamque medios intercludere Sueci proceres, dissimulata Regis morte, parabant, cum temporis momẽto circumfusa caligo lucidissimi antea solis radios obtenebrauit, ac vtrumque exercitum textit; Eapropter Sueci suspitione detenti, opportunitate oblata minime uti potuerunt, sed continuato prælio ad nostræ aciei frontem, fundere resistentes pedites conabantur. Hic usque ad primam noctis horam sine intermissione pugnatum est acriter, tutantibus locum strenue Cæsareis, vehementiq. nisu insistentibus Suecis; & Vollestinus, qui quamvis haud firmus valetudine, ac breuioris sclopi glande læsus in femore eo semper accurrens, ubi maximum erat discrimen, nihil ea die omisit, quod aut ad militem, aut ad Ducem spectet, potuit hostem sustinere, & suos continere in acie, donec dirempti noctis tenebris milites, dirigere amplius vulnera nequirent: tunc vterque exercitus receptui cecinit, & Vollestinus quamvis Hala reliquæ

Popennaimi copiae aduenissent, inconsultum tamen duxit iterum sequenti die fessos, atque impastos milites, nouo labori discriminique obijcere: relictis itaque accensis ignibus, & viginti duabus machinis, altera post solis occasum hora, silentibus tympanis Lipsiam versus se recepit; quod Sueci conspicati, usque ad pneumaticas molas cum toto exercitu acie instructa processere, ibique traduxere noctem, haud Vollestaunum insecuti, quod inter noctis tenebras insidias vererentur. Durauit sex horas hoc praelium, adeo perfracte pugnantibus militibus, ut maiori cum pertinacia nusquam pugnatum sit, fuerintque milites, qui proiectis armis mordicus hostem aggrederentur, eatenus rabies excanduerat. Et talis quidem fuit Lutzensis pugnae Lipsensi non inferior, quarum utraque iniqua Caesareis fuit, ob equitatus ignauiam, qui suas partes non egit, innotuitque posteris, quanti equitatus in campetribus praeliis sit momenti, ac satius esse, ut dimidia pars sit peditum, & equitatus superet, quam aequis conditionibus cum hoste decertare. Et tamen, respectu militum numero haec Lipsensi fuerit minor, illam tamen praeliandi atrocitate, & illustrium virorum strage superauit. Namque ex parte Caesarea praeter acer-

acerrimum Catholicę religionis propugnato-
rem Gotofredum Poppinheimum, Ducem lō-
giori vita, atque aterna memoria dignum, qui
supra centum cicatrices acceptorum in pręlijs
vulnerum in suo corpore numerabat, Fulden-
sis Abbas Benedictinus monachus, ac Prin-
ceps imperij, dum pie Crucem præ manibus
gestans manipulos ad strenue pro fide Catho-
lica pugnandum hortatur, misere ab hoste di-
laniatus mortem oppetijt; & Bertholdus Vol-
lestaïnus Ducis generalis cognatus, suę legio-
ni assistens ita vulneratus est, vt post nonnul-
los dies deinceps Pragę occubuerit; quod
idem & Prainero Generali tormentorum præ-
fecto accidit. Multi præterea nobiles alij viri,
Tribunique desiderati sunt; ac ex Suecorum
parte præter Gostauum haud pauci egregij mi-
lites cecidere; atque omnino ex vtroque exer-
citu septem militum millia periisse creduntur,
maiori Suecorum clade, qui iniquo situ expe-
ctantes Cæsareos adoriebantur; Vulneratorum
idem fere fuit numerus, qui militum, ac ex of-
ficialibus præsertim, & proceribus vix vnus ex
hoc conflictu sine vulnere exiuit, neque im-
munis ipse Vollestaïnus fuit, qui, vt diximus,
in femore percussus fuerat: Superstites vero
sine vulnere haud omnino calamitate carue-

re, namque aliqui amissam supellectilem, equosue aut amicos doluere, multi pericula subiere haud exigua, atque inter alios Franciscus Medicæus minor ex duobus Florætiæ Ducis fratribus, qui in Germania militant, quique huic prælio interfuere, discerpto equo bombardæ ictu, ex magno discrimine mire servatus est. Amissa sunt viginti duo tormenta, & impedimentorum pars, quæ equorum defectu asportari nequiverunt; ac nonnulla vexilla, quamvis ex his plura nostri lucrati sint, cum hostem iterum trans fossam repulerunt, & Piccolomineus multa acquisierit, multi quoque ex nostris in captivitatē a Suecis abducti sunt; Cæterum occisi Regis gloria ad quem spectet incompertum est: hostes quidem Holcæ, aut Ghetrij legionibus tribuunt, & Holcæ tubicen eius calcar ostendit; At Piccolomineus thoracem habet ex Alcis corio, qui is esse fertur, quem Rex ea die gestauerat, & Piccolominei commilito Buccella dum campum excurreret occisum Regem cognovisse dicitur, cuius alias fuerat captivus, ac Piccolomineo ostendisse, qui fidem asserenti non adhibuit; neque de Regis vestibus aliud extat, & Cyanos, quā aurea catenula appensam collo gestabat, singularis magnitudinis gemma, atque antiquum

25 quum Suecię Regum munus, nusquam inuenta est; quamuis Rex omnino spoliatus in campo deinceps repertus sit. Atqui Vollesteinus Lipsiæ, quo se receperat, non supra tres horas quieuit, sed relicto in arce præsidio, Boëmiam versus castra mouit; habuitque apud Fraibergam cum suis copijs obuium Gallasium, quo in Silesiam iterum dimisso, ac munitis Chemnitio, Fraiberga, Frauenstaino, Suichauia, & Aldemburgo, reliquos milites in Boëmiam, ac propinquas regiones in hyberna distribuit, nouum præparaturus exercitum ad sequentis anni expeditionem. Sueci vero colligendis funebris victorię spolijs vsque ad alteram post solis ortum horam sequentis diei in campo constitere, ac postmodum alportatis nostris tormētis, cum Regis cadauere Vaissenfeldam retrocessere. Hic lugubri iustitio aliquot dies dati, & militaria munia intermissa; ac Gostauus aromatibus conditus in plumbeam capsam demissus est, deportandus in illud Regnū exanimis, quod viuens alieni ambitione deseruerat. Sic æterna providentia (namque humanę industrię Regis mors minime potest adscribi) vt a principio nostrę huius narrationis diximus, postquam sibi visum est satis in peccantes Catholicos animaduersum, libidi-

ni huius hominis occurrit, cui totius orbis dominium exiguum videbatur. Erat Gostauus grandiori corporis statura, quam vulgo sint homines, ac proportionata membrorum compagine, robustissimo corpore; candidaq. facie, cum grandi naso, ac subrufa cæsarie, & barba, ut in ijs regionibus ut plurimum nasci homines solent, solumq. in oculis inerat vitium, quorum obtusam aciem dicitur habuisse. Laudabiliore erat animi dotes, quippe magnanimus, liberalis, affabilis, misericors fuit; pius quoque ac iustus, si hæresim, & alieni Regni usurpationem dempseris, regnandiq. libidinem condonaueris: Præterea linguarum studium coluit, libereq. Latine, Italiane, Gallice, ac Germanice loquebatur, callebatq. militarem Architectonicen, & Mathematices non omnino erat ignarus; in militari quoque disciplina quam excelluerit, quantaq. cum seueritate, & cautela in expeditionibus se gereret, partim narrauimus, ac ipsius alia gesta testantur; perueneratque permittente Deo, ad eum statum, ut si huic prælio superuixisset, parem in terrarum orbe fortasse non habuisset; sed ut vanum, & ridiculum est obsecundas res, atque ex animi sententia egregie gestas, aliquam in prosperitate spem sitam habere,

bere, cum voti sui culmen attigisset fere, confecissetq. bellū, flexo, placatoq. pij Cæsaris orationibus Deo, vix trigesimum octauum natus annum, immanem trucemq. mortem, quippe septem vulneribus confossus, subiuit, qui si in regno, quo iam pacifice fruebatur, vixisset quiete, ad senectam fortasse peruenisset. Atque eodem mense duos implacabiles Cæsaris, & Catholicæ religionis hostes Deus abstulit, scilicet & Fridericus Comes quondam Palatinus Rheni hoc eodē mense Nouembri Morguntia febre correptus interiit. Verum enimvero ob Lutzensē pugnam ab utraque parte Deo gratiæ actæ; namque Cæsar indictis supplicationibus pro morte tui hostis festos dies celebrauit; & Protestantes ob partam victoriam in lætitiā effusi minus Regis mortem, sentire, quem etiam iam fere erant exosi, dolebantq. sibi ea non seruari, quæ ille promiserat; milites vero Sueci, finito iustitio, iuncti cum Arnemij copiis, non prius in hybernā deducti sunt, quā sub ductu Bernardi Vaimariensis ducis, Lipsiæ, Chemnitium, Fraibergam, aliaq. Misniæ loca, in quibus Vollestaïnus præsidium reliquerat, recuperauerint; expulerintq. ex tota Saxonis ditione Cæsareos.

Typographus Lectori S.

Non me lateet inter imprimendum haud paucos errores irrepsisse, ut pag. 9. adhærentias pro adhærentes. pag. 51. molibus pro frumentarijs molibus. pag. 129. dedere pro dedidere. pag. 131. edoci pro edoceri: & alia eiusmodi, quæ humaniter ipse corrigas oro, cum temporis breuitas quominus id faciam impediât, ac sperem hos commentarios aliquando emendatiores me editurum, interim his frui-
re, & vale.



K: 204











